

序

合天下古今之大而舉其星野山川封域建置沿革
人官物產外簿四裔圖之說之綱之目之以立萬世
之監戒資上下之稽省曰一統志由一統志析而各
直省曰通志由通志析而為郡州志由郡州析而縣
志小矣其由郡州縣析之志一山志一水抑又小矣
然而有大焉或亘數千百里界數十郡數郡最小數
十里為之志者因而極其綿歷之長邑絡之廣以著
其大而矜吾才雖其小亦崇侈言之至於就一縣之

中析之為一鄉一鎮其小尚不足當縣一隅則直不足
以較小大也雖極崇侈言之猶無當也且夫省志
郡州縣志上而統志皆責之在官開館局集經費合
數十人之多數十年數年之久而始一成成既歷年
或旋即于廢闕而有待惟其大是以難也而於區區
一鄉鎮何有則又惟其不足較小大也易而置之也
大而難既莫適舉小而易又以為不足舉將孰是舉
者乎吾以為識大由小始識大難識小尤難尤小則
尤難何也大可以旁羅衆有而極其崇侈之量小則

局促易盡也然而大必待諸官小則人皆可勉要各
視其人之才才大者構無小譬若一几牖之供而可
以備山林之曠與滌墨尺幅間而百千里吐納具焉
則吾於桐鄉胡孝廉琢之為濮鎮紀聞得之桐於吾
浙縣之一也濮又其鎮之一也無高山廣澤險塞奇
特之觀其地介三邑裁十里其人利織作競錐刀往
往詩書之彥而虞見聞之固去而游於都會以求進
誠自量其不足較小大也則習而安之胡君獨有所
不安焉者以為地無小吾非敢大吾小將進吾濮之

人游於大焉則無或置其小於是採菟故實即童時之釣遊質父老之談助斷自宋南渡漢氏來遷稱漢院為立鎮始稍推及宋以上備紀元明逮今分建置人物記傳風詩為四門先之總叙殿以雜識合六卷以追前人濮溪志艸樵李稗編諸作而加決擇焉其尤致意于水利倉賑義學諸大姓之盛衰風俗之淳澆至於一善不遺訛傳必正期以備監戒稽省不言志槩然古作志才也使徒以較諸省志郡州縣志猶是一勺之分江而片壤之移岱也奚論尤大者然而

小之不得矣非必崇侈以為言也未嘗局促而易盡也於乎斯吾之所以為難且尤難者乎

乾隆五十二年丁未季春鹿泉趙佑序

附書題札

大題當云濮鎮不當云濮川此蓋仍前人之誤而偶不察也案鎮之立名以宋濮氏居此故為濮院猶家也濮院鎮猶之某家村某家涇諸類耳則是以前人姓名地初非以水名地若濮州濮陽之實以濮水也吾浙初無濮水安得題為濮川而徧讀篇中所條水道各處又並不見所謂濮川者其云濮川實受其三只是三條水通流鎮之南北中而鎮受之並非別有一大川謂之濮川者也漫云濮川濮竟是何等川其源出何山何郡邑其歸何所乎何以不明著之且既為鎮而作即使確有濮川亦第為鎮一事不當竟以作大題作大題則是崇

為川志如某山志某水志之例矣而前稱濮川
誌略又稱濮溪志草此何異作蘇州府志而題為
姑蘇之取纖大雅乎竊謂名當從實無取沿訛未
審何如鹿泉白

例言

濮鎮舊志無存所聞別駕周冲宇濮溪志草亦不得
見惟郡城有濮川誌略七卷其纂輯在有明之季所
載濮氏建置人物為詳然祇一家之言與家乘同不
可言誌鎮係嘉秀桐三縣錯壤凡郡誌及三邑誌及
崇德舊誌皆載濮院一境而其中人物羅列不盡明
指為鎮人且其他失傳者正多搜輯補遺頗費決擇
遺漏在所不免至於傳聞影響無籍可徵一槩不敢
濫及

志體門類甚繁風土人文其大較也書分建置人物
記傳風詩先以總叙繼以雜識為此鄉紀聞至于星
土灾祥農桑戶口之類則有郡邑誌在凡與他處不
甚異同者不復多贅

鎮無疆域遠及鄉村勢反大於縣境故四到不出十
里之外如本覺之屬秀水交山之屬桐鄉雖甚密邇
不敢闌入拘墟之見所不敢辭而荒墟下聚自宋迄
今駸駸日盛不嫌見聞之隘也

鎮自南宋以來確鑿可據獨古蹟自春秋始事甚荒

遠杳無遺踪蓋以鎮近樛李故墟相沿有自姑述舊
聞以傳所疑

人物為志之最要自宋以前不可得而知矣即濮氏
開創而著作侍郎諸公始以鄉達為首功業可紀者
詳之其餘既登仕版在所必錄蓋志體另立選舉一
門凡明經上舍之類亦所不遺茲既不能備載故惟
通籍者列之而自宋以來登甲乙榜者依科次附後
以備稽考云耳

篤行盡範在人物中尤關風教郡邑志所載固已搜

羅罔失其餘窮簷寒族或已經前輩表章或未蒙當代旌賞謹為闡幽以示激勸

記傳為文獻實據自宜詳錄間有謬誤略為考正若賦序之類無關緊要者例從刪汰

風詩自宋以前無攷近代漸多然亦不敢濫收擇其尤雅者錄之凡非鎮人標其出處至於吾鎮代有作者集多不傳濮川詩鈔一刻猶有未盡茲登其為鎮咏者

事有不容入記傳而稗官小說可資助者未始非文

獻之助故列雜識一門必標所自示非無稽至於故老傳聞雖未見刻本苟無異詞附錄一二註舊聞二字於下不敢誣後人也

詩文雜識固有成書餘亦即舊聞稍加刪潤故不明註出處偶有管蠡之見細書附後加按字以別之是集自乙未以後有事纂述因見聞陞陞置之敝麓十年以來毫無補益所惜此稿不定後更難於叅攷稍為排輯俟博雅者廣而續焉若以為志則吾豈敢

濮鎮紀聞目錄

卷首

總叙

開創

沿革

形勝

興廢

水道

里至

風俗

卷一

建置

第宅

寺院

津梁

公占

祠墓

古蹟

坊巷

園圃

古蹟

古蹟

卷二

人物

鄉達

隱居

篤行

壺範

儒林

藝事

流寓

方外

卷三

記傳

卷四

風詩

卷末

雜識

濮鎮紀開卷首

里人胡琢其章述

總叙

開創

濮院鎮古樵李地也東三十六里至嘉興郡城西十八里至桐鄉縣城南通海昌北入吳淞前此茫然悉為巨浸其地西自石門堰以出陡門堰懸流層級而下故水則設閘啓閉陸則置棧通行非有近日之環渚曲流阡陌交錯也自隋大業開經河八百里而支

流寇疏橋李一境始獲安瀾鎮自宋建炎以前特禦
兒一草市耳逼鎮為吳越戰場平行千頃至今稱南
北草蕩云宋高宗南渡曲阜濮鳳扈從至浙卜居茲
土至少宰斗南顯於理宗朝遂稱其地第曰濮院而
鎮之名由是而昉焉

沿革

春秋時為吳越邊境今鎮東有橋猶稱國界焉秦始
皇二十六年屬會稽郡二十七年屬由拳縣漢武帝
時屬禦兒後隸揚州三國時屬永興縣梁太清間屬

吳州隋開皇間屬杭州大業間屬錢唐郡唐時屬嘉
興州後梁隸吳越王後晉始為秀州宋至道三年隸
浙西路宣和二年割嘉興之西鄙五都並崇德縣而
梧桐鄉與焉因而濮院地西南屬崇德東北屬嘉興
元時統屬嘉興路總管明復宋制宣德五年又分嘉
興之西鄙八鄉為秀水縣崇德之東鄙五鄉為桐鄉
縣是以濮院鎮西南為梧桐鄉正古語兒地東南為
長水鄉屬嘉興東北為靈宿鄉屬秀水正古橋李地
也

形勝

環鎮皆平田沃壤圍以支港無山林川澤之險而登高遠望郡城真如寺塔及硤山塢影可見水自天目南來西連語溪東接鴛湖由陡門以溯石門北塘帆影往來其間一由迎春橋而南為鎮之東七里而近一由撲家堰而入向有長生橋一溪直達僅四里許平林茂竹掩映縈旋自宋以來有八景之名鮑西溪所謂市橋曉色林墅書聲翔雲仙觀落日招提南涇漁艇西村樵唱幽湖秋月梅溪雪霽宋景濂所題翔

雲高眺福善翠冷粧樓旭照梅涇花午荷塘晚風化壇楓冷幽湖月滿西院纏霞皆非虛語云

興廢

濮氏為鎮巨族累世撫仕淳景以後宋室漸衰于是經營家業賊獲千丁督課農桑機杼之利實由此始其餘著姓數家力能招致名士遂有占籍為家者長子孫繁族姓焉元世祖大德丁未濮鑑出粟賑飢辟為淮安路打捕同提舉遂於市中立四大牙行收積機產速商大賈旋至旋行無羈泊之苦因有永樂市

之名嗣後市業日盛從皇慶延祐以及天歷至順間
寺觀崇隆園莊環遶其盛可知至元丁酉苗帥楊完
者統洞蠻荅剌罕等屯駐院境據福善寺為衙舍抄
括院境民房受燔毀者什之六七福善僅存一殿元
明僅留一閣閣闌機杼杳然散去庚子秋平江兵至
始得剪除離窺之民招使復還組織遺風稍復舊觀
丙午張士誠壻潘紹元駐兵烏鎮稱欲保安西浙明
兵營於東阡以絕其援紹元糧盡馳騎叩濮氏貸糧
十萬而還戒諭游卒毋得侵掠院地故自鎮以北由

阜林烏戍直抵平望屯營百里標掠四出市鎮鄉村
多被殘毀獨濮院終獲寧宇及明太祖平偽周勅令
分徙又以草朝株遣遠竄旋還蓋自建炎己酉至是
濮氏之盛二百六十餘年其他大姓前有雷石燕朱
後有馮楊施岳節義人文毓靈濟美機杼之利日生
萬金四方商賈負貲雲集至嘉靖丁未海倭大訐桐
邑被圍河朔名將宗禮戰沒阜林而濮院又為馳驟
之場土寇復乘虛起擄萬歷中改土機為紗綢製造
尤工擅絕海內拓街衢廣廬舍五十年来綿亘踰倍

傍鎮瘠田畝值二三金者爭取為房基加值過百金至萬歷末年連遭水旱流亡不少崇禎之季荒災屢告繼以盜賊焚掠井里蕭條

國朝定鼎以後培養生息戶口日增科名不絕四民各安其業百廢具舉更非前之所可比矣

水道

濮鎮水道有三曰北條曰中條曰南條北條者新城塘也自苕溪流經石臼漾合於漕渠漕渠者中條也自餘杭至玉灣折而流於東紛入永新諸涇從西南

環抱濮鎮東南匯於長水妙智以東數涇則分流而趨於鎮者亦分三派南派從十字港雙賢港匯為梅涇中派從鎮中流過新橋漾渡船漾匯為幽湖北派從窰港紆流至昇平港合陡門涇入滙龍漾陡門涇者秀水界涇也永新諸涇屬桐治而陡門涇從東北穿漕渠南入遠迤數里匯為吳涇遂入昇平漾合流於幽湖幽湖通於長水長水濮鎮之南條也從海寧而來經硤石入嘉興縣界過安山下北流與濮鎮之水合入練浦而會於滬湖要之濮鎮之水以漕渠為

本長水為歸苕溪則益漕渠而資乎鎮水者也

里至

鎮自漕渠穿數涇而入民居夾水繡錯環周不過十里許而形勢所聯鄉都所達蓋有可紀者焉嘉邑所屬為長水鄉秀邑所屬為靈宿鄉桐邑所屬為梧桐鄉桐邑之名由此鄉也長水鄉自圩匯而東包太和境圍南北二蕩越桃花里逼永城二里許廣二十五里袤過之延入海鹽界靈宿鄉自陡門而北越靈宿廟包萬壽山左右東接學繡西鄰永新南界梧桐裏

二十餘里廣如之梧桐鄉地聯文史相對橫山接於硤石西南過桐治越張蕩廣二十餘里袤如之而吾鎮適為三鄉之會集中所紀縱橫不踰十里東北至嘉興府城三十六里達蘇州一百八十里西南至石門六十里達杭州百九十里進京水程四千百三十里陸程三千七百十二里

風俗

吳越春秋云人性脆而愚以船為車以楫為馬間嘗論本鎮人以機為田以梭為耒而租穀所入能週歲

給者輒謂之富於田即有積穀多糴外貨云

史記漢武帝云古人有言大江以南五湖之間其人輕心今濮鎮人無特操一倡百和雖曰輕心端由渾龐所致

宋志云吳有秦伯辭讓之遺風越有夏禹勤儉之餘習鎮介吳越之交漸漬之久仿佛兼而有之若夫蕪并好餘挾持喜鬪信巫鬼溺淫祀尚見於閭閻墟落間豈非楚越之舊習乎

趙宋南渡關鎮後日以繁華相尚動云濮鎮富厚之

區婚嫁喪祭競趨奢侈而君子尚禮庶民攸效自鮑仲孚江朝宗楊宗道楊士昂馮原泉陸吉菴岳石帆諸先生居鄉由禮濮鎮風氣敦於是矣迄今茂材輩出科甲蟬聯風俗之美惟鄉先生有以創之

本土風氣大率敦業畏刑崇文重恥人性柔慈遇暴慢多容隱弗較士雖貧不親負荷不登酒壚有偶及訟廷者則羣嗤之故士重志節一有敗德雖市井知詆呵且安土不好遠遊無故未嘗適百里商游不經歲有過期不歸者則人以為異

俗略冠禮祭亦脫略惟婚多鄙文喪沿濫習納采曰
拜門求允納徵曰下定行盤請期曰准日納吉曰催
粧親迎向雁而拜曰奠雁送女列俎而燕曰待嫁出
閤則有踏氍跨鞍之儀入門則有列炬穰然迎寶龍
接寶之目喪者初曰領細繼曰接煞非小康不能有
葬地又不欲為義葬則荼毘拾骨以瘞良可悼也
舊俗相傳人家生子三日家衆會食餛飩凡戚里姻
婭朋友不必招呼而集有不值其期者強之使補吝
而不舉衆攢攻之或過於途擒定使之騎牛以朱墨

塗其面而戴以蓑笠用鼓吹導送於其家名打家長
後不用朱墨塗面而以紅綢披其身牛易以馬蓑笠
掛馬後仍用鼓吹迎之壯老得子者尤甚 國初猶
然今則湯餅之會如故而陋俗漸革亦野變為文之
一証也

每數載於三月三日迎佑聖會遠邇畢至稱為勝舉
後易以東嶽則於三月二十八日各坊競勝踵事增
華常年四五月二麥登場好事者釀金錢即通衢
設高臺集優人演劇曰扮臺劇秋成以後亦然觀者

輟業不惜

他處即云作燈盡燈節而止吾里則先於燈節左右沿街各植竹竿久之訂期張幔彌路雜綴五綵及珍異人物事件點燈徹夜方收至飯後又即張挂至於迎燈競勝各坊爭出新異飛禽走獸人物故事靡不窮極工巧愈出愈奇向來直接佑聖會期猶於日間迎會夜間迎燈一國若狂至今此風未艾

七月七日金總管誕辰向亦迎賽里人稱七老太會十五中元前後數日翔雲觀遠近諸貨駢集技巧雜

陳居人停業遊觀百貨為空

吾里機業十室而九終歲生計於五月新絲時為尤亟富者居積仰京省驪至陸續發賣而收買機產向傳設市翔雲今則俱集大街所謂永樂市也日中為市接領踵門至於輕重諸貨名目繁多總名曰綢而兩京山東山西湖廣陝西江南福建等省各以時至至於琉球日本濮綢之名幾徧天下

機業之家男婦最勤鷄鳴而起冬則夜半篝燈紡絡之聲比戶相聞惟蠶時少輟然亦有終歲不停者此

風他處所少勞則善心生庶幾近之

節序變遷如踏青競渡乞巧登高之類與他處相似一切不贅至於歲終送竈以後各行臘蜡之祭酬神之家所供雲馬有視平時較大者因稱之曰獻大土地別於平日之獻土地也陳設較豐祝者以俚歌倡之曰贊神歌旁人和其聲曰拽木頭殊可笑也

按張受先云凡志例大致矜重土風揚播嘉美意固甚善但仁里不必比屋盛世非無敝民如吾里南通海昌為大夥鹽徒出沒之所載在烏青分署紀事明

季鎮南多盜永昌寺文茂環及楊耀宇等大肆焚掠幸遇昇平奸宄屏迹而先事不可不防也賭博之習村市皆然甚至通衢設桌徹夜呼盧如壓寶擲骰之類名目不一愚人一陷其中破家喪身者有之更有阻葬惡習糾集奸匪橫索酒食銀錢厥費倍蓰於營葬以是貧不能辦者多至暴露遂從火葬最為風俗人心之害下至四河脚班妄據疆域婚嫁則勒索陋規名曰落界喪葬則扛擡索詐不饜不休向有厲禁限定工食勒石闕帝廟中而憑恃凶橫愆不遵守

凡此皆採訪者所宜留意也

濮鎮紀聞卷一

里人胡琢其章述

建置

公占

駐防署 鎮上向無駐防 國初多盜鎮人張斗瞻
請兵勦捕許捐營房後為與事者中飽不構因借
寓福善寺西房雍正間始遷於渡船橋東之南帶
遂有駐防把總公署乾隆庚寅年里人沈謂韶首
倡勸捐王國棟重修

分防署 係本府照磨分防濮鎮常平廢倉曾駐劄

焉後或賃民房或寓寺院迄無定所至乾隆乙巳

里人始捐資為置衙署一所在秀水界之姜家衙

永為公占云

按我鎮比聯三邑事無統緒分防之設誠不可少
雖佐貳不得擅受民詞而盜賊之竄匿賭博之窩
歲無分各邑皆可擊解風雀之爭因之解紛者亦
復不少故遇廉敏之員每有去思之頌惟公署未
定苟且寄寓官民俱不得安即如駐防僧院
時里之紳士致興告訐勒碑寺中通來復蹈前轍
幾起爭端乙巳之役實補以前缺典

常平倉 明萬曆二十四年秀水知縣李培奉檄建

常平倉四濮鎮居其一今所稱倉前是也廳五間

後堂倉廩左右各二十間儀門三間耳房夾堂廡

各一帶地二畝八分五厘後惟各縣治仍舊其他

鄉鎮多廢 國朝雍正間郡照磨移駐濮以為解

舍今僅其址存焉

謹按乾隆八年五月少詹李清植陳倉儲利弊疏
略云自漢以來惟常平義倉社倉之法為最著按
常平本法必穀賤傷農然後量增其價而糴之非
傷農不糴也所糴又不為限額惟至價平而止必
穀貴傷民然後量減其價而糴之非傷民不糴也
所糴亦不為限額務至價平而止下以利民上亦
不虧官此常平所由名也今之常平頗與本法異
其糴也不問市價之上下惟以滿額為主苟額米

滿雖貴猶糶也至其糶也州縣必先詳請經上司核定糶價勒限糶額而後行之故常平之行似宜修核以抑市價如該處穀價每石以四錢六錢為平糶之若市價復本止法假如錢與之俱長官每石四錢有半糶之若市價熟石止糶價與之俱長官每石四錢有半糶之若市價漸薄石則糶價與之俱落亦至每石六錢即止不糶倘遇歉則漸落則糶價與之俱落亦至每石六錢即止不糶倘遇糶則民實受惠保之福矣至於社倉宋胡寅論義倉之弊曰凶飢無狀有司固不以聞也良有司敢以聞矣而文移反覆給散人耳鄉遂之遠安能扶沒其受惠者大抵近郭之廩哉今之鄉遂之遠安能扶攜數十里以就升合之廩哉今之鄉遂之遠安能扶况當其勸諭時不肖官吏或有勒派需索之弊此則小民未見其利先受其累矣此疏于常平之法極明曉當事者採而行之鎮倉矣未必不可復也又按常平社倉皆歸縣治偶遇荒歉舉行故事縣或委員赴鎮擇公所平糶而澤不能均且久于是

吾里創為捐賑之策其法不由官而由民里之殷戶好義出粟多寡不等置簿收訖分貯各坊鋪戶各鎮應賑貧民隨坊稽查戶口若坊鋪戶各戶給與小票實往所該給發鋪戶逐日照票分賑或錢或米不一量入為出限為越止呈明該縣給事示舉申詳各憲貧戶既沾實惠嚴戶亦蒙旌獎誠感舉也乾隆三十五年監生楊繡封等曾一行之五十年乙巳杭嘉湖三郡偶被旱災丙午春里人復循前議分賑三月適東阜實公校士禾郎具呈申請蒙獎以好義可風額蓋其事成於紳士不由吏胥既無浮費更免侵漁以鄉里賙賔之類助當事荒政之勝誠非小補故因常平而記之以備攷

社學 在倉內夾堂廡各一見秀水吳宏濟碑記

按倉內設立義學有教養兼舉之意既係公估又有司事今雖毀廢遺址尚存良法美意踵而行之

其有補於國家化民成俗之意豈淺鮮哉

鄉約所 桐邑志鄉約所在濮氏之白雲庵邑令胡

舜允定額明萬歷年間所設

按鄉約之設自明有之胡令所題為里人濮侍涇也國朝順治六年允科臣陰潤條議頒講六諭康熙九年十月頒上諭十六條十八年浙撫陳衍輯直解書頒郡邑各色皆有約長時集紳民恭讀典至重也近來新邑令到任下鄉間一舉一行而所充約長一如胥吏非有古時三老之風至於鄉間老叟身衣黃衣手秉木鐸造門朗誦孝順父母和睦鄉鄰等句聽者投以錢米漫不加察則約長之望輕矣

義學 在茶家橋左薦為長生菴菴廢為義學康熙

間尚存今廢為民居矣

按元時濮氏有義塾嗣後無聞國初以來渡船橋東傳有義學莫詳創建之始近鎮人有徐上懷者有志復設義學買嚴家園民房一所為之甫集事而上懷遽沒其事遂寢

漏澤園 漏澤園義塚一在鎮東長水一都嘉興界

一在鎮北零西區九畝一分五厘五毫秀水界一

在鎮西南二十九都張鎮糧地四畝五分明正德

九年立一在西寺浜二十九都陳國珍稅地十一

畝七分崇禎十三年置俱桐鄉界

按吾鄉土膏而民勤尺寸之地必耕植非稍溫飽者不能有葬地而漏澤園之設原以收無主之骸

有主者又不欲概從瘞理于是貨地而厝久或付
之一炬嗚呼火葬之風稍知理性者何忍為此乃
諭戒諄諄而此風未革者則以無葬地而又不肯
為義葬也其法莫善於同仁親等會各出微貲
積數載而為之所詳條例向有成書始於會內之
人并及會外即如鎮人吳烈婦一葬實郡中永安
會成之蓋入土為安既不嫌薄執紼集事更可敦
俗而捐地施棺諸善事皆由是而推行之惟在樂
善者能
勸勉耳

第宅

沼

濮氏八宅 濮氏在宋有八宅二十六庄八宅者一
曰舊宅在西寺後一曰大宅在洗梳池上 一曰正
宅即寺觀故址前有濮院坊後有濮元帥花園山
治亭臺備具荷花數十畝即八景所稱荷塘晚風
者後為邱獄官池東有花園街至今仍其名 一曰
市上宅在市中四面皆永樂市房 一曰南新宅在
南新街左 一曰東河宅在渡船匯東岸旁有餐玉
居 一曰南河宅 一曰大牆宅在陸家橋西基下相

鳳長子梧之後則當時之盛可知又云洪武四年
詔給天下戶帖時惟漢守清受帖居鎮守清漢鏡

附洪武戶帖考

洪武三年命戶部籍天下戶口每戶給以戶帖重
土著也于是戶部製戶籍各書其戶之鄉貫丁口
名歲合籍與帖以字號編為勘合識以部印籍歲
於部帖給于民仍令有司點戶比對其法甚嚴故
版籍無一隱漏今里人張松家有先世戶帖一紙
如式錄後
聖旨說與戶部官知道如今天下太平了也止是戶
口不明白俚教中書省置天下戶口的勘合文簿
戶帖你每戶部官出榜去教那有司官將他所管
的應有百姓都教入官附名字寫着他家人口多
少寫得真著與那百姓一箇戶帖上用半印勘合
都取勘來了這這地裡大軍如今不出征了都教去
各州縣裏下着這地裡去點戶比勘合比着的便

是好百姓比不着的便拏來做軍比到其間有司
官吏隱藏了的將那有司官吏處斬百姓每自躲
避了的依律要了罪通拏來做軍欽此欽遵外今
給半印勘合戶帖付本戶收執者
一戶張得肆係嘉興府崇德縣梧桐鄉二十九
都胎字圍本戶計今四口
男子二口成丁壹口本身年三十四歲
不成丁壹口本身年男阿拘年一歲
婦女貳口妻宋大娘年二十六歲
女阿勝年四歲

事產

印全
右帖付張得肆收執准此
洪武年 月 日
民田三畝五分一厘房屋壹間壹厦

半印
半字貳佰三十六號
押押押
押押

南北更樓 南更樓在陸家橋南北更樓在鎮水巷

後高可眺遠鳴更守夜以備不虞濮子澄舊譜所稱更樓報夜迴環是也皆濮氏盛時所建遷徙以後旋廢

義塾 元大德中濮明之建趙文敏所稱為義塾以淑學徒是也在元明觀後與楓涇戴氏鹽官馮氏並稱

濮元帥別業 濮元帥銳別業有八今皆不可考

按邵邑志皆稱濮鑑宅為濮元帥別業攷鑑墓誌以翰粟為淮安路屯田打捕同提舉所稱元帥謂濮銳封寧遠將軍者非鑑也元釋雪廬有題別業詩

寶券樓 濮氏扈宋南渡有宋賜鐵券其子孫建樓

貯之故址莫考澹軒述祖詩注云鐵券在姪懋功

處濮履中云鐵券據存蒼山姪處

按濮氏譜稱始祖鳳字雲翔為宋駙馬都尉由貢入仕撰宣仁太后實錄典贈丰華儀容俊雅帝甚悅之尚德陽公主王梅溪和太尉濮士泰詩有玉葉金枝之句澹軒詩亦云我祖帝甥其有鐵券固宜據澹軒履中所云則國朝尚在及訪諸濮氏已無知者或云歲之者已殉葬矣惜哉

朱氏宅 在長水鄉宋朱勝非扈從南渡後居此有

秀水閑居錄元時籍產惟暘谷一枝留鎮其裔孫遷人和坊國朝以來鳴吉光國以文武科顯今

所稱旗杆下是

燕氏故宅 舊稱鎮上大姓有燕雷石濮誌略又稱
貝劉燕朱劉無攷貝疑即貝瓊廷琚子翱翔翻相
繼以薦得官然清江舊宅在爻山南今作庵不在
鎮惟燕氏猶傳燕場之名在鎮西北而燕姓絕少
無可考

雷氏故宅 雷氏亦無考惟市中尚傳雷家潭雷家
橋之名楊存齋詩云余家鄰並雷義宅是也

按國朝乾隆癸酉福建雷翠亭名鑑視學兩浙
嘗於西湖遇我鎮一人詢知濮人因言汝鎮有雷

家潭知之否此吾祖氏舊居處也豈自浙遷閩宗
譜所載水木本源在此歟姑傳所聞于此

石廉使故宅 石朝用宅也桐邑志云在濮院今名
顧家園是而寺浜上又有石家場之名

雪筠齋 濮欽敬之宅敬之天歷初出為郡推官後
見世亂建雪筠齋以自藏元釋克新為之作記齋
在幽湖之東今無考

濮家村 在鎮西梧桐鄉或云即八宅舊宅之一至
今濮氏聚族居焉人稱濮家帶村深徑僻桑竹翳
然後有梅園春初花發如雪香滿竹林遊人事往

觀焉近漸廢矣

環碧堂 在幽湖之西朱顯道世家於此築堂而水

周其下名之曰環碧周伯溫題額見清江作記

按舊圖在白雲庵之南

江學士故宅 在鎮西元末江朝宗卜居於此有月

夜清遊詩因以名集

楊長史舊宅 遼府長史楊述所居在鎮北今所稱

楊家帶是

馮方伯舊宅 布政馮孜第在大街後遷桐治所稱

馮家河是也中翰名敏者仍居於鎮今宅雖改建而大方伯第綽楔尚如故

施布政宅 在鎮北鶴息街施氏祖宅自元季始布

政公實產於郡之瓶山里其後復遷於鎮

岳三進士宅 在雙賢橋東今惟旗杆石尚存所稱

岳家堦及舊岳皆岳氏聚族而居之處

啟明樓 楊恩字菊賓桐邑庠生與長洲待詔文徵

明善題其堂曰嘉樂堂之後構樓以下待詔榻文以啟明名之後為陳氏宅

得月樓 西河徐氏宅徐端木曰荒廬歷六世矣上

虞顧迴瀾先生顏其樓曰得月

梅涇草堂 沈海鷗宅即宋景濂讀書臺遺址今廢
為忻氏墓

寺院

韋天亭 在梧桐鄉黃麻橋舊志相沿宋武帝庚申
創立明崇禎乙亥重建 國朝康熙十三年增置
禪寮改亭為菴今漸燬廢

淨土菴 即化壇菴宋宣和間惠忠禪師創造元至

正中濮允中以菴宇逼窄延高僧琦楚石講經恢
制遂成名刹明代綽菴大淵兩僧先後鼎葺正德
丁卯釋廣源撰中興碑記止詳濮氏修建而不入
化壇者時方奉禁焚屍大淵欲潔淨菴左而諱言

之也碑為項襄毅公篆額嗣後屢經募修遂以化
壇楓冷標額山門

三教堂 在鎮北靈宿鄉宋嘉定間智明禪師依檀
越陳德明結菴扁曰三教堂宋時碑記尚存明萬
歷間福善寺崇遠房僧文淵為楞嚴寺監院與請
大藏賜紫衣與姚羅浮馮具區陸五臺袁了凡李
臨川馮原泉賀道惺諸先生善刺史心涵包公曾
請入菴遂為此菴中興之祖天啓壬戌孝廉姚若
麓請於秀邑令湯公齊為之記

福善寺 在市中秀水界濮鑑捨宅偏地以建宅後
有崇福積善二菴併入寺中故名向有浙右名山
江南福地二坊由香花橋而入松柏陰森殿廡輝
麗正殿上右樑書云建寺檀越濮鑑一力蓋造佛
殿上報四恩者時至大二年歲次己酉良月辛未
吉辰建造凡三十四字左樑書云當寺開山比丘
志浩了生謹題祝延今上皇帝皇太后齊年皇太
子千秋凡二十八字趙子昂所書也後有佛閣僧
房七深隱崇遠南隱天香永照桂軒鄰清四面水

環梵舍稠密基二十八畝以濮永福立戶於零西
十冊正統中立持正員入郡縣志寺僧原體重建
殿閣鐘樓俱詳楊奉議碑記隆萬間僧文淵重修
則馮夢禎為之記未立碑也 國朝康熙甲辰僧
佛眉建大悲閣禪堂戊午僧鶴峰復修正殿六十
一年時西房僧湘南住天津海光寺隨 駕避
暑熱河七月二十九日奉 旨賜額曰香海禪
寺後僧涵輝於水次重建山門敬懸 賜額焉
元明觀 今稱翔雲觀與福善寺相並亦秀水界濮

鑑分宅之左偏而建也止東西二房基地九畝三
分前殿供真武當時覆蓋皆琉璃瓦兩廡塑諸天
元統中濮允中又建三清閣於殿後閣下側梁右
書大檀越承事郎前兩淮都轉運使司新興鹽場
司令濮也先不花同室宜人陳氏男彥仁家屬等
鼎建左書大元元統乙亥歲八月壬午吉辰通元
明素清淨法師嘉興路元明觀住持提點鄒道寧
謹題閣上兩肩梁大書三清垂教繼元門太上之
宗風萬聖朝元慶明世昇平之化日閣後有翔雲

石枋鐵崖因匾其山門曰翔雲勝境元末僅存一閣明景泰時復葺枋諫議青記其事尋燬萬曆辛巳馮方伯孜重修未有碑誌至崇禎六年工竣岳通政駿聲作記國朝康熙二十九年程廣文士樞修三清閣其三清寶閣三元寶殿兩額並仍董文敏書乾隆四十一年丙申重整正殿添設戲臺神像及真武行宮財神九天等殿并建文昌閣

福壽禪寺

在市西梧桐橋桐鄉界元皇慶中有女濮氏出家為古心禪師獨力建造請額於朝勅賜

今額禪師富而不嫁建寺焚修後嘗出主廣福寺既卒分葬其骨之半於此曹太史鑑為作塔銘趙文敏書入明改為僧院今因東有福善寺故稱西寺基廣十畝立戶於桐鄉縣二十二都東西有迎龍聚鳳二橋前有香花橋地僻而靜後有佛閣張宏牧題西院纏霞四篆字仍元時八景之名云

福清道院

今稱西觀以元明觀稱東觀也在定泉橋西桐鄉縣界郡邑誌俱稱元至正丙午里人狄守真建請額為院洪武二十四年全真道士姚道

安復建崇正間重修

按誌略亦以為漢明之建而趙子昂所作漢公墓誌凡所建寺觀皆載不應遺此故從郡縣志

^{仲唐}南觀 向有南觀舊圖載其故址在大街上早燬後

為民居遂無攷

五福祠 今稱老太廟舊傳為漢氏五福祠附西觀

旁東向

土地廟 宋建在福善寺西漢氏之后土祠也元末

燬明成化十八年重建添造東西兩房 國朝康

熙甲子重修乾隆癸亥更葺已已建財神殿甲辰

後改山門修正殿玉皇樓

東嶽廟 在十錦塘北舊為靈官廟自宋代尋燬

元大德四年漢明之復建山門殿廡悉仍宋制內

有十丈禱竿望踰數里元末燬於兵僅存一殿成

化中重修 國朝改稱東嶽廟有山門戲臺行宮

雍正八年設夫像兩廡為武穆鄴都二殿乾隆間

增修

三官堂 在甯官橋畔未詳始乾隆初年不戒於

火殿壁盡廢乾隆三十年重建上為文昌閣規制

宏壯

永正禪院 在十錦塘元至正中僧志清建明崇正間古宗重建 國朝順治一初加修今漸頽廢
南涇道院 在梅涇之南至元間里人張全真建有趙孟頫碑記鮑仲孚所題南涇漁艇即此涇也郡志及嘉邑志并載之

隱居菴 在渡船橋東近丁家石橋相傳為鮑西溪隱居處向有是菴傾廢已久 國朝康熙間里人陸愛橋者葺之旋毀至乾隆庚子復建

晏公廟 在幽湖東明永樂丙申遣三寶太監鄭和出使西洋求異寶以軍士從行建晏公廟凡十列布嘉城中外此蓋其一也

白衣觀音菴 在陸家橋東南明神廟中濮侍涇所築址臨曠野面田掖溪殿廡山門漸增而備自濮氏創建寺觀後好善喜捨樂居檀越者復有此今稱白雲菴

關帝廟 在大街南北向明嘉靖九年建 國朝乾隆間重修西建文昌閣甲辰又修行宮及忠勇王

殿

新陸菴

本名天圓菴在楊家橋陸夫人項氏捨基供佛之地止有前宇三間後尼僧正秀募建國

朝乾隆間重修

積福菴

在幽湖橋畔向惟一佛屋近增修即元時碧月亭故址也

白雀禪院

在柳岸西向明馮布政家菴也向為女衆焚修之地凡鎮上尼菴祈晴禱雨必集於此國朝乾隆間重修改為僧院

霧源菴

在鎮西崇正間有善士黃仰椿捨基創建故里人名黃菴乾隆四十年濮仲垣重修

戒珠菴

在韋天亭後俗名舊陸菴明嘉靖年建

賢授禪院

在鎮東北為郡鎮往來處有橋曰好賢

俗說為草野橋院在橋東畔明洪武初建亭以息

行人萬歷己未建佛堂三楹易亭為菴秀水湯侯

題曰賢授崇正庚辰僧幻兮重修仲宏道作記舊

名草庵或作延壽

會龍菴

在會龍橋畔明建所謂會龍晚烟者也幽

湖之口諸水至此匯為一漾淵深瀨濶渟而後流
爰建橋與菴皆名會龍

水木菴 在濮九娘橋西北明建有水木禪居之稱
國朝乾隆間菴僧募修增建佛堂

香巖菴 在洞橋南明里人楊霖霖捨建

朝北觀音堂 在南新街南北向明建為女僧焚修
之地元季濮氏建

水月菴 在過安橋明建

惜字菴 在靈官橋之東有僧某日掛一籃徧拾街

街字紙付水火因感居人建此菴

按菴係前明時建今已廢惜字之會里人屢舉行
之然往往不能久近因改造翔雲觀里中好善者
于壬寅復舉惜字會出錢收買以朔望為期值會
者至觀中輪辦即于文昌閣前砌一字爐隨買隨
焚收灰載投海中久
行之亦一善緣也

沈菴 以沈居士構菴修攝故名水月如即居此菴

靈鷲禪寺 在會龍橋西畔 國朝治丁酉年僧子

安建懷璞重修

報本菴 在梧桐鄉興勝橋即百畝園左順治十三
年建

指南菴 在化檀東南臨梅涇上福善寺僧佛眉題

其山門曰指南

新菴 在狄家園後康熙年間楊蒼舒捨宅建

天香靜室 福善寺有天香山房僧某以山房雜擾

另構一室於機靈橋因曰天香靜室今廢

施王廟 在顧家浜之南地屬長水鄉俗稱四轉池

創始未詳 國朝乾隆年間漸恢其制


寶華菴 在幽湖之東北建于前明仲改菴有憩寶

花精舍詩本僧院也近住女衆

永福菴 在嶽廟北元濮鑑建僻在鎮東北極水竹

之趣

西泠菴 在翟家園北明建



津梁

濮家塘 鎮後運塘自萬壽山抵阜林南宋時有司
廉濮氏富厚諭令覓築以便行役至今沿塘堆阜
皆壘密燒磚處阜林抵石門稱卜家塘亦然北塘
帆影遂為一景

濮家堰 去院東北三里長生橋外地高涇淺因設
是堰以為捍障不至高鄉水竭時長安無壩杉青
有閘一路諸堰亦以護閘而不使運河洩也鎮東
北皆濮氏庄田堰故濮氏所置因名濮家堰嘉靖

中尚有堰石以識其遺基

濮院河

前後郡志俱不載惟李侯秀邑志稱霸宿

西區有濮院河二一長二百丈水從桐鄉縣界來
下從扒灰澗出灌田二十頃一十畝一長二百一
十丈水從朱涇港來下從迎春橋出灌田二十七
頃六十三畝三分

梅涇

古沿是名元皇慶中濮氏植梅數百株略復

古勝鎮稱小羅浮焉由語兒橋以南是也

幽湖

水從岳家墳來出迎春橋去支流環錯匯為

深淵幽不可測故名幽湖元時名園四列畫船簫
鼓無虛夕人因范少伯來此謂為五湖之一者非
十錦塘 在市北莊涇上由東達西里許春日桃李
交妍秋冬蓉菊繞岸近塘皆濮氏庄房故闢此路
以為勝遊近則一望桑麻無復昔日之舊

莊涇 由十錦塘以西兩岸皆濮氏庄田故涇以莊

名又有莊涇浜在涇之南

碓坊浜塌坊浜 皆在元明觀南為濮氏碓米塌米
之所緣浜而列便舟運也

新開河 自靈官橋北至迎春橋皆是明景泰中大

旱撲宗淵發粟五百石募役濬河以便行舟宏治

中尤旱復捐米千餘石自南幽湖濬至運塘水得

以不涸當道義而旌之

九曲 自輔弼橋東過圩匯國界橋吳越分境處也

通長水抵郡城南俗稱腹裏

梧桐涇 自鎮西達桐邑之涇地屬梧桐鄉故統稱

梧桐涇

按以上水道一鎮之水利存焉舊志云古有堰置
于塘北涇口因塘北地卑而涇深塘南地高而涇

淺故堰以捍郵運河而使上塘支流不至涸竭于
時長安無壩杉青有閘江淮漕運舳舻相接達於
錢唐開以積水使常盈堰以護閘使不竭水利之
課由此而出今則堰閘俱去吾里適處中壤上無
須壩下無須壩田最腴三方阻水俗呼為斛底裡然
為力故涇上水者十之三而苦旱者十之七蓋既
上潰下涇苦水一遇旱魃為虐惟資運河以灌以水
無大澤涇水又遇旱魃為虐惟資運河以灌以水
車庫各涇之水又不足則相率以庫運河之灌以水
涇內而分注之各區洪港稍高者竟有不到之患
考未郡言水利者自晉建武中高者竟有不到之患
君領其事溝洫之修遂成沃壤隋大業既開漕渠
天目之水分流鄉井五代錢王鏐募卒撈淺通南
北河之底鋪石猶有存者宋熙豐中置農田水利
使於浙右而崇德長官以主官運河堤岸繫樹蓋
甚重也明初因地分區以興水利區之高阜者為
東南低窪者為西北皆以運河分別之各區設水
利耆老嘉靖間革去耆老專以殷實良民詣曉水

利者為之名曰塘長近不復設遇歲旱專事開濬亦蓄水之一法此則鄉賢里老皆可任之惟在當事者有以誘掖獎勵之耳

永樂市河 在鎮中水自妝橋繞大街西達北橫街入廟橋河故道雖湮尚有橋址岸石在居民房內俗所稱百丈河是也

油車匯 自雷家潭東岸轉南自南而北至新橋一帶捻以油車匯名之明萬歷間修葺桐城以邑之大戶分任其責楊菊賓傾捐岸石百餘丈以急公龍潭 福善寺四周皆水西北隅曰龍潭向有是名

寺僧佛眉題其寺曰龍潭福善禪林且以名其集定泉 在鎮北定泉橋下相傳此處大旱不涸由此逕北直抵運河

五道泉 在陸家橋大墻宅

洗碗池 在西觀之南有東西二池池圍畝許為庖人洗碗處今已就湮陸姓者居其上每掘地得甕器蓋濮氏廚房故址也

五池 在翔雲觀福善寺後五池相連至今尚在元時濮氏遍植荷花八景所稱荷塘晚風者也

西池 在定泉坊與東池相隔里許東池即五池明
季嘗撈得太湖石鷹石石鼓凳欄杆等物西池已
塞今為巷

連三池 近幽湖元朱顯道環碧堂故址

延年井 在福善寺內僧明修開創里人捐資助成
之蓋亭其上顧太史南樓作記

南新街大井 濮氏鑿有井亭以便往來取汲

積慶橋 餘慶橋 廣寧橋 德慶橋 舊志所載
有此四橋之名今其名盡易莫詳其處

碎金子橋 相傳為市東市河上小環橋濮氏建寺
觀工已又出餘金築此石橋頗嫌零星戲詆為碎
金子橋遂沿而呼焉後潮失雅因鼎修者有四擅
越更名四君子橋反失古矣今亦無攷

過安橋 在鎮西因北有棲鳳橋濮鑑以犯祖諱過
之不安另建此橋以通往來名曰過安今訛為固
安或作顧安

雙賢橋 在鎮南濮樂問既築桐香室於橋左延楊
鐵崖宋景濂課業其中并以名橋岳和聲記其祖

墓訛為桑園非也

渡船橋 因渡船匯而名之也至元間濮氏築庄匯

東因減其渡而為橋後里人重修改稱大全橋而

俗尚仍渡船之名所謂渡船漁市是也

濮九娘橋 在十錦塘西九娘早寡克勤積而能散

垂暮傾儲以建即以人名以名其橋朱太史竹垞

詩云舟移濮九娘橋宿夜半鳴梭攬客眠

思家橋 明初濮氏分遷後奉詔還里因建此橋以

慰其本

在鎮南

梧桐橋 在福壽寺西濮雲翔建又名多福橋

大有橋 大積橋即今新橋大德橋即今廟橋皆濮氏所建

以通永樂市廟橋製甚佳而古或即積慶德慶之

故歟

梅涇橋 在梅涇有菴亦宋景濂讀書處

鳴鳳橋 在院西濮愛川建

會龍橋 亦稱長木橋李懋華建 國朝乾隆年間

其孫贛州守枝昌重建上可望硤石山頂浮屠

聚星橋 在梅涇上陸星聚建

迎鳳橋 亦名塌坊橋里人戴陳瑛重建

陸家橋 在人和坊里人張氏重建

按鎮上橋如前所紀外如靈官昇平橫板東安語
兒幽湖談家莊橋西成之類即有修建大縣自宋
元以來有之而張家楊家秀桐太平萬安萬興等
橋踵事而增者其創建之始俱不可考至于鎮之
四隅散建村落者未
易枚數概從略云

棲鳳橋 宋李漢雲翔建


朝陽橋 元李漢氏建後里人重修

北柵 鎮四隅各有水柵向以禦暴承平日久廢弛

不講惟各水口橋下設橫木而已 國朝乾隆丙

午里人追復舊制北河植椿添設柵房募人啟閉

按李日華建郡城各處水柵議曰嘉禾郡城四面
皆水當差官查有小水接連大水處而邊密釘椿
木四五層其木務必須粗大牢壯中留一口作門
一扇或兩扇通船往來鐵鏈巨鎖晨昏啟閉金點
附近嚴實之人編定工食從厚給與仍於柵之內
右各處橋梁仍舊安置橫木以時啟閉此後即有
于盜能斬柵而入者柵之人力不能敵者亦可自
大盜能斬柵而入者柵之人力不能敵者亦可自
禦陸路之具又于第二層內柵邊喝教呼集居民為
發哨助其聲援所謂重門之險也此議自可施行
吾鎮水口莫急于運河就東北而論若陡門之迎
春橋水口莫急于運河就東北而論若陡門之迎
外因法而為之樸家堰西則妙智渡南則幽湖以
自不致深入即得入而別口之柵又不易出擒捕
為易思慮豫防莫切于此



坊巷

濮院坊 市北濮氏正宅前之門坊也舊圖在福善寺之東翔雲觀之西相傳國初猶有石柱存焉宋少宰濮斗南告歸理宗賜其地曰濮院因建大坊以標其盛此濮院之名所自始元末與宅俱燬

元帥坊 在鎮北定泉橋左今無考

貞節坊 在市中明洪武二十一年為濮宗海妻劉

節婦立

貞節坊 在朴樹灣洪武二十六年為濮貴一妻劉

氏立令廢舊志稱朴樹灣今無知其地者按圖當在今大街東濤岸左近

旌表亭 亦在朴樹灣貞節坊右亦為濮貴一妻劉

氏立嘉靖中倭寇焚民房亭燬

貞烈坊 為鮑文化妻濮氏立文化死殉節嘉靖中

奉 勅建坊於桐治

解元坊 為永樂癸卯科解元楊述立北橫街俗

稱楊家牌樓今廢

父子聯芳坊 桐邑志在鎮今無考為解元楊述景

泰辛未進士楊青立述為明代開國解元青為桐

鄉開邑科甲俱出我鎮並萃一門誠盛事也

人和坊 在白雲堯明萬歷間桐邑令胡舜允命名

濮襄甫稱其父侍涇語曰予雖草野散人蒙桐令

胡公許予謹約錫桑與梓曰人和曾築草軒內供

大士公顏其軒曰鄉約所

浙右名山坊 在福善寺西巷門對水步西向正統

戊辰立

江南福地坊 在福善寺前南向亦正統戊辰建後

寺僧鶴峰修牌樓去其額旋廢

舊二十坊 福地樹德象安花園零東莊涇人和南
河定泉鶴栖西河義路大街雷家嚴匯寺後過安
南新洞橋集慶凡二十坊而樹德即翔雲西河即
鳳棲大街即忠義雷家即杏林
今坊名 本境東河零東花園象安翔雲福地寺後
人和仁和凡十而零東寺後又分為二皆屬秀水
南新洞橋固安西河南河永安鳳棲地字號凡八
皆屬桐邑蓋本境即莊涇定泉鶴栖歸鳳棲義路
歸西河大街雷家嚴匯歸地字號集慶歸洞橋

按舊二十坊為三月三日佑聖會設也今十八坊
為三月廿八東嶽會設也今十八坊
里俗相傳鎮分五字號二十坊每坊鰲山臺閣若
千座香亭若干座絲旗若干首金聲相繼繡蓋紛
擎馬上鼓吹六名絲竹樂工各八名或十名金鼓
旗前先用粉牌二面各書某字號某坊以導之迎
燈則用五色輕紗製方燈一色成對如牌面名牌
坊燈亦用紙刻字粘某字某坊以別之迎佑聖會
祈年于元帝也迎燈祈五
穀豐登也今此風尚存

為鎮人建牌坊

飛騰坊

為成化乙亥節坊為馮倫

黃甲聯芳坊

為楊青趙讓沈繼志錢貢三錫誥命

坊

為馮致父倫以上建於桐邑

進士坊

為萬歷癸未科立貞元際運坊為嘉靖甲子

內樂元聲鎮人

立

科舉人立內

馮人魁元獨盛坊為萬歷壬午科舉
為萬歷壬辰科立內樂元聲鎮人
際盛坊為萬歷辛卯科舉二十八宿坊為萬歷丙
內陸塔別有洞天坊為朱以上建於郡治
鎮人鮮元坊為元延祐丁巳俞鎮天歷庚午吳琪元統
用建於石門進士建縣治新興街為景
節孝坊九一建妙智汎塘北一建正家橋汎塘北
貞節坊一建門俱汎塘北二建門嶽廟西
節孝坊一建本鎮十錦塘
詳壺範

按鎮上坊表有名無實惟貞節建于運河之上以
備採訪而鎮之以坊名者皆巷棚耳歷年以來各
坊添設柵門不一而足擊柝巡警可謂嚴矣然皆
催募貧民工食稍儉不免廢弛結甲之法又不肯
實力奉行一遇迎燈賽社諸事反踴躍樂從每坊
各自科斂篇中所述舊俗相傳祈年祈穀之意不
敢聚行刑罰却蓋張而不弛文武不為惟于吹曲樂
蜡之餘即寓整理保伍之法至於顧名思義表章
潛德三代人心去今未遠尤同里
之人所當加意故附各坊表於此

厨庖衙 在陶家橋北

颶榨頭 在萬興橋西南漢氏釀酒處撲明遠云旨

酒雖饒莫效晉周伯仁百日醉止三日醒猶樂之
亡國也宜勉之哉

墩頭上 在南新街有大井為濮氏所鑿上有井亭
以便往來取汲又稱水架頭皆廚房故址

太平巷 本福善寺西出正道

花園街 以濮元帥園得名

大街 即永樂市元時濮氏立四大牙行收買土絹
以待四方客販濮綢之名遂通天下

南新街 明時屢舉佑聖會稱極盛天啟間中止坊
內居民樂輸斃石廣長平坦整然一新仍名南新
化壇街 由南新街至化壇巷有街半在田間 國


朝里人重修有記在巷內

石條街 自泉安橋南至陸家橋今所稱濮家場者

即大牆濮故址也街甚長 國朝乾隆乙巳里人

戴陳瑛重修

按鎮上街巷如南橫北橫廟橋義路元時已著名
外其餘命名有曰卧龍曰集慶曰鶴栖曰柳岸曰
語兒曰橫屋曰蠟作曰大有曰東新曰寺街曰觀
街又有雷家潭歸家灣王家灣嚴家匯國安街之
類皆屬通衢其餘小巷尚多 國朝乾隆年間里
中各自修整皆如破矢後之人嗣而葺之誠盛事
也



園圃

濮元帥園 在翔雲觀後元帥名銳濮扶妻子至大
中建功郎泰定間復起為元帥北征還建以自娛
雪廬和尚贈以詩今已久廢而花園衙之名不改
濮司令園 在幽湖西岼山礪樓臺無不雅潔元時
為幽湖之勝觀有蛇蟠石見黃玠詩朱竹垞詠為
即今徐太僕祠舞蛟石也白雲菴東尚稱東園門
疑因此

百畝園 在鎮南野畝橋西濮氏草盛時之菜園也

減獲數十人隨時種莠以供厨用園以茂竹供給
春筍縱橫夾路旁植桃李橙柑故蔬果應序無缺
今雖分屬雜姓而百畝園之名不泯又有晒醬臺
今無考

小桃源 在幽湖東北

鍾家園 在北河相傳有老梅樹一枝為前明俞園
故物歷二百餘年俞氏莫考梅亦無人知賞里人
有見之歌詠者今荒陂野渚間并老梅亦不可見
而鍾園之名尚存

叢桂園 在定泉橋左濮樂閭所構栽桂千枝與魏
塘顧阿瑛海棠園爭勝

劉園 在莊涇之南有池畝許池上有亭榭周池塘
有石坡每數步一隆起有峰岩之致書屋錯置花
廳屹如蓋劉別駕所葺也

馮園 在方伯宅後文學開甫所葺也池塘臺榭制
度宏敞飛樓湧閣竹木翳然

王園 在南新街外軒閣亭臺規地繡錯鑿池種竹
名流雅集一時之勝云

楊園 在莊涇之上園中多梅間植他卉池塘書屋結構雖不甚大而竹木週遭槿籬常著紅花西偏則圍以黃石牆已臨野外每從野外望之黃牆一帶掩覆叢篁常有呬唔聲徹牆外昔鮑仲孚有林墅書聲詩題仿佛似之

劉園 在吳涇之東文學明徵之所築也兩面臨流西面鑿一池與外流隔一岸又如三面臨流矣南面竹徑相夾而甚紆入徑中者如在山谿間隔流有圃多植梅以一小橋接之曰東園西園有西府

海棠一本大數圍枝楊數仞從數里外望之輒見紅樹一叢

趙家池 在王園之南池廣於園故以池名 國初沈文學臨池讀書以白蓮種池中歷歲弥盛鎮上談蓮者池者恒屈指趙家云

勺園 園中有池故以勺名言小也構書屋於其上每一處輒數楹旁地多植嘉果吳選部之別業也劉園 在吳涇之西多植橙橘間以梅桂竹林臨流大是佳境橘有蘇林一種味美而無核俗呼塘西

橘是也此種屬荔枝土宜移植輒變而此園獨不異荔枝亦一奇也

陳園 在翔雲觀後竹木護其後池塘漾于前中構書屋錯置花屏陳文學嘗讀書其中一時從者如雲以為雅集云

陸家園 有二 國朝以來詩人詠陸園者甚多傳

聞園中梨花最盛

南園 係牌樓下沈故址

趙家園 朱家園 徐家園 以上昔為里右園池

今盡析為民居然其名不廢民居每一園為一園多至百家少亦不下數十家

漱漱芳園 在化壇巷西處士李懋華建仲改菴有

八景詩

甌香園 仲改菴建在石條街東今廢人稱其地為

仲家園吳江徐崧題曰甌香園在梅涇仲改菴別墅也仲子四十蒞仕五十歸田即築圃于池上布衣疏食讀書其中日與友朋賦詩倡和自耆艾以迄大耋未嘗輟筆墨之樂一畝方塘千竿修竹意

豁如也有甌香園八種書行於世

顧家園 在鎮西北

狄家園 在寺後坊狄為濮川巨姓即建西觀者

孟家園 在衆安橋東

東荒小圃 在長木橋東施翼聖別業

菜畦 在固安橋西周緩菴別業

莊家園 莊蟬菴家小圃有海棠二樹 國朝康熙

間諸名士多見諸題詠

也莊 在濮九娘橋北沈氏塋也有永思亭為節婦

沈廷聘之妻夏氏建松竹陰森有釣魚臺

恂慈居 在集秀菴後孝廉方莖園別墅


東楊家田 自語兒橋南至立關菴桐鄉縣廿九都

三圖百畝有零明楊小峰之故業也田畔屋數十

間今所稱橫屋者是

西楊家田 自洞橋南至化壇菴前後左右皆是俗

稱西田畔是也



祠墓

永安祠 即鎮火菴在大街南北向明成化中濮松
鼎新之殿後佛閣供宋元明三朝濮氏祖主於其
上凡子孫有大舉必祭之崇正丁丑鎮人忽嫌鎮
火之名因改名天乙菴欲私據焉濮氏聞於官旋
得復故今已燬廢

郡侯鄭瑄鴻達復永安祠公案曰審得普潤之住
永安祠乃濮氏之家廟也鎮以濮院名政以濮氏
之先有濮振濮鑑者為宋元兩榜人及披全志讀
趙孟頫墓碑俱載有永安祠迨至國朝易姓改
物而此祠歸然無恙正以濮姓子孫繁昌元宗無
容移易也當高皇帝辛卯歲則有永安祠匾額世

廟平世則有水月慈觀區額而鎮火菴一區則自
元迄茲所從來舊矣此祠世以宗子掌管完糧先
是漢氏鑲父文昇以生員董祠事廟貌儼然區額
如故昇隨父遊鎮以藐爾幼孤駒齒未脫雖有食
牛氣然乳臭何知潤以藐爾幼孤駒齒未脫雖有食
制也輒弁髦其孤報集異姓援引為非漢氏之訟
亦短於不得已乎潤又不自悔禍且待其富以
將先賢神位塑像木主歲滅無迹控稟本府易以
天乙菴之額蓋欲奪漢氏之孤故欲滅先賢之祀
也及審潤無別詞止言有大力者不敢輕言其故耳
姓名潤將先賢神主塑像扁額而不敢還其故地併
令斷潤將先賢神主塑像扁額而不敢還其故地併
潤師所遺鐘鼓什物交單清查付一還其故地併
戒行者主其事潤應逐出不容復居祠內恐後別
生變異大為
孤落之害也

輔氏祠 宋輔達慶源人南渡家桐邑之永新向屬

崇德輔廣其子也有祠在鎮之西其子孫尚存

世宦祠 在幽湖南朱氏家廟也祀宋元明及本

朝通籍之祖故稱世宦而孝義恢復亦得配食焉

按祠內未主祀

宋尚書右僕射兼翰林院侍讀中書侍郎謚忠肅

朱勝非

宋恩蔭國子監兼翰林院左右供奉元奉詔贈宣

慰使提督萬戶府四府都漕運晉秩中衛大夫朱

智

元宣慰使提督萬戶四府都漕運兼理宣政使中

衛大夫詔封刑部左侍郎加三級朱清

元賜進士出身歷仕刑部左侍郎加三級明詔贈

雲南道監察御史加一級朱釗

元廢藉襲宣慰使總督萬戶府四府都漕運兼理

海上軍務都元帥府事朱虎

天

元樞密院判官同知樞密事加一級朱完
元樞密院判官同知樞密事加一級朱完
朱陽谷
元萬戶府協理海防正四品加二級朱大德
明雲南道監察御史正三品奉命監臨會試朱大
適
明尚寶司丞加一級朱大遠
明恩授承德郎元萬戶府萬戶協理營田司正四
品朱得全
明太僕寺主簿朱得良
明善兼翰林院檢討楚府左長史朱璠
明禮部儒士候選內閣掌典籍事誥勅撰文中書
鄉飲大賓朱璠
明成化丁未科賜進士經筵日講官起居注右春
坊右贊善兼翰林院檢討朱絳
明禮部歲貢士江西廣信府儒學教授待贈文林
郎鄉飲大賓朱萬里

明歲貢元昌化縣諸贈總督兩廣兼理兵務糧餉
兵部左侍郎右副都御史朱萬國
明禮部鄉進士萬歷己卯科亞魁欽定知縣朱治
貞
明恢復宗祠有功奉例配享列代顯祖待贈文林
郎朱治經
明提督兩廣總制兼理兵務糧餉兵部侍郎右副
都御史朱治憫
明朝康熙壬子科禮部歲貢士欽定儒學教諭纂修
明史朱治恬
待贈文林郎明奉旨訪舉孝行第一恩准貢士朱
日昇
鄉進士康熙己酉經魁揀選知縣署金華縣教諭
事朱鳴吉
誥贈懷遠將軍都司僉書正四品加三級朱克孝
欽恩訪舉賢良郡庠孝義首推恩准賜額奉例入
祠配享朱克綏
誥授懷遠將軍都司僉書管山東東平守禦府撥

國

運兼理印務事加三級奉光國

陸公祠 在鎮北新陸菴公孝友清介為石埭縣令
有惠政無子公舉於鄉得崇祀而祠中肖公像及
夫人項氏像蓋此菴檀越也

程氏祠 在翔雲觀後程士樞宗祠也今廢

李氏祠 即漱芳園李懋華肖像其中祠凡三楹前
有石坊

按宗祠之立所係最鉅而吾里獨寥寥則宗譜不
講之故大約有譜之家十之一二而有祠之家十
百之一二非有力者不能辦且無以善其後也姑
述所見聞以為勸祠法當自譜法始矣

濮郡馬墳 濮奉鑑係濮鳳之元孫宋淳熙中選入

安王府為郡馬墳在今唐夫人橋

按鎮西有南宋橋相傳鄉人鋤地掘得濮駙馬墓
碑而舊志絕不載駙馬墓所在姑識此以俟訪

濮侍郎墓 在桐鄉之五都此地舊墳書識濮公墓

甚多皆從古墓附及者

輔知州墓 在經堂橋屬桐鄉宋泰州知州輔達墓

明崇禎間有欲侵奪者其裔孫訟于官至今得
緝古墓康熙四十年撫督郭世隆檄縣訪求欲為
表揚知縣劉瑄竟以無迹申覆事遂寢

按烏青文獻載永新鄉有先儒輔慶元墓則誤達為廣矣蓋因慶源輔氏而誤廣墓自在桐治西

漢提舉墳 在福壽寺西趙文敏謨墓誌

石家墳 元廉使石朝用有墓在鎮西南石家墳橋

俗訛為石蟹墳橋

雙節塚 元季唐氏龐氏濮彥仁妾也遭家難自殉

合葬鎮西梧桐涇上有橋曰唐夫人今圯

燕家墓 在長生菴之右

劉氏墓 在吳涇之東北墳木陰森延數畝許中更

多植木樨里人賞桂者輒至其處累歲攀折不盡

岳家墳 在雙賢橋之西明岳元聲祖塋也碑尚存

相傳岳氏延墓師得此地許以後人當大貴後元

聲兄弟三人皆成進士致通顯舊有大松一株亭

亭如蓋畫家嘗於橋上摹繪今亦亡矣

夏墓 與劉墓相左右亦有桂資里人採摘

項墳 在吳涇西北隅

楊解元墓 在鎮北楊家橋墓明遼府長史楊述其

子河南按察使僉憲青祔焉石馬及碑尚存碑係

天順四年九月四日詔誥之文及遼王賜祭文

楊墓 在大旗村之西不起墳築三和土於地下後有欲掘以為田者堅不可鑿而止

馮贈公墓 在集秀菴西為馮方伯孜祖父兩世墓也方伯父倫早世母張太夫人以節孝稱堪與家以此為吉地也

施墓 即翟墓與馮墓相前後孝廉施有恒祖塋也馮墓 在零東坊之東南

石埭縣知縣陸公墓 在楊家橋西范家浜即吉菴先生及其夫人項氏墓後人有發之者遇蛇虺而

止今宰木雖斬伐無遺而孤冢幸存

三角墳 在會龍漾之上相傳古墓莫考其姓

施墓 江西布政施爾志父乾墓在鎮西北

濮鑑祖墓 在嶽廟後

濮汝陽墳 在鎮西俗呼奶娘墳

張氏墓 一在居家灣東北一在榻坊浜惟存高阜

党太尉墓 梅涇之東為劉氏墓附近有石表稱党

太尉墓舊志無考里人猶有稱党將軍者今石表

已不可問恐遂湮沒存所傳以俟訪

王總管墳 在長水鄉圩匪之南墓址墳起數丈延
亘數畝莫詳其名惟郡西門內有王總管廟稱其
死高田賊難祠旌忠廟

朱長史墓 謂楚府長史朱綬墓在幽湖東


吳烈婦墓 烈婦幽湖人墓在陡門塘南乾隆三十
一年郡中仁親葬會舊地墓之表曰烈婦云

化壇 在鎮南桐鄉縣界宋元相代間暴兵所經枕
屍徧野濮氏設此壇以化無主之骸元鮮于樞有
吊濮氏化壇詩地本有菴名淨土後即以化壇稱

之

祭壇 渡船橋東有祭壇在秀水界化壇設後又設
此壇每歲清明中元十月朔濮氏盛時必延戒行
高僧禮懺舉祭稱盛典云桐志云鄉屬壇每鄉立
一壇以祭無祀鬼神今濮鎮猶有祭壇故址

按古墓至宜表章濮鎮古墓甚少其在鄉村者又
易湮沒即如楊長史墓郡邑志皆載彰彰可考且
近在北河石馬碑跌尚留荒坵而閭棺槨竟同
無主廢塋一旦碑馬俱湮誰復過而問乎聞長史
公子青無後而其族猶振
有志之士宜為修復也



古蹟

檇李城 春秋定公十四年越敗吳於檇李杜預注
曰檇李吳郡嘉興縣南醉里城公羊傳作醉李漢
書地理志云由拳縣柴辟故就李鄉吳越戰地應
劭曰古之檇李也越絕書作李鄉又曰更就李為
語兒鄉水經則曰辟塞亦曰柴辟亭馮具區郡志
叅考云濮院即古檇李墟有濮元帥別業在焉湯
昆陵嘉邑志稱檇李城去夾谷一十五里桐邑志
云檇李故城今濮院西南郡志云府治西南四十

五里舊經云城高二丈厚一丈五尺宋黃省曾橋
李城讚序則云在郡治西南三十里本覺寺南距
濮堰北倚新城則在鎮之東北矣寺中有東坡三
過堂閩人林應亮嘗題曰橋李遺踪

按橋李自漢以前未有城名漢地里志但曰鄉曰
戰地而已晉杜預注始曰醉里城而繫於嘉興縣
南後人核其所存亦約略之詞耳至橋李之地所
該甚廣故自唐以來咏橋李故蹟者皆就一郡大
縣言之原非指一處也城已久湮無從考核故址
姑列序前人所述以為古跡之首至以今之郡城
為古橋李城則非矣

橋李亭 在梅涇南四里向有草庵相傳此名

按橋李亭前人吟咏甚多然亭在本覺寺而鎮亦
有是名者蓋均屬橋李皆得以此名之猶橋李橋
耳之類

柴辟亭 在橋李城西越絕書云語兒鄉故越界名

曰就李吳疆越地以為戰地至於柴辟亭又云柴

辟亭到語兒就李吳侵以為戰地

辟塞渡 在柴辟亭西亦吳越時渡名越絕書云吳

古故從由拳辟塞度會夷秦山陰辟塞者吳備候

塞也

南長營 在橋李城西南隅

烽火樓 在南長營東

長水 在鎮東南秦始皇東遊聞土人謠曰水市出天子從此過見人乘舟交易應其謠遂發卒掘汙其地謂之囚僂謠為由拳徙於橋李之北四十里即今郡城也

語兒亭 在語兒橋左右有此亭廢復不一宋德祐中濮振重建并葺其橋後人以濮氏嫁女梅涇之東故建此橋以通往來遂訛為女兒橋蓋亭之廢久矣

按語兒亭即越絕書所云女陽亭也句踐入宮于吳夫人從道產女于此亭養于李鄉句踐勝吳更名女陽更就李為語兒鄉張元成秀州志云三國吳黃武六年正月獲彭綺是歲由拳鄉有產兒墮地即能作語曰天明河欲清脚折金乃生因詔為語兒鄉朱逢吉云夫差督兵拒越時溪人有生子能言者而吳兵適勝遂命名語兒鄉嘉邑志又有西施同范蠡三年達吳生女之說前人已辨其非所謂語兒當是禦兒之誤國語句踐之地北至禦兒鎮本屬崇德宜有是稱又按石門語兒中涓一名語溪今所稱沙渚塘是也唐乾符中石經幢亦曰嘉興縣語兒鄉在今崇德縣東郭下故凡詠語溪者多指石門獨唐徐凝語兒見月一絕有經過草市憶西施之句則吾鎮有自來矣

范蠡塢 在幽湖南有戡兵塢洗足灘等蹟舊經云

塢水陂也在顧村范蠡曾遊於此府圖記云即古
槁李墟也桐邑志在濮鎮相傳少伯泛湖同西子

過此即今幽湖一帶俱是

按濮侶莊云范蠡湖在幽湖南曲少伯功成後載
西施出五湖以居此舊所傳槁李城南是也故西
子妝樓因誤以城南金明寺湖為范蠡湖且郡閣下象
城因誤以城南金明寺湖為范蠡湖且郡閣下象
笏緋袍遺像實宋丞相史彌遠也開熙中丞相構
地居醫僧壽萬玉于此故遺此像并誤以為范相
國像矣據此說是湖亦在鎮不在郡也

西子粧樓 在市今有橋曰粧橋八景詩題所稱
粧樓旭照是也郡城亦有西子粧臺圖記在金明

寺前張堯同所云一奩秋鏡好猶可照西施指此
胭脂匯 在百丈河即粧橋之南元志屬崇德縣蘇

平有詩府圖經在濮院朱竹垞詩注去郡城三里
非也袁志則云三十里

按范蠡載西子之說相沿已久故吾郡故蹟如范
蠡宅傾脂河學繡塔之類不一非獨鎮上諸蹟也
但三年達吳羈泊有之而謂功成以後載以俱泛
此承一舸逐鵝夷之語而誤幾以少伯為申公巫
臣矣有是理乎吊古者毋徒襲其說也

六萬涇橋 鎮東南有草蕩極廣中有阜土百堆高
皆丈許傳為子胥練兵之所衍陳所置鄉人鋤去

久則聚峙如故近蕩有六萬涇橋宋宣和初統軍
王子武戮方臘寇六萬於此故名鎮西南八都並
崇界九都又有西草蕩循是而管城何城晏城營
城烽火樓柴辟亭皆在大抵鎮之西南自石門以
及海昌一水迤邐而分南越北吳備禦要害皆在
此際

梧桐林 鎮之西偏曰梧桐鄉西寺前有梧桐橋初
因夾岸皆梧桐林故名宋濮鳳以鳳棲梧桐卜居
於此後建縣遂名桐鄉

西溪隱居 桐邑志云元鮑恂常居千金梧桐二鄉
與貝清江程柳庄結社於濮鎮秀治之西溪陳心
隱詩地名本是古西溪鎮東有隱居菴

按鮑中孚由崇德徙西溪天台徐一夔為之作記
云去郡三里有地近城府之語似不在鎮中孚有
濮川八景詩題其結社于濮川可信而所謂秀治
之西溪未能的指何地也至舊志又有鮑陋隱居
疑即鮑恂之謫或以為別有鮑陋亦元人為嘉郡
學博考晉孫思之亂海鹽令有鮑陋者遣子嗣之
追賊而沒故海鹽有鮑郎浦則陋乃晉人所謂學
博者無從考也

翔雲石 在元明觀後濮氏園中物也相傳此石嘗
有五色雲起故名高二十餘尺玲瓏奇幻後失所

在

按家乘翔雲石考曰翔雲石在元明觀之三清閣後石高二十餘尺聳峭玲瓏相傳為五代間物天將雨輒見五色雲翔其頂周冲宇志草中謂宋朱勔取供花石網至岳石鍾修元明觀山門碑記又謂張士誠昇去及按楊鐵崖額元明觀山門猶曰翔雲勝境且傳明之公依石為園則其失於明季而非失於宋代明矣附考宋史徽宗崇寧四年上垂意花石取浙中珍異以進朱勔搃花石綱應奉局于蘇州搜巖剔蕝凡士庶之家一木一石稍堪玩者必撤牆毀屋以出翔雲石因是而去周志豈無據而云然若張士誠初路一隅正值兵戈雲擾之時豈遂清宴及此提舉公策園或憑餘石鐵崖題扁聊識遺踪供未可知也

雲泉 即翔雲石故址從石穴涓流味甚甘冽居人

常賴之嘗為土湮塞疏之即流如故

趙文敏墨蹟 在福善寺正殿樑上大書建寺檀越

濮鑑一力蓋造等字於今仍在

管夫人畫竹 在福善寺元時寺初成趙子昂偕夫

人管道昇來遊畫竹於殿西粉壁遠近稱為勝觀

或云在兩耳房今無考

大梓 在南新街大井之北宋以前物也舊圖有之

讀書臺 在梅花涇西元濮樂閣建宋瀟讀書於此

今東有梅涇橋西北有雙賢橋謂潛溪與鐵崖也

又有梅涇林屋亦潛溪遊息處

桐香室 在雙賢橋南本濮樂閣讀書處其子仲溫
好古嗜學雖居官不輟後棄職還家增築精舍延
楊鐵崖課業其中楊為作記宋景濂書讀書敦教
額懸室內里中沈氏尚寶藏之

松月寮 在化壇東濮仲溫建公歸里角巾道服
別墅植松數十株松風明月嘗鼓琴其中自號松
月道人

餐玉居 亦濮氏別業在渡船橋東不可考

碧月亭 在幽湖橋西八景所謂幽湖月滿是也今
為積福菴

寶井 即俗稱金銀麵杖井也在洗碗池上相傳濮
氏女投井時先投諸寶器於下每月夜陰天輒有
異光騰上犯之者多病

蛇蟠石 濮樂閣園中物元慈谿黃玠有詩朱竹垞
以為即今郡中舞蛟石也



漢鎮紀聞卷二

人物

里人胡琢其章述

鄉達

宋

濮鳳

字雲翔曲阜人與弟鳳字雲隱俱仕宋由貢

入仕為著作郎兼羽林中護衛護聖軍右騎尉駙

馬都尉初居廣德建炎三年己酉帝如杭州鳳悉

以家產讓弟居之從仕臨安後居語溪之梧桐鄉

謂鳳樓梧桐事有適符故即卜宅於此遂為開鎮之始生六子長梧字楚玉河南中都路左衛指揮使同轉運事次桐國子監學歷官太尉三禮温州司理四棣字楚瑤以子輝國貴封儒林郎五梓學正六榛由武學博士官至朝散郎知廣德軍

濮桐 改士葵字悅中國子監學錄歷官太尉工於詩與梅溪王十朋善王集中多和韻詩稱為提舉蓋其所歷官也其和牡丹十絕句有金枝玉葉之句故以為宋之懿親云

朱勝非

字藏一蔡州人上舍登第陟歷州縣靖康

初為東道副總管權應天府其外舅乃張邦昌友使持檄至勝非械之以聞康王在濟首往詣言南京乃藝祖興王之地請幸之以圖大計遂定策命試中書舍人兼權直學士院時屬草創憑一敗鼓單改元制辭氣嚴正人咸服之疏言仁義者天下之大柄中國藉以持之則四裔服而諸夏自尊高宗嘉納之總制使錢蓋進職勝非封還錄黃建康二年除尚書右丞言宰執蔭叙謬濫俄遷門下兼

中書侍郎帝南幸為控扼使三年拜尚書右僕射
同中書門下平章事兼御營使苗傳劉正彥作亂
保護之功居多復辟面請罷政事薦呂頤浩張浚
自代授觀文殿大學士知洪州尋除江西安撫大
使兼知江州頤浩力引復其相位會久雨累章自
劾遂罷五年應詔言戰守四事起知湖州與秦檜
有隙廢居八年卒謚忠靖所著有秀水閣居錄三
卷蓋居鄉時所作也

朱名佚 思明父也仕宋為文林郎侍科院官居濮鎮

之幽湖西

濮輝如 字光文光宗紹熙四年癸丑陳亮榜進士

仕至延平府知府

濮輝然 官承坊誥謚

濮輝國 字光遠孝宗朝為樞密使

濮法堯 華亭判官

濮贊堯 光宗朝仕承仕郎

濮萬鑑 字懷珍國學榜元任福州長樂令

濮奉鑑 梧之次子輝然之孫法堯之子也官招討

使選入安王府為郡馬

濮蕙鑑 字懷琛廣州食判

朱智 恩蔭國子生兼翰林院左右供奉元誥贈宣

慰使總督萬戶四府都漕運晉秩中衛大夫

濮斗南 原名徐涑檉之四世孫也仕寧宗朝為舍

人乙酉理宗即位擢為吏部侍郎賜坊於宅之前

題曰濮院所著有諸經說

濮世昌 字公亮寶慶二年丙戌賜禮部進士九百

人名與其中仕為承信郎

濮煒 字公耀國子監博士

濮振 原名振垂字仲聲號麟石世昌子鑑之父也

咸淳中舉鄉進士仕為承節郎兩浙兵馬副都監

好客廣交多構宅第遂成聚落家有吉藹堂百客

樓以館游客一時名士爭往依焉遂有占籍為家

者長子孫繁族姓焉

濮恩垂 字叔沾仕龍神衛四廂指揮使

元

濮鑑 字明之仕淮安路屯田打捕同提舉

濮允中 字樂閭元季仕承事郎兩淮鹽使司令

濮彥仁 字仲溫元至正中仕吳興典市官

朱清 為防海義民至元十一年參政董文炳遣招討使王世強招之伯顏既平宋遣清載宋庫藏圖籍自崇明泛海入大都授千戶時東南漕運維艱伯顏追憶前事謂海運可行于是請於朝造平底船六十艘運糧從海道抵直沽以至京命羅璧及張瑄與清共領之初清瑄熟於海道嘗引舟東行三日夜得沙門島又東北過高麗向水口見文登

夷維諸山又北見燕山碣石私念南北海道徑直不遠淺角識之及就撫遂倡海運自劉家港入海一歲之中往返兩運漸多至二百餘萬石二十年征東行省阿塔海征日本命清及瑄從行是年罷新開河專事海運以清為海道運糧萬戶以海運有勞遂授宣慰使元貞元年增江西河南參政以清及瑄為之後為江南僧石祖進告命御史臺鞫問坐罪并籍家拘其軍器海舶等物武宗至大三年復用清子虎一作盧往治海漕以所籍宅一區田

百頃給之

朱釗 賜進士出身歷任刑部侍郎贈監察御史

濮欽 字敬之天歷初仕郡推官

朱暘谷 總管府提督海運諸路總管兼理軍務都

提制朱氏自籍產戍邊子姓懼禍旁徙惟留鎮與

郡居一支皆暘谷之後也

石朝用 以進士仕元為廉使無子卒葬鎮西鎮之

巨姓至今稱燕雷濮石云

濮銓 字令宸安慶路總管

濮銑 字尚師梧之八世孫也至大中仕建功郎泰

定間勅往北征為元帥晉階軍遠將軍歸里後建

園宅後優游以終老焉

濮允淳 尚寶司丞

朱思明 進義縣縣尉轉嘉興縣錄事判官

朱仁甫 思明子青陽縣教諭

朱完 樞密院判官同知樞密事

朱大德 萬戶府協理海防

明

姚珽 字廷玉洪武間由儒士舉任房山縣教諭轉
嘉興府訓導

楊公藝 永樂初由儒士舉任嘉興府訓導

楊景春 字仰齋永樂戊子舉人辛卯進士任大理
寺評事

楊述 字宗道成童遊庠永樂癸卯弱冠領鄉薦第
一兩試春闈不第因就乙榜分教宜興陞國子監
掌教視學四川福建文衡為天下最擢遼府長史
勤於輔導遼王書公正二字賜之卒於官所著有

蘭谷集

濮敬 本名彥威字方南生而穎異日記千言嗜鍾
王書法盡得其妙永樂乙酉上徵以楷書貢歷任
湖廣糧儲道參議居官清正治績彰彰解組歸肆
志林泉游心書史為鄉里典型焉

楊瓊 字廷用正統丁巳歲貢任兩淮運判

楊瑛 字廷玉任巡檢司

楊青 字士昂述之子警敏過人景泰庚午領鄉薦
明年聯捷春官授庶吉士改授禮部給事中外艱

服闋仍補諫垣掌南京吏禮二科事尋召入拜刑
科都給事中陞河南僉憲奉勅總理軍民居數月
以勞卒於官時年止四十未竟所施識者惜之

濮孟深

字樂靜由太學任歙縣二尹吏才卓犖毅

然以興利除害為己任廉明慈惠邑頌良吏焉

鍾琦

字廷佩成化甲辰貢任江寧府崇明縣主簿

濮淮

字大川號桐邱明經任仙遊縣教諭陞延平

府教授善海忠介公時值倭亂日夜與其令擘畫
城守賴以不潰載在方掌科碑記歸里為鄉飲賓

晚喜讀易將卒告廟別友賦詩而絕年八十五

鍾鏞

字廷器成化乙酉中式任江西貴溪訓導改

泰平縣教諭仕至陝西布政司參議

朱綬

字文佩成化丁未進士授翰林院檢討侍岐

王講讀宏治庚戌王出就府邸奄官專擅輔導臣

僚殆為虛位綬據例抗疏得俞旨頒行諸藩自是

政務悉隸輔臣永遵舊典越遷楚藩左相尋改相

晉藩時王年耄世子世孫俱薨有欲竊柄者幽王

曾孫於別宮潛奏權國上下疑莫能決綬密疏有

王曾孫在乃得封乞歸楚王以綬奏請於朝復起相焉勅賜別有洞天四字建坊先後藩國二十餘年為入方正不阿著有四書輔註易經精蘊等書

按祠墓在幽湖里馮夢禎嘗題讚云初筮中秘道重岐師出相兩藩功恢晉嫡留孤忠于志乘享世紀於鄉邦紀其實也

濮師灼

號見湖萬歷間授東粵遊擊以軍功加都

指揮使太倉王世貞贈詩有云緩帶諸生談碣石飛書一箭下扶桑可想見其概云

濮天輝

字堯華號駕湖由廩監任鴻臚寺序班兩

侍經筵美丰姿白晢而順當神宗御極初年祭壇畢見濮後事奔走顧左右曰何方人偉然乃爾中官以浙之嘉興人對曰江南有如此偉相耶特旨賞賚雞酒豕表裏一時奉為盛事子翰圻由雍貢

授別駕

按前二人本郡人濮氏家乘列通籍中蓋仍郡中所修譜略之舊夫譜考同宗誌分異地誌略不分郡鎮一姓羅列似不應復踵其謬然吾鎮巨族城鎮迭居者甚多既為梓里不嫌並錄今擇行業彰著者書之餘縣校刪為申其例于此

馮政

字原泉少有文名篤於孝友由進士知太倉

州旁敷惠政仕至湖廣布政沐寵最優迎養節母
誥命三錫時論榮之又嘗總裁桐鄉邑乘鼓勵忠
孝所著有明儒要錄寧儉編貞節錄弟缺字次泉
內閣中書

○陸堦 字允升號吉菴中萬歷丙子鄉試為人素敦

孝友清介其天性也就羅山學博道誼自高捐俸
却餽陞石埭縣知縣痛懲往弊嚴禁里胥包攬櫃
書勒索以清節自甘卒於官囊無餘財士民肖像
立碑無子以衆好公舉於鄉得崇祀焉

岳元聲 字之初號石帆由進士知旌德縣均徭裁

囊中讒改教選國子博士轉監丞有詔選良家女
入宮上言皇長子冊立未舉而先盛女謁非所以
教并用銅具鞭撻宮侍為非又論李宗伯長春廕
子素監規一时有鐵監丞之稱遷工部主事時王
錫爵奉三王並封待嫡之詔元聲具疏以祖宗朝
從未有元子封王者儀制主事顧允成張納陞見
而避之列名同奏被旨切責復詣朝房詰責首輔
比之李林甫于是太倉引責並封得寢進郎中極
論闕白禍始朝貢大司馬石星倚沈惟敬封貢之

議輔臣趙志臯墮其術中趙深啣之勸為民里居
二十五年究心理學建天心書院會講常百餘人
天啟改元議國本功起補南主事歷擢南兵部侍
郎署部事會坐營都司陞起剝軍激衆杖之轅門
晚將士入伍逆閹竊政與同官陳道亨相繼具疏
劾之奪官追誥命及歸談道不倦崇禎初復原官
方大用而病不起贈南京兵部尚書所著有潛初
子集易象微言讀易圖說聖學範圍說莊停封實
記閑道篇金陀遺編元真訣要元真夕照圖說元

真秘訣杖頭語柄若三縣爭田力持清丈著三縣
錯壤圖說尤有功於鄉里者沒後崇禎帝有諭祭
文崇祀鄉賢子潢詹事府主簿

岳和聲

字母之律號石梁以進士筮仕汝陽築汝

堤以防橫決號岳公堤晉禮部主事會本生父沒
疏請終喪為人後者得為本生父母給假終喪自
此始出守慶遠擢福建督學尋參藩惠州補九江
負邊才望調永平備兵條議團練車營尋擢副撫
疏請增建關內水陸四營以鞏藩籬以備應援又

疏安攘八議持論與時忤屢疏乞休逾年撫軍延綏崇禎初為忌者媒藥上疏乞休尋卒所著有餐微子集澹溪集觀生堂薈著後縣鸞錄

施爾志

字章甫六世祖茂為楊任姻亞遣戍祖容

隱於醫父乾濮州學正爾志萬歷壬辰進士授太平司理平反冤獄甚多諸生鍾某獄成而枉破械出之女因論報當死幼兒搶地哀啼公惻然請俟兒長就法遷部曹主廣西考發策歲切時政無諱督理張秋北河擢山東憲副理漕儲時漕道新設

屏絕諸例官弁畏懷陞雲南布政患其俗悍鮮禮義潔已教民滇人化之黔蜀用兵宵旦拮据轉輸不置入覲以說被察還里卒年八十有三

按吾里先達向傳有施布政之名桐邑志稱為鎮人及攷施氏家譜知施氏系本縉雲元末始遷濮鎮以遷鎮為始祖爾志祖容又自鎮遷郡城之瓶山里則爾志實郡產也後復遷鎮至今子孫現存下西街祖宅雖不可考而祖塋在鎮西北桐志載之今并其父乾傳載秀水志其子博傳載嘉邑志者分門錄入仍舊聞也

岳駿聲

原名金聲字季有號石鍾萬歷庚戌進士

昆弟皆早第時比三鳳筮仕刑曹值張差獄起意

在調護宮闈力持風顧之說遂與東林諸公忤出
守汝寧備兵淮徐調督漕事優擢楚臬時黔方用
兵撫臣疏請駿聲監軍言者撫張差事媒孽之遂
拂衣歸乙丑起補楚臬晉勲寺拾級容臺秋三殿
成加銜右都進大銀臺奉命祭告東嶽便道歸居
數載卒生平歷官循次非有不次之擢在都時正
議自持惟張差一事與東林忤耳

濮繼學

字連城由附例官主簿

姚暹

字士元號若麓萬歷戊午舉人令德化均屯

祖除胥蠹弭盜清獄署垣有古木槁而復生人以
為患政所感作瑞樹錄以紀之歸里後栽花飲酒
有五柳風

國朝

鍾彝

原名元圭字紫錫號彤菴順治丙戌科舉人

任陝西鳳翔府推官

鍾起

彝弟字子飛順治戊子科由拔貢中順天鄉

試任山東濮州太守

仲宏道

字開一號改菴順治戊子科拔貢除山東

嶧縣蒞任六年著有理嶧拙言子來堂稿等書嶧志載入循良傳歸田後杜門著書桐邑令徐纂修縣志皆出其手并捐刻印嘗九赴賓筵有擬易廣義改菴偶集等書詩有甌香集而史韻正續兩篇俱刻行世生平著述甚多政事文章推重當世高年碩德模範閭閻為國朝鄉先生之首

顧高嘉 原名項嘉字昭靖號南樓順治丁酉戊戌聯捷授翰林院庶吉士改知縣以少年詞林出膺民社判如流水纖毫不爽邑稱神明由六合令擢

河間府同知陞都勻府以終養歸卒於家

陳飛聲 字元長康熙丁巳特科中式任江西高縣知縣

朱鳴吉 字佑宸康熙己酉科經魁金華縣學教諭
鍾鳴盛 字定山康熙癸酉科舉人任廣西武宣縣知縣卒於官

曹德潤 字申吉由商籍撥入杭州府學貢生任遂

安縣學訓導

曹士瑋 字廷玉由錢塘商籍康熙壬午科順天中

武任廣西思恩府同知弟士瑛字韞山秀水縣學貢生即選訓導新例改補縣丞未赴任卒同訂制科禮記合纂

曹懋華 縣丞

夏天祚 康熙壬午武科舉人衢州駐防

翟堯佐 字亮工少孝友為單邑令除羨稅庫董家口患水開引河修廢堤開涵洞號翟公堤葺城治河溢新宓子巫馬子祠修橫舍設義學平倉量均徭役又歸王廣文殯復周尉官稱循吏云子枚吉

翟枚吉

字維藩號蠡洲任隨州知州時湖廣流民

萬育生煽誘愚民集眾數百人謀於隨之光化鋪起事沿途焚掠居民大恐公馳入賊中獲其巨魁六七人賊眾駭散悉不究王雲衢為作翟侯平賊記後遷郡城子燕詒字安期宜良知縣遷叙州判官照庭字深勗寧國知府亮工姪懷寧字嵩來莆田知縣枚吉著蠡洲詩鈔

孫起鰲

字駕山貢生仁和訓導

傅尹諧

字霖蒼康熙丁卯科舉人選會稽教諭未

赴任卒

王者香 字懷績貢生由瑞安教諭陞山東安邱縣知縣

葉祥光 字吉暉康熙癸巳科舉人山陰教諭

楊琯 字自崑由國子生考授州同康熙丙申充古今圖書集成纂修雍正丙午授直隸趙州柏鄉縣有惠政擢江寧府同知卒于官所著有栗齋詩稿

濮元孝 字武姚歲貢生由寧海訓導歷任沙河華

鄉二縣知縣

馮景夏 字樹成原泉先生之後也原泉官至藩司樹成亦任方伯其為蘇松糧道之日力除積弊痛懲苛收至今粟米猶稱馮斛焉政聲赫然子鈐安徽巡撫孫浩御史曾孫應榴江西布政集梧翰林累葉簪纓實由厚德之報馮氏籍自桐鄉後遷郡治鎮實梓里云

張景穆 字西崑由諸生入京以二尹擢隴西閭中二縣陞靜寧州知州以老乞休卒於家

屠嘉正 字時若號恂齋由選拔中雍正癸卯舉人

甲辰會魁筮仕刑曹出知鬱林州歷陞至貴州按察使因病乞歸卒公專精制義雖已仕猶日誦時文數十首吟聲徹官廨所著有恂齋制義文集居官清慎自矢歷著政聲雍正間思明蠻肆逆偕崔協鎮善單騎撫綏全活甚衆其政績採入國史

王應綵 字天章號萊堂康熙庚子亞魁雍正庚戌進士由刑曹歷臺垣仕至禮科掌印給事中典試廣東提督河南學政醇謹老成官方素著年六十餘卒於官所著有清慎堂奏稿

馮樹 字惠衡江西宜黃縣尉

阮林 字松年廣東巡檢

朱光國 字人千由武舉任都司僉事山東東平守

禦府撥運

卜義明 字書常號麗東雍正壬子舉人福建鹽大

使向容知縣改歸安教諭卒於官

任監大使時恤灶戶却商規去任時紳士為詩以送答詩曰貧仕漳南地羣賢得序賓萍踪非汎合蘭臭喜同心去路仙山遠離情湘水深那堪踰梁嶺回首溯晴陰

孟寶中 字天叙嘉興恩貢選湯溪縣訓導卒于官

陸震 字雄萬號省堂善為文名振諸生間乾隆壬午舉於鄉考 咸安宮教習第一挑發山東補德平知縣五年乞終養歸卒於家

吳璩 榜名襄字駕黃號文溪本休寧籍由桐鄉諸生中乾隆己卯鄉試授內閣中書尋陞協辦侍讀丁內艱歸桐邑之屠甸鎮以疾卒

沈琳 字潤輝號華坪乾隆丙子舉人辛巳進士由部曹歷臺垣陞吏科給事中巡漕江南擢光祿寺少卿以疾 予休旋卒於京自通籍後歷任京職

二十餘年迎養二親恬澹寡營所著有瞻雲堂文集未刻

方學沆 字靖公號芷園雍正丙午領鄉薦辛酉赴部挑選得通籍官于康城十餘年久之量移四川越雋衛參軍即辭疾旋里年八十餘適遇乾隆丙午擬重赴鹿鳴先期卒

濮啟元 字顯仁號玉巖中乾隆庚午舉人壬申選嚴州府分水教諭癸未中進士甲午補授湖北來鳳縣知縣戊戌調廣西灌陽縣知縣攝博白縣事

署理龍州通判乾隆己亥庚子癸卯三科廣西省
同考試官所著有玉巖詩鈔未刻又著嘉禾百詠
吳奕傳 字紹虞號葵園乾隆庚寅舉於鄉挑發四
川署樂至縣事有政聲甫一歲卒于官邑人感之
喪歸皆易服泣送設路祭者三十里所著有葵園
集未刻

屠亮 字載熙乾隆丙子科副貢龍泉訓導卒于官
胡琢 字其章號珠船乾隆甲午舉人丁未挑授溫
州府平陽教諭所著有濮鎮紀聞又著贅翁筆記

科目附

宋

濮輝如崇德紹熙四年癸丑科陳亮榜進士延平府
濮世昌崇德寶慶二年丙戌科進士

元

石朝用崇德進士科分無考

朱釗嘉興進士

濮鉞崇德延佑舉人

明

楊景春興嘉永樂六年戊子舉人辛卯進士

楊述崇德永樂二十一年癸卯科解元

楊青鄉桐景泰元年庚午科舉人辛未柯潛進士

鍾鏞鄉桐成化元年乙酉科舉人

朱綬興嘉成化二十二年丙午科舉人丁未進士

馮攷鄉桐嘉靖甲子科舉人隆慶二年戊辰進士

施爾志興嘉萬歷四年丙子科舉人壬辰進士

陸階鄉桐萬歷丙子科舉人

樂元聲興嘉萬歷十年壬午科舉人癸未進士後正岳姓

樂和聲興嘉萬歷十九年辛卯科舉人壬辰進士

岳金聲興嘉萬歷三十四年丙午科舉人庚戌進士

朱治貞興嘉萬歷四十三年乙卯科舉人

施有恒水秀萬歷四十六年戊午科舉人應天中式

姚遜水秀萬歷戊午科舉人

朱治憫興嘉天啟元年辛酉科舉人

項毓槐興嘉崇禎九年丙子科舉人

岳澣興嘉崇禎十二年己卯科舉人

○鍾元圭鄉桐順治三年丙戌科舉人 改名晏

○鍾元超鄉桐順治五年戊子科舉人 順天中式改名

項嘉鄉桐順治十五年丁酉舉人 戊戌進士改名 高嘉

○楊奇鄉桐順治丁酉武科舉人

濮鏊鄉桐康熙丙午科舉人 原籍桐鄉

朱鳴吉鄉桐康熙八年己酉科舉人

陳飛聲鄉桐康熙十六年丁巳科舉人

傅允諧鄉桐康熙二十六年丁卯科舉人

○鍾鳴盛鄉桐康熙三十二年癸酉科舉人

曹士璋鄉桐康熙四十一年壬午科舉人

朱光國鄉桐康熙壬午武科舉人

孫起亨鄉桐康熙壬午武科舉人

夏天祚鄉桐康熙壬午武科舉人

○歸倫鄉桐康熙四十四年乙酉科舉人

○葉祥光鄉桐康熙五十二年癸巳科舉人

○王應綵鄉桐康熙五十九年庚子亞魁 庚戌進士

鄭世元鄉桐雍正元年癸卯科舉人 順天中式

○屠嘉鄉桐雍正癸卯科舉人 甲辰會魁 改嘉正

○葉志高鄉桐雍正癸卯科舉人

○方學沆鄉桐雍正四年丙午科舉人

曹鉉鄉桐

○卜義明鄉桐雍正十年壬子科舉人

○曹鉉鄉桐乾隆十二年丁卯科舉人

○李枝昌鄉桐乾隆丁卯科舉人戊辰進士五經中式

○濮啟元鄉桐乾隆十五年庚午科舉人癸未進士

○周讓之鄉桐乾隆十七年壬申科舉人

沈琳水秀乾隆二十一年丙子科舉人辛巳進士

○吳襄鄉桐乾隆二十四年巳卯科舉人改名璩

○陸震鄉桐乾隆二十七年壬午科舉人

吳要傳水秀乾隆三十五年庚寅科舉人

○周京鄉桐乾隆三十六年辛卯科舉人

○歸敦鄉桐乾隆辛卯科舉人

項焜水秀乾隆辛卯科舉人

忻溥水秀乾隆辛卯科舉人

陳徵餘水秀乾隆辛卯科舉人

○胡琢鄉桐乾隆三十九年甲午科舉人

○葉家琬鄉桐乾隆四十二年丁酉科舉人

○鄒士貴鄉桐乾隆四十四年己亥科舉人

○沈潤芳鄉桐乾隆四十五年庚子科舉人

○朱均鄉桐乾隆庚子科舉人

○朱垠鄉桐乾隆五十一年丙午科舉人

項熊水秀乾隆丙午科舉人

○屠本仁鄉桐乾隆五十四年己酉科舉人

○楊灃鄉桐乾隆己酉科舉人

○沈鴻達鄉桐乾隆五十九年甲寅 恩科舉人

隱居

宋濮德鎰 郡馬濮奉鎰之弟性好幽閒不樂仕進
淳佑中郡馬為安王所善家聲震耀德鎰獨超然
貴盛之外結茅屋於幽湖之渚茹素安禪吟花詠
月往來皆布衣交郡馬歲時餽遺俱却不受年九
十六端坐而逝

元姚清 讀書通達時務為郡書佐廉平慎飭以不
得柔媚取容攜妻子處濮谿耕釣為終焉計暇日
漁農倡酬酣適所著有樂章一卷行世

濮欽 字敬之與楊鐵崖江朝宗新仲銘友善天歷
初嘗出為郡推官後見世亂建一室於幽湖之畔
題曰雪筠齋以自藏焉

施有政 世居縉雲仕元為密雲縣令至正間知天
下必亂去官南歸會紅巾兵梗道不得前及抵嘉
興泊舟陡門有所感遂萌僑居意南進數里許為
濮院鎮因家焉有政之子即有遣戍之事卒莫居
西三里二十九都色字圩之原

濮鋼 字經之天性嚴正自幼端凝至正末偽周張

士誠據平江招聘諸名士鋼與楊鐵崖同在聘中
公對使者謝曰草野鄙人一無知識顯榮厚祿非
所敢希因是觸怒偽周幾罹不測之禍而公怡然
自若鐵崖至平江亦賦詩而反兩人遂成莫逆明
初奉旨遷嚴州悉散貲財以去

濮允中 仕元名也先不花號樂閭至順元年庚午
徵為兩淮鹽場轉運司令至元乙亥建三清閣於
元明觀後又建化壇大殿晚築知止堂以老焉

濮彥仁 字仲溫樂閭子也至元辛未仕為吳中典

按嘉禾舊聞云朱中風雅盛于元季一時名士爲
聚桂文會以文卷赴者五百餘人楊維禎評其優
劣郡人鮑恂貝瓊爲之倡後而和之者郁遵朱克
恭王鏞兄弟漢仲溫父子四方避地如天台徐一
夔桐廬姚桐壽崑山顧德輝溫州陳秀民閩卓成
大河南高遜志四明周棐江陰孫作錢塘陳世昌
江都邱民東平朱諒會稽唐肅江漢皆來僑居文
酒相酬歲無虛日至今傳爲盛事朱竹垞徐一夔
傳亦以此爲言而當日之執牛耳者實樂閭父子
也乃以上所稱諸公成集以外間見于明詩綜而
樂閭父子無聞焉一遭變故遂泯沒如是則宋時
濮太尉與王梅溪唱和之作其無傳宜矣惜哉

字抱真號草堂萬歷初早棄應舉高尚不

按釋寂解著見開錄載抱真梅花小築自題及諸名士水木搗詩跋其後云檀越明之公第八世草堂公仲宣公之祖也盛宜山辦香集中有蕨草堂日記錄公當神廟昇平之時與二三同志結物外交寄興筆墨為詞壇膾炙年七十時曾為疏禱大士謂世無不死之人願更活十一年得滿九九之數于晚花新筍時微疾而逝無憾矣至歲三月果亡壽八十有一人感異之見漢氏諸公生六子學問俱優次芸憲公仲宣公之父三侶莊公肖韓公之父皆由草堂公尊賢取友更多漸摩之益以致人文之盛獨悲仲宣公方舉孝廉為念祖先遺緒以清梵剗竟遭石門之變吾等靡染茲山能無憾

往

乎故集羣公授贈諸詠以懷之草堂本郡居而侶
莊曾修院誌仲宣力清山寺皆有功于吾里故詳
其所
自云

陸養正 字以寧號冷臣又號青霞博古士也幼時
赴童子試便為古語入制藝邑令驚焉入泮後名
大振善書得放翁筆意詩古文詞無不超越時輩
所著石鳴集氣骨矯然一切綺靡之語不少汙其
筆端崇正朝以詩書自娛不復求達故其晚年品
節愈高詩亦愈妙無子以壽終

史漢臣 號圖南博學好古詩文俱滿洒不羣其門

下士多膺顯爵先生棲遲陋巷恬如也以諸生終
無子生平著述俱廢

顧問 字去疑為桐邑庠生生平手不釋卷氣質矯
潔年踰強仕即棄儒冠有滄洲白雲之想尤好學
以方書活人年八十手校莊郭諸書意旨雋永常
出人意想之表

施博 字易修號約菴崇禎間庠生少有遠志不嗜
進取時值患難習靜有得後讀易至家人卦悟聖
道不離倫常日用啟迪學者兼重知行與桐鄉張

楊園先生善倡里人為朔望會以求教於四方高
賢明越蘇常間有志斯道者聞風踵至長安曹穆
欣容城孫夏峰千里外馳書叩荅晚年學益粹弟
子日進升座講學環聽者盈戶多感奮有省年七
十四卒於家有姚江淵源及語錄講義若干卷
馮貞秀 字爾介桐邑歲貢生生平刻苦好學方正
嚴毅不肯苟容少枉大節素不善詩甲申聞李闖
之亂悲憤激楚作集唐十八拍以見志其自序曰
有忠臣孝子而不繇寧靜淡漠者我有忠臣孝子

而不出才人學士者哉其志亦可見矣

呂洽 一名道方字圓渚號草亭為秀邑諸生少時
專於性命之學旁及堪輿術數之理晚年一歸於
虛靜至於衣食之計一切置之不問突烟不繼怡
然無憂至友人家對酒賦詩輒作二三日盤桓歲
除詩云一瓢天目水幾片徑山茶其高致可見所
著有學庸圖註未及刻詩多不存稿臨歿前數日
一老友詢其歸期舉一指相示果於月朔坐逝云
鍾山 字賓王號韻石秀邑諸生也為人情深而有

俠氣故其詩有纏綿感慨之句與菽水吳子扶九
兄弟友善結復社詩文往來無虛日後值李闖之
變蓋落魄不羈雖三旬九食終無折腰之態吳扶
九以屈靈均比之可謂善狀其人矣所著有吉雲
集

沈機 字爾任號海鷗明諸生隱於詩酒所著有鷗
笑軒集四卷梅涇集二卷陳謹堂稱其硬語盤空
獨往獨來不肯傍人門戶真能自闢風氣者其孫
孔鍵亦善詩有柴門集

寫行

○元濮鑑

字明之一作明遠值宋元相代間無心仕進為

善於鄉大德丁未浙西大水出粟賑飢辟為淮安

路打捕屯田同提舉至大二年乙酉捨居宅之左

右為寺觀又於市中設四大牙行收貯土絹以待

四方販買詳見趙子昂所作墓誌蓋積而能散者

廉孝子 佚其名貝清江常贈詩云幽湖老人七十

餘一身如蟲隱圖書朝廷不起常夷甫鄉黨已知

徐仲車題為廉孝子云

按里有廉節婦清江傳云廉正妻生二子以儒名於世孝子或即正之子歟正二子一名實

狄守真 狄氏為鎮巨姓至正丙午建福清道院

范重雯 字松廈以文武全才應選為集賢殿供奉

授承事郎出守漳州總管生平喜讀書騎射至元

中張士誠寇湖州犯檣李時雯避地嘉興縣長水

都率鄉兵禦寇保郭閭閻里人德之至今圩匯地

方有范家橋白鶴橋皆其破賊遺址

明施茂 字德懋與郡中楊公任為姻婭靖難時黃

子澄謀恢復走謀楊公事泄族誅親黨皆坐戍因

連及永樂九年同范小孫等十一人永成順天武

清衛茂承先訓以孝友率其家雖罹先妄不圖苟

免戍者例以長屬行茂諸子各篤恩義不忍長兄

獨蒙其害乃倣古代戍意更番赴操人咸以敦睦

歸之

施晟 字默菴以長當戍僉謂公老成能督家務宜

留耕綜理賦役則祭祀有託而因以所入慰遠行

乃先之以次第昇繼之以五弟昱而晟與三景四

旭各受祖田二十六畝竭力操作以籽粒買金時

輸戍所成者大約十年而迭休居與行勞逸得均焉次第及公之子若孫所謂于患難之中有禮義存焉者乎

○濮宗淵 字魚樂景泰中大旱公發粟五百石募後濬河以便行舟宏治中尤旱復捐米千餘石自幽湖濬至運塘水得以不涸當道義而旌之

施玉 字一默孝弟樸誠惟知拙守而無他營次當赴衛瓜期既及代歸優游鄉井以信義著聞昆弟怡怡衣食無分爾我公雖讀書惟了大義不習為

文章卒以盛德享遐齡年九十有三

岳商 字成卿兄夏有子姓十餘人商曰吾止兩子耳于是田宅讓而受惡臧獲讓而受老別治子舍奉父母以孝謹稱兄弟皆素封值踐更及兄卒凡後必肩其難且重者至孫三人皆以甲科顯咸謂孝友之報

○濮文起 字三槐桐邑庠生學古好謀士林推之值倭寇圍桐城河朔宗霍兩將戰歿阜林督撫胡宗憲延公問計因出金幣餌賊首徐海圍始解又令

妓翠翹碧桃蠱海乘間攻之海溺水死督撫欲具
題重用公力辭焉

濮文貴 以饒裕充靈宿鄉黨役長樸謹而文千金
一諾嘉靖丁酉郡守趙公瀛均平秀水糧則以靈
宿東西兩區田瘠不堪並徵率區民疏請乃得以
靈東糧十作九徵計田三千三百四十畝有奇靈
西糧十作八徵計田七千七百一十畝有奇費踰
數千弗惜也建大通橋於陟門鎮郡邑義之年八
十有一

○鍾啟明

字思梅大父錡仕崇明遺產悉讓從兄邑
城圯捐貲勸築萬歷間歲荒煮糜賑飢全活無算
積德累仁以詩書勉後其子孫列黌庠登賢書者
接踵人謂陰德之報

濮圓齡

號侍涇為人謹愿桐邑令胡舜允題其居
曰鄉約所慷慨樂善有祖風嘗捨宅以建白衣觀
音庵

○仲應鶴

字九霄性至孝于萬歷末年二十三歲母
周氏疾割股療之

濮洋 字愛川好讀書厲名節扶危濟困排難解紛
凡橋梁道路有利於人者必捐資以任之祖塋公
宜祔葬因從弟乏穴遂義讓而自居於下其敦孝
友重族誼如是

朱茂曜 萬歷己酉孝廉朱大猷子大猷創為義塚
崇禎庚辛饑疫頻仍茂曜又偕鎮民踵武增修益
置塚地以埋殍

陳國紀沈世珍 明季屢遭凶歲國紀與世珍修舉
義塚桐邑令閭中張如戴嘉之為作碑記并請于

上憲免作官地焉

施大猷 字少泉賦性坦易尤多天趣逮老不異嬰

兒昆弟間相友愛晚年始得一子施氏如成事未
艾公父子當次及會宥得免人謂天相壽八十三

○濮淙 字雪筠號澹軒長於詩而業賈往來吳門所

與游皆當世知名士少時喪母哀毀如成人繼母

遇之嚴曲意承順家遭祝融於火中負兩親出而

身不傷與其兄友愛且疎於財雖貧乏肯周人急

所著有沆雪居半間樓月巢蘧樓莊廬等集

國朝李成德 閔族貧讓產贍之崇禎末年飢出粟
助賑子尚白康熙庚戌水災能繼父志捐賑鄉里
壽九十終尚白長子逢年有聲壽七十舉鄉
飲賓堅辭不赴學使汪以三世鄉評表其閭

○李懋華 字含白樂善好施縣治官塘有登瀛橋圯
毀已久華獨力建造人賴利涉當事旌以額其孫
枝昌仕至贛州守

○周起龍 睦族敦里治家嚴而有法順治三年歲飢
斗米三錢人情洶洶龍捐米三百石半價給散鄰

里一方咸悅從子應麟康熙十三年路拾珍珠髻
一頂價值不貲蓋花姓親迎貸諸富家以為新婦
之飾女奴遺失幾起訟端麟見其使踉蹌至即以
還之不受其謝

○孫嘉麗 字爾宣性孝友築園亭以娛其親嘗刻清
夜鐘并邵康節孝弟詩以勵俗子起鰲官訓導
曹德望 字渭公事母盡孝母疾藥弗效刲股肉以
救諸昆弟有困乏者輒助之

○陳有仁 樂善好施三次鄉飲子孫世傳忠厚

俞廷謨 字介山桐邑諸生行止端方居家敦睦教
子孫以讀書明理為要鄉里共稱其醇謹云年八
十餘舉鄉飲

方霽園 性好施與一人於歲暮告急如數予之沒
其姓名終不令子孫知歿後數十年濮有賈客渡
楊子江誤脫水中見方力救之問之則曰吾此地
神也子聞然有父風

張敬萱 國初水旱頻仍里多捐瘠敬萱與同里諸
好善者創為施槽之會首捐貲三十金仲改菴為

作同善會記

濮成名 字思庭秉性正直古道可風邑令三徵鄉
飲不赴韓宗伯慕廬稱為渾金璞玉家門之內整
齊有法年九十乃卒

○鍾梁

字子久少遲鈍刻苦自勵遂游桐庠樂善尚

義端方自守好排難解紛俗呼為百安舉賢良加

正與鄉飲子孫數十人著來霞詩集為顧茂倫諸

前輩所賞載英華集中子元文克承父志昆弟終

身不析產婚嫁以次內外百餘口翕然相聚

楊權 字斗衡號可菴樂善好施桐邑蔡公諱可遠
舉鄉飲給扁優獎載入府縣二志

朱嘉謨 字聖言號正齋太學生好施與慨然以利
濟為己任天性孝友置公田若干畝贍戚族課諸
子極嚴以教品植行為先務葺橋建亭設留嬰匱
施措諸好義事詳見馮樹誠鈕西齋陳古銘諸傳
記中

宋永齡 字如章號盛溪吳江人遷濮康熙戊子大
飢竭力賑濟葉孝廉祥光紀其事乾隆三年桐邑

舉鄉飲介賓卒年七十八

朱克綏 秀邑庠生以孝義稱乾隆十五年同里具
詞中學使者金壇于耐園贈額曰黃枕管牀

○施本孝 字懷先號道生少孤養於母家考妣厝壤
入考石莫可踪迹遂自誓以死求之適僱舟語舟人舟人

知其處導至一塚發盆滴血驗之確遂得葬焉卒
年六十四陳古銘為作墓誌

曹錫鉅 字藝初篤學敦行有慕櫬啟戒火葬說等
篇刻以勸世乾隆癸亥創瘞埋暴骨之舉賴以入

上者甚衆弟璣字在中太學生亦樂行善事云


沈維章 原名雍嘉以字行號惺齋性孝友重然諾


多名琳
孝中人

父患溺不下醫謂必得人氣吮之乃率弟雍美字
謂韶協力救視父病得瘳人稱雙孝里有養媳不
容於舅姑父母議更嫁夫知而不迎也公呼兩姓
勸諭卒感悟成婚以子貴累贈中憲大夫就養京
邸卒年七十九

楊繡封 字帶如太學生性倜儻乾隆庚寅首倡賑
濟之議里中匪類糾集開場賭博名曰壓寶坑陷

鄉愚歷有年所保役朋比為奸至是極盛封首任
其難邀里中矜耆上抗當事一時軍流兩人徒者
數十人此風稍熄封祖父俱鄉飲賓而封獨不永
年僅四十而沒鄉里惜之





儒林

元濮鏡 字慎之號敏士博學能文好古不倦生平
飭廉隅謹嗜好而一種和藹之氣穆然如坐春風
中識者擬其品在濂溪明道之間

明岳九德 字君采少磊珂有志節與馮開之周彥
雲篝燈蕭寺中讀書講學常以遠大自期顧數奇
不售以諸生困場屋乃討兩子而訓之友愛其弟
九皋以子貴封工部虞衡員外郎

施乾 字一元少應模補博士弟子員應歲薦授懷

遠司訓轉晉陵再轉濮州教授能慎取予辨析名義諸弟子瞿然化服在濮州時守相多故人一切避影無所援繫監司檄視平陰篆再辭不獲輒稱疾人服其清介

濮明微 字賓庭生平嗜古讀書必求實義嘗對子弟云看書當體認聖賢語氣反而求諸身心性命方有裨益若竟以此取青紫則陋矣

濮侶莊 字道水明諸生友教鄉里學行兼優有濮川殘詠一卷修誌略者本之辛年十三猶子傳茹

作徵詩序云角非常歲宛似伯禽之捷捺脉見譽竊同小阮之呼大雅寄東山不減圍棋賭墅雄風慕西楚安能學劍拋書語甚工切

陳其德 字太華天啟丁卯歲貢歷任嚴州府學教授忠誠持重盛德著於鄉里生平著述不闕於身心世道者不少汗其筆墨詩不多作其立春前題云水底竹邀雲共冷梅逢人和月同清風致可想有垂訓樓語行世

濮淙 字雲筠號澹軒孝義多文所著有澹軒集澹

雪居集半間樓集。山塘近草蘧樓近稿。月集詩鈔
莊廡集。澹軒詩選。萍社吟。

岳洵 字暑山。元聲子。廕入太學。後棄舉子業。探究
易理。著周易綱目。留心古今治運。著京察紀事。其
一端也。晚習禪定。端坐而逝。年六十七。

國朝賀聖武 字右文。康熙庚戌歲貢。杜門讀書。絕
口不言世務。候選訓導。未官而卒。人咸惜之。

吳宗泰 字伯讓。順治六年己丑。嘗著樵李稗編一
書。其自序云。己丑夏日。郡國有修誌之舉。曾採近

略若干。則以備當事。萬一遂取。郡縣諸誌。及吳越
以來。應考之書。而叅訂之。惜其稿散失。不全。其闡
幽之意。為足傳云。

濮盤 字仲宣。號雋如。康熙丙午。孝廉時。有駐防官

兵安棟。福善寺仲宣與項仲生等。白諸當事。舟覆
石門。而卒。人咸惜之。公為草堂之孫。世其家。學念
祖先遺緒。力清梵剎。而以死勤事。辛酉。寺僧佛著
重過濮院。晤項仲生。詩曰。見君欲墮淚。為我幾殺
身。試看濮墳草。青青十四春。謂仲宣也。

濮國佐 字襄甫園齡子也奕世箕裘儒風素著康熙癸卯為福善寺迎僧住持重為輪奐所著有安

邱子迂言

馮允秀 字爾遂居東荒村舍所著有梅花逸叟集

沈鳳翼 字蜚卿秀邑明經有文名康熙壬子奉文

修誌桐邑令僉舉蜚卿及桐鄉文學沈鈺介石鐘

貞菴若三人共相採輯後三韓徐秉元復請仲宏

道編纂蜚卿盡出所藏互相讐校而桐志始成

陳禹錫 佚其名以文學著名性耿介數奇屢躋小

試居恒崇尚經術門下士皆恂恂雅飭如鄭耕餘

兄弟阮松巖陳夔一古梓氏謹堂及朱人千輩均

以文章品望著名其餘從學之士不下數百且有

相繼授經至三世者弟膚聞為邑諸生學問行誼

與兄同下帷雪溪語水間而才豐遇壽亦如其兄

焉

周映康 本姓濮號豐玉一號淑元所著有雪芸草

集一卷

周龍燮 號飛藻本姓濮有懷孟草一卷

施元勳 字翼聖號韋莊開小圃曰東荒繪圖賦詩
當時諸名士咸贈以詩嘗選有明一代文曰巽言
集又選小題文咸彙纂性理俱刻行世

鄭世元 字亦亭號黛參姚江人占籍秀水居莊涇
器宇不凡雖屢空不改其度館於湖其門人江星
刻其詩集曰耕餘中順天鄉試第蘆村亦能詩文
應 聖祖南巡召試為廣寧縣知縣後遷郡城
子虎文廣東學政

曹士勲 字名竹桐庠生以文學著名所著有翠羽

詞盛宜山之友徐堅仲嘗錄數閔政之朱太史竹
垞太史讀至滿江紅結句云猛加鞭回首夕陽山
蒼涼狀不覺擊節曰此人詞名當不在吾下吾將
為延譽矣陳蓮宇謂與楊柳岸曉風殘月同其風
韻汪謹堂填滿江紅調并其集俱非虛譽云詩有
萍梗集

沈堯咨 字飭臣號山臞海鷗之從子也幼工詩克
世家學與陳謹堂刻濮川詩數十家嘗索序于當
湖易窩老人寄詩云及今不收拾是則誰之咎又

云吳地無風詩願附詩繫後其殷殷桑梓之情亦可見矣設教里中後遊者甚衆其後人多以文學稱所著有晚盥集

楊炯 字曙輝號存齋庠生有文名著有南遊草拾遺草諸集

楊煒 字赤雯太學生著有雲竹詩集桐鳴小草一卷

楊燮 字爾梅號晶亭年十四補桐邑諸生與其兄赤雯擅名一時人稱雷潭二楊門下多知名士嘗

著性理闡周易或問毛詩箋靈蘭青鳥要旨及晶亭詩集

張其是 字文韓號菊岑有碧草軒詩一卷嘗作漢川志陳鴻園作詩贈之有云不是吾翁勤纂述一編誰指後人迷然其書迄未見也

程琦 字再韓號芳燮本姓吳天都人弱冠補諸生性嗜澌而志趣高曠嘗戲為傳奇荆卿刺秦皇立寵太子丹即位軻爲丞相酹酒田先生墓下音節壯烈聞者快之平生剛正不諧俗所著有芳燮集

陳古銘稱爲幽湖詩之後勁

陳曾祉 字鴻園著心隱詩集四卷

陳光裕 字芬佩號謹堂秀邑諸生名噪士林詩古文詞并稱擅場集濮川詩鈔教學鄉黨間所刻惟石墩草荻書樓草所著尚多未刻子猷嘉號峙南邑明經能世其學以古直稱

○周曦 字旦雯號緩菴舉止方正斥釋老嘗與范巨川陳古銘拜楊園張先生墓出古鼎煎香焉好書籍古玩得佳硯每自製銘勒之詩有孝順寧棲集

沈履端 字坦如工詩仿坡翁擇勝亭遺意爲花笠之飲所著竹岳樓草有悼亡詩十六章繡水鄭亦亭青堆周月潭爲之跋

徐嘉 字端木有得月樓詩集其子樹璧號偕亭亦善詩嘗與古銘南谷諸公結玉山草堂菽乳詩會古銘嘗爲之序

葉志高 字松山雍正癸卯舉人文思敏捷一百可成數十藝所讀書過目不忘每遇一題未有無熟文數篇者

張宏範 字崙表號霽陽府貢生長於詩文天資敏
妙嘗與蔣季眉范巨川諸前輩遊又與鄭耕餘陳
謹堂古銘迭主詩壇書學晉人好纂錄古書當謁
選以老疾辭壽八十臨終口占詩別親友意致豁
如所刻霽陽集二卷

徐晞 字若初有赤岩集其口占一絕云檣李城南
是舊廬秋闌十戰已成虛今選寶帶湖干住惟讀
三叔五葉書

顧惕菴 佚其名住岳家堦陳謹堂結社於濮川惕

菴與馬程再韓稱其文似元次山詩似晁无咎年
僅四十九而卒

周甸 字鎬瞻本姓濮有嶧山集

濮光孝 字瀛仙有學圃集

沈鍾泰 字虞尊桐諸生早卒其師陳謹堂為刻其

荻書樓遺草一卷

濮履中 字丹棠號又和好吟詠嘗有濮川景址詩

五十首年八十自為七律四章索同人和贈內一
聯云命不如人甘守拙天猶困我豈關貧其寄慨

殊深

藝事

元朱顯道 業醫得九鍼補瀉法於金王瑞安實出
竇文貞之傳非一時庸工所及性尤急於治人而
賴以全活者甚衆其始祖某為宋文林郎侍科院
官歷思明仁甫皆仕至顯道凡四世獨以醫顯具
清江嘗為作記

明施容 字廷儀號春菴施氏以力耕轉成至容始
發憤下帷偶讀岐黃遂精其業正德辛未大疫他
醫裹足容獨毅然往視全活甚衆屠康僖公呂太

常公皆贈以詩由鎮之下西街遷郡之瓶山以孫貴
贈通奉大夫雲南右布政使

濮成恆 字贊公好義樂善敦宗睦族尤人所難精
於堪輿之術四方之屢常滿戶外

○ 劉恒龍 字蘭亭幼嫻醫術人號火藥劉言其效之
速也從錢唐徙居濮鎮五十餘年壽七十無病而
逝

沈珮聲 新城鎮沈君御之姪遷居於濮專精外科
沈恕 本姓陳字子如由梅里遷濮精痘科著幼科

述古一書又善寫墨蘭子斯皇銘常孫山雷世傳
其業

○ 張宿之 桐溪日者精於易多奇中所著有河圖洛
書纂記當時名士咸贈以詩

濮梅 字澹仙工於山水

馮時昌 字開甫明中書馮敏子秀邑庠生善書白
雀菴大士殿龍海滙慧扁其所書也

國朝陸子晉 精於篆章自負雲漁嘯民所鑄之刀
切玉如泥海鷗詩所云寶刀劃空風雨來者也

范鏞 字稽山人稱為范癡能寫水墨牡丹尤精雪蕉寒鶴性孤介罕有識者故流傳絕少與張次薇為筆墨交嘗少周其空乏然終不肯以貧累人遂至窮餓以死今其真蹟人爭寶藏焉

沈經方 字亮夫善二王書法臨摹殆盡一筆不苟中年卒無子所書佛經及宋唐人詩卷冊頁小楷散落人間皆珍藏為法帖

吳廷樞 字寰中新安布衣也書法甚精善書者多遜之有法帖行世詩律蒼秀而所傳絕少其子亦

善書然遠不及乃父矣

沈朗 字仲韜號白山善書學法鍾王外舅王氏郡中稱工書者朗以子壻更委贄請業焉遂得其家藏晉唐法帖臨摹殆徧其所書不過二三寸大凡單條屏幅流傳最廣無嗣詩文稿多散失濮川詩鈔僅刻其恬翁集一卷

張軫 字次微號畊塋工山水尤善寫松人咸呼為張松書亦道勁可觀

程士樞 字鼎臣康熙間歲貢選蘭溪訓導未赴卒

善擘窠大字嘗捐貲重修翔雲觀三清閣

○張授麟

字素臣號聽松善松梅尤精畫貓若花鳥

蟲魚之類濃塗淡抹姿趣各具嘗於書室粉壁自

寫大松次微畫小松並精絕遂顏其室曰聽松書

學大米其題款亦古勁有法

○濮演

字成章善山水人物而漁家樂尤擅場子著

山克繼父學

陸仲貽

善畫鬼子蘭言家世寫生尤精白描羅漢

其山水人物亦鬆秀年七十餘

俞廷諤

字揆千又號葵軒亦曰眇狂精印章為三

橋正派師事徐士白傳頗髣近世文氏篆學惟梅

里幽湖得其傳而眇狂實幽湖之鼻祖也

莊允錫

字廷占一曰浣躬工唐隸小楷尤精印章

為文氏別派

凌咨

字正堯工花鳥人物水墨大士尤佳

文揚武

字孔威工篆刻亦為文氏別派

○

張宏牧

字恕夫號懶髯能詩文工篆刻師事眇狂

而論識過之凡篆法悉本六書有圖章粉本一冊


自篆者八百方并唐宋元明前後五代墨鉤印二冊摹名人者二千餘方其用功如是注篆學津梁一卷增注沈秀納篆韻二卷詩曰懶集篆法行楷俱工

張宿 字漢木天資穎異天文理醫卜太乙六壬諸書無不研究訓蒙不給乃更岐黃活人甚衆遂少復故產立分編法與佃均收兼創條例若干欲上當事通行兩浙不果乃為鄉約正以孝弟化導閭里人畏敬之卒年六十四

曹誠之 精痘科善用藥方書靡不究人稱為醫學書厨

劉大楠 字讓木號復齋年十二補邑弟子員有俠氣一揮千金家素饒至復齋而消耗殆盡然持節不苟晚年以岐黃餬口尤精咽喉十八症無子業遂不復繼

何聖梅 工樓臺園林尤善小影人面如瓜子大無不酷肖寓翰林許醇夫家數年三十餘卒



壺範

○元濮貴一妻劉氏 年二十八歲夫死誓守喪葬以禮孝事姑婢教子成立有司奏聞詔建旌節坊

○濮宗海妻劉氏 宗海崇邑諸生妻劉氏溫靜別歷

年甫二十八歲宗海歿值元季盜起民間艾婦輒

遭淫掠劉屏膏沐同農家婦躬督桑麻暴卒過其

里皆不顧而去事姑教子孝慈兼至詔旌建坊士

大夫相與賦詩成帙題曰濮節婦詩編學博徐一

夔作序傳之

○汪佛奴 濮樂閭妾也樂閭歿誓無二志深藏尼寺以潔白終

○糜正妻張氏 幽湖人歸同里糜正生二子而寡年二十六誓養舅姑不再適舅姑歿鬻衣以葬二子既長告以父志俾從師讀書遂以儒名於世張之教也至五十七終貝清江為作孝節傳

○龐氏唐氏 濮彥仁妾洪武初籍濮氏家官收其產二氏義不辱遂經死人稱雙節程與隱貝清江俱為詩弔之比於綠珠之墜樓焉

○明濮九娘 失其母族氏明初歸濮勤事組織省穡操家務居三十餘年累貲盈萬永樂時誅楊忠烈姻黨濮氏星散九娘歎曰安有翁姑夫壻俱埋本土孑然女流乃向他方托處乎悉以家業分給貧親及施捨梵宇建修橋梁築數椽于墓旁長齋誦經以終其身濮九娘橋其遺澤也

○鮑文化妻濮氏 濮烈婦梧桐鄉鮑文化妻年十四歸鮑夫沒年芳二十四歲荒無養族人以少年無子欲奪其志濮氏知之即縫紉投河以殉事聞勅

建貞烈坊在桐治學橋南事在嘉靖中

馮倫妻張氏 年二十九倫故遺孤馮孜僅三歲乳
苦紡績奉姑教子孜登隆慶戊辰進士疏請旌揚
詔建貞節坊於桐邑治西太倉王弼州為作馮節
婦傳詩序

朱氏歸氏 朱氏曹元甫也妻歸氏曹泰寧妻姑媳
獲貞

劉尚文妻^孫氏 年十九喪夫撫二孤甫成立長復
天逝沈氏亦年十九矢節時有雙貞之譽次子廷

圭克振家聲孫駿聲名重邑庠

濮遠字且齋妻馮氏 早年喪夫苦志守節孝養尊
姑撫遺腹子芳成化中

濮梅涇諱應麟繼妻羅氏 苦節隆慶間特旌子一
元齡

仲應鸞妻徐氏 年二十一夫故止有二女未幾次
女亦卒攜一女不辭艱苦貞節自矢竟以壽終

周思誠妻曹氏 年二十八思誠病卒遺孤應驤纔
六齡次應驊止彌月時翁姑已逝門戶無人周幾

不祚矣曹拮据晨昏孀操獨勵撫二孤俱成立年近六旬以壽終應驤中年亦故無子驤妻王氏亦厲冰操克紹曹德應驤恪奉母訓忠厚傳家教子璋瑄俱入泮

秀人朱承溪妻陸氏 承溪明季秀邑諸生也妻陸氏二

十七夫亡誓不欲生翁姑泣慰之乃止縞素終身足不踰閭時住正家塘南子玉亭遷於鎮

○鍾應宮妻呂氏 應宮庠生積學敦行為鄉里冠卒於京家產日落時諸孤尚未成立姑壽九十有五

氏奉上撫下各盡孝慈教子貞泮林有聲次葵鳳翔府推官次超濮州太守

○沈壽母潘氏 沈廷鈺之祖母沈海鷗壽其九十詩

云雪鴈八朝新鶴髮膽包三世舊熊丸可想其槩

國朝王錫恩妻曹氏 年十四歸於王時方鼎革離散變遷氏操家事姑即有禮法十九歲遽稱未亡人長齋衣素撫姪王者治為子有聲豐序壽五十

六

○王烈婦 歸慧卿妻年二十一無子康熙八年慧卿

病死死一日氏即投環柩側二柩並發觀者無不
泣下嘉郡潘世奇為傳以記之

仲九霄妻山氏 順治三年九霄病故氏一慟嘔血
數升不數日亦卒子宏道附祠志淑行中

沈文瓏妻劉氏 瓏沒氏事姑以孝率羣下以勤凡
戚族嫁娶喪葬咸折衷焉教子鳳翼藝苑飛聲與
明經選奉憲給額曰柏節松年

周玉涵妻徐氏 十九歲喪夫撫遺腹子成立壽六
十有一

歸泰初妻張氏 年二十二夫故撫遺腹子成立苦
節五十年

方奇妻潘氏 姚江庠士映碧女歸桐邑庠生方奇
年二十夫死無子茹素終身避人樓居三十年撫
憲題旌建坊入縣祠學使者彭公始搏給扁曰姜
孟同芳

孝女張惜惜 里人張乾之女也五歲喪母無兄弟
父女相依十載父得痼疾惜惜侍湯藥甚謹父病
篤目不交睫者逾月度父疾必不起恐以貽父憂

預為父整備衣衾告其父遂不食先父而死父撫其尸上下衣裾針縫牢密勝於為之斂者又具數日糜以遺父越三日其父亦死友人莫之於其先塋女祔焉

沈雅恆妻曹氏 雅恆美丰姿善鼓琴二十餘夭亡

氏撫子女成立婚嫁悉取辦於針黹壽逾八旬

濮景臺妻沈氏 賦性端方二十歲喪偶家貧氏躬自勞苦奉翁姑甘旨無闕撫子女成立不幸子故復撫其孫成立年七十壽終邑侯何金蘭表之曰

貞標壹德學憲王揆旌之曰挺節凌雲

濮紫衡妻沈氏 家貧無子夫亡苦節自甘翁姑喪葬盡禮復祔其夫於祖塋皆十指紡績所蓄仲改卷題為女中丈夫

屠有禧妻董氏 年二十六守節撫子二女一成立族相繼沒復撫諸孫督課嚴而有法卒年七十七以孫嘉正貴贈恭人

沈孝婦周氏 沈我山妻姑年衰病牖氏斷兒乳乳姑姑疾以瘳歲癸未二月望里中訛傳兵至我山

館于外周侍舅舅命攜兒避他所氏曰舅在新婦
焉往卒不去哉山歿子孔鍵三十未娶外氏請婚
氏固却之女歸桐鄉徐乘龍乘龍早亡誨女請婚
守節事姑母姚氏無依迎養於家姚沒哀毀卒年
六十有八

○朱鳴盛妻蕭氏

鳴盛字驚奇未婚而死蕭聞遂告

父母易服登朱門朝夕擗踊姑憐其志以長孫克
紹為之後苦節二十載

○楊煥妻程氏

庠生程堯相女許字煥未婚而夫氏

聞訃即奔喪號慟欲絕遂留事舅姑恪盡婦道舅
姑歿歸母家守貞歷五十五年

沈焯妻濮氏

性貞淑嫺禮節年二十九夫歿冰霜

自厲訓子甄塏俱能文韓慕廬贈畫荻遺徽額

○許烈女

桐鄉柴窰港人農家女為強暴所逼忿恨

烈女

自縊死時年十三縣令劉公瑄義之為文往祭請

於當事旌焉松陵黃容有詩紀之載卓行編

○朱貞女

朱聖成女許字陳禹錫子嘉齡甫弱冠而

有補

天青年矢志飲茹冰蘖者三十餘年

陳延緒繼妻孫氏 緒故時氏年甫二十四守志六十載撫前氏子曾裕成立邑令願其堂曰錚錚女士

沈方岳妻項氏 二十七夫亡誓守歷翁姑夫若子五喪五葬悉合禮節甲寅里有土寇衆爭徙匿氏謂家人曰寇至我則死耳終不出閭教子履端入泮學使顧公旌之

鍾鼎狂妻曹氏 年二十九守節子煥甫三齡孝事翁姑教子成立年逾九十五世相聚學使者旌其

門曰柏舟繼美

鍾氏 許字蠟作街鍾天祿之子未婚而亡氏不願再適造夫家抱木主成禮守志年六十餘而終康熙四十年間事也

周瑄妻曹氏 年二十三夫亡守節三十三年非至親不能見面撫遺腹子世壇讀書成立

沈廷聘妻夏氏 沈星來之弟婦也為養媳不容于繼姑其夫恐逆繼母意遠出未婚婦誓不他適夫間道歸訪其婦矢節不嫁遂飄然去終身不一見

事聞得蒙旌獎

方聞然妾范氏 年二十餘聞然致艱苦備嘗矢志
撫子女舟成立梁相國薌林贈文云為妾者未嘗
束縛以必終而竟以節顯此其節為何如乎壽七

十餘

三

徐烈婦 徐偉長之冢婦夫死父欲嫁之服滴死

沈載錫妻項氏 三旬無子女夫亡即服滴死前後

祇數刻間

三

陸烈婦張氏 蠟作街張載皇妹幼字陸氏子及笄

陸病以俗例冲喜成婚合卺畢即分榻卧日夜侍
湯藥衣不解帶者逾數月夫病革預縫其內衣既
屬續即飲滴死雍正六七年間事

三

沈烈女 陳家木橋農人沈季方女字姚氏子未婚

夫死即痛哭不止自經以殉

夏 妻姚氏

徐貞女 太學生徐若初女未婚守志工詩為閨閣

師其悼亡詩云良玉沉淵劍化龍人間何處再尋

踪傳聞作賦歸天上知在瓊樓第幾重

王氏 許字管氏子未婚守節

楊甸英妻曹氏 年十九守節撫姪景範為嗣景範夫婦歿又撫其遺孤成立茹荼飲藥艱苦備嘗乾隆壬午秀邑令關周孫公贈玉質米心扁年七十

九

濮南姓妻沈氏 早寡撫姪炯為嗣炯入黽序夫婦同時病歿攜幼孫依夫弟元亭以老壽近八十苦志幾六十年

沈禹周妻夏氏 青年矢節乾隆年間其孫宗倫請

旌建坊於正家橋

陳窠妻濮氏 許字桐庠生陳窠字俞讓未婚守節

陳古銘為作濮貞女傳建貞節坊於陟門

○徐貞女 父晨山自幼訓以詩禮許字沈氏子父歿

哀毀不欲生閱半載夫病天聞訃歸沈氏夫叔母

鄭氏故守志喜曰此我同心人也遂聯榻寢處誓

終身焉時年十九初歸時取舊所作詩草悉焚并

或傳其立夏日哭父句云不知地下逢今日也有

青梅佐酒無此外無存

孔傳偉妻施氏 傳偉桐邑諸生貧而勤學患瘋疾
二十三而沒氏僅一女母子鬻鬻朝夕不給依其
弟長森女長擇壻嫁之畢生艱苦處之泊如年五
十八而卒

壽母莊氏 年九十有九強健如四五十人猶勤紡
績去百歲無幾而終其壻顧子昭亦年八十餘尚
健步猶赴人家夜宴

○劉貞女 劉讓木女名有姑許字鍾生未婚夫女聞
不言而神傷父婉諭之閱半載更許字方而女旋

病謂母曰病死勝尋死母勿悲試舉一字令女測
之母指案曰碗女嘆曰我心匪石不可轉也宛其
死矣當在今夕是夕果歿年二十三

曹瑾 妻張氏 節孝建坊陡門

曹甸繼妻徐氏 節孝建坊陡門

鍾垣 妻阮氏 旌表建坊陡門觀音橋西

黃履全妻顏氏 旌表建坊萬壽山西

濮彩山妻李氏 節孝建坊陡門大通橋東

濮炎 妻沈氏 節孝乾隆四十六年請旌建坊正

家橋

楊庭堅妻王氏 旌表建坊陡門嶽廟西

楊士發妻項氏 旌表建坊陡門嶽廟西

○吳烈婦 住三角墳夫號雲海早卒翁姑欲奪其志

婦先溺其女遂自縊湖州沈野鷗徵詩遠近并請
題于當道云

范氏 濮在方諱嘉策妻氏年二十四夫故子一多

病家漸落歷冰霜四十年無疾而終

濮氏 沈某妻濮澹軒之姑二十歲喪夫氏守節父

族歷四十九年苦志以終澹軒得氏撫育曾請當
事表揚

張氏 濮書廷諱景丹妻氏年二十二夫故家貧無
子專工紡績以助薪水善事翁姑年六十三歲

濮氏 庠生陳雲錦妻氏年二十六夫故家貧苦志
四十餘年

濮氏 監生仲煌妻氏年二十八夫故志苦力勤乾
隆甲寅氏年六十稱觴固辭子均等獨建西河坊
福壽寺東迎龍橋族兄濮啟元題柱云母昔抱貞

曾息鳳孫今持節建迎龍

○


陸貞女

陸秉乾之女許字濮聲和之長子雲翹諱

烈女

廷松嘉慶三年正月雲翹得時疾身故女方炊飯聞夫死不易時遂登樓易髻縞素繼死士夫各賦

詩以弔其貞烈



流寓

流寓不第秀桐者以訪述力辭

周范蠡 少伯送西子於吳三年而達嘗棲遲境內
自昔相傳有范蠡藏兵塢洗足灘諸遺迹在幽湖
畔而市上又有妝橋臙脂匯之名世遠蹟湮姑傳
其舊至於生女名亭以誣少伯則陸廣微吳地記
之誣前人已辨之矣

元趙孟頫 子昂吳興人與濮鑑善嘗往來鎮上濮
氏捨宅建寺為之題梁夫人管仲姬畫竹于寺延
祐己未謁告歸鑑已歿為作墓誌銘而曹太史半

葬塔銘亦其所書至今在

楊維禎 鐵崖山陰人少遊濮川因館於濮氏仲溫父子創為聚桂文會一時文士多以文卷赴鐵崖評其優劣焉張士誠招之不赴明太祖定天下應詔修纂禮樂書濮氏桐香室松月寮等記俱出其手過雙賢橋者猶想見其人焉

△

鮑恂

字仲孚崇德人元統己亥鄉舉第一明洪武十五年詔徵耆士入見命為文華殿大學士固辭放歸幼受易吳草廬著易傳古義嘗居梧桐千金

入經
學

二鄉至正初徙居西溪故號西溪隱居與程柳庄貝清江等結社於濮鎮有八景詩題周青士云西溪漫稿傳絕少曩聞海鹽胡氏有刊本求之不得也

△

明貝瓊

字廷琚崇德人居千金鄉父山南師同邑

入經
學

黃次山及楊廉夫元季教授生徒嘗主幽湖朱顯道家洪武初舉明經庚戌詔修元史士子校士浙省召入為國子助教分教中都前後五年所著有清江集子翔楚府紀善翻都督府經歷翔國子學

錄並以人材舉世其家學

○宋濂 字潛溪浦江人曾讀書濮鎮之梅涇與江朝宗鮑西溪輩相往來後輔太祖定天下為學士一時大著作皆出其手在梅涇時青田劉基亦相過從寧海方正學孝孺其高弟也一時聚合亦見地靈云

○江漢 字朝宗會稽人元季落魄不羈客遊濮鎮濮氏館之留居數載洪武初以文學召為翰林院編修嘗應制賦元日早朝詩賜以緋袍後請老遂家

於濮每遇宴會恒被賜緋以彰君德云所著有月夜清遊集

文徵明 號衡山吳人官待詔館於楊荊賓家為書啟明樓及嘉樂堂額文氏鐵筆里人遂得其嫡傳戴笠 字曼公杭州人能詩工篆隸潛究素問諸書

嘗懸壺於鎮之北橫街崇禎中楚蜀亂笠慨然曰

此非君子避世時耶遂泛海至琉球後其子訪之

不亡而後彼國造祥麟院以居其父尊為戴夫子隔水通問

此邦無恙乞同父歸不許其國厚贈其子而還

鄭光祚 字四維餘姚諸生善天文明季隱居梅花
涇友人招赴省試作老女詞見志授經教學不履
城市自號剝碩山人卒年八十著有樵父吟子典
字子韶庠生工詩且孝友著廡下吟幽湖集廣陵
古蹟諸集王阮亭擊節其詩欲客之不可自號友
陶居士

畢緯前 字西臨吳縣學生有詩名爲楊瑞元之壻
濮鎮鍾來霞詩云猶憶當年擇里居風淳却愛梅
花市寒軒窗過日周旋拂拭頻蒙不我鄙當時技

贈者甚衆所著有當泣草

國朝張彪 字虎山徐州人鎮南多盜如楊文朱倪
之類騷擾積年彪以叅戎駐劄院境漸次翦滅里
人項孟卿沈爾任輩咸贈以詩

陳素 字涵白號天山道人居桐鄉屢過梅涇與沈
海鷗輩遊明季棄官後縞衣綦巾詩文俱清勁有
法康熙中學院陸祀其主於鄉

陳文沂 字宗韻松溪人往來濮鎮與濮澹軒戴曼
公沈海鷗以詩酒相倡和

徐臻 號而菴松江人與佛著交來遊福善寺有癰
瘕疾旋與佛著全往徑山

張宏保 字石村海寧人書學董文敏康熙丁亥戊
子間寓寺之永照房墨蹟甚多釋錄著曾刻其所書
趙松雪漢鑑摹誌銘楊長史寺碑及十字文帖

王巖 字補雲盛澤人畫學李唐郭熙久寓濮鎮見
推於石門吳孟舉秀水朱竹垞兩先生人爭藏之
沈之璜 字于王鑪鎮人為甬江仇滄柱門下士湛
深經術以五經屢試不售設帳濮鎮及門中甲乙

榜者八人

錢聖潛 自姚江遷至濮居施家東荒小圃詩詞歌
劇書法印章皆非凡手所及尤善花鳥嘗遊杭寄
佛慧寺為溫州守聘去卒於溫鄭耕餘贈詩云文
章工後即飄零洵不誣也

鄭梁 字寄亭靖江人書法宗衛夫人謝太傅

姚子仁 號紫潤新安人三歲時從其父來居濮川
至七十三歲復歸故鄉在格山之姚村一時異之
諸名士咸贈以詩

父
叔
弟
兄

陳選勲 字碩公餘姚人遷於濮有藍染齋集子樂

字變一有故鄉草梓字俯恭號古銘舉止方正私

淑楊園先生詩古文詞一時作手書宗懷素自成

規格有客星零艸寓破草及一齋文鈔偶存等集

無子老仍歸故鄉

周呂桐 字儀封杭州人歷世武科後遂占籍桐鄉

以武舉任衛千總

潘亮 字燭微越人寓居幽湖著一得吟一卷

沈宋 字則菴德清人沈南屏之孫也工花鳥墨燈

里中自吳江吳鳴甫以別紗擅絕一時至今珍之


宋以寫生繼其後寓濮幾二十年其表章吳烈婦

徵詩請額尤卓然可傳者

范時濟 字巨川杭諸生工詩古文館於幽湖與陳

謹堂陳古銘張霽陽輩游嘗與古銘及周緩菴私

淑張楊園先生講性命之學後卒古銘為作傳



方外

宋惠忠 宣和間僧為化壇淨土禪院開創之祖

智明 嘉祐間從靈隱來依里人陳德明以居為之

結菴曰三教堂禪師行業碑記尚在

元志浩 字東溟初居崇福菴福善寺成為當寺開
山之祖

月庭 字了生本居積善菴漢鑑創寺與東溟同延
主院事遂合二菴名其寺題梁並列二師之名於
其上

○克新 字仲銘鄱陽人宋余襄公九世孫能詩文主
席於郡之水西寺與江朝宗友善過濮司令濮樂
閑留居化壇講經三載往來倡和皆一時名彥所
著有雪廬詩集

鄒道寧 元明觀住持提點也元統中濮允中建三
清閣道寧題梁岳岡卿稱其潔志虔修云

○古心 女僧名文鑑姓濮先世以貲雄於鄉十四歲
即斷葷穢禮廣福禪師為嗣復受記于天目中峰
本公即於鎮西建大利請於朝勅賜福壽禪寺仍

住廣福至正甲午歸福壽坐化分葬其骨之半於
兩寺語備曹太史塔銘

○琦楚石 象山人初祝髮於鹽官之福臻院十年行
脚大闡宗風元至正五年講法華經於化壇村夫
販豎皆得講義禮拜盈庭濮司今留主福善寺固
辭明洪武初徵赴京師作大法會事竣賜黃綾戒
衣一襲高麗鉢一握仍回鹽官示寂學士宋濂為
塔銘所著有淨土詩編

明妙用 名原體初住法喜寺永樂癸巳里人延主

福善寺寺宇傾頽僅存一殿師毅然以興復為已
任居寺凡四十三年有功於本寺甚鉅

德琳 先是寺非大刹住持無正員正統中德琳具
興創始末詣錄司自陳始領檄為住持遂得與東

南大刹齒

似碧 德琳繼席未暮歲兩廡煥然一新凡未竟之
業盡次第舉之

姚道安 福清道院道士洪武間重建西觀

守誠 字敬堂古杭聖果山廣無際之孫主化壇

宗裕 字綽菴守誠弟子繼主化壇二僧以興復為
任古殿一新復建松月堂置田七十畝化壇中興
智深 字大淵宗裕弟子殫力院事念師與祖中興
拮据遂構樓立塔以其遺骨瘞焉

徐松溪 正德間翔雲觀道士徧歷名山受異人正
一符籙金簡玉字以年老未試授其徒思齊於是

歷有法士

羅思齊 字雲泉少負奇志骨相殊絕受其師元秘
闔門靜煉召神伐祟靡不奇驗嘉靖壬子夏大旱

郡伯延師禱雨甘澍立應年八十猶赴四方之請時稱十雨法師以其十禱十應也

文淵 字近川俗姓劉居鎮西北少祝髮于福善寺之崇遠房繼為楞嚴監院與請大藏賜紫衣為三教菴中興之祖福善荒頽以經營自任自隆慶戊辰至萬歷甲申凡十有八年而功竣馮祭酒作記錢有德 字仲暘思齊嗣孫萬歷間人雙眸炯炯容貌絕偉歲遇旱澇有禱輒應有司每獎異之

秀峰 天啟間福善寺僧日誦法華經寒暑不輟壽

九十七而化荼毘時蓮花無數現火光中

潘爛頭 前朱廟黃冠也有道術能致風雨往來濮川有玩月者不禮於潘潘於壁上畫月形以片紙粘之月遂雲翳其人求潘去紙月皎如故嘗一日召天神至竟無事神以硃筆點其首遂爛故人號為潘爛頭云

按潘在桐志傳為青文獻以本廟師弟相承實無其人而唐之鳳前漢里東嶽廟碑云係在是廟者未知是否姑仍縣志存以俟考 國初以來故老相傳謂其嘗寓翔雲觀云

王文正 字衡石兼通儒業專精元教崇正間頻遭

旱魃奉檄禱雨悉有神效當時給扁額冠帶實有德之嗣孫也

心傳 字受囑漢鎮董氏子也創建碧光菴當鼎革時有鎮將服其高潔難民數百人賴以保全後住持楞嚴寺

幻兮 為文節法師之嗣弟新賢授禪院操行高脫後主蒼蒲院事遂命其徒戒矛續成遺緒

國朝真悅 字兌心 國初鎮南多盜里人張斗瞻請一衆將勦除願輸營房與事者中飽不構故兵

撤去順治甲午划子船數十白晝劫鎮張復請兵入寺借寓天香房師執不可云今日一借永作營房矣主者窘辱之師不校後居天寧寺終其身焉聞見錄嘗錄其詩

天鑒 不知何許人住福壽禪院有奇勇 國初嘉會都羣盜為患張叅將彪奉檄駐防院境一日坐馬踐其寺師手麾之馬幾斃張怒往詰之師方跌坐蒲團忽張目呼其名張輒伏地請罪蓋故明將張其部曲也由是偕往除盜盜悉平後不知所終

三猷 住福善寺方丈能啖肉數十觔酒無量與沈海鷗交海鷗有犀杯旁鐫海翁大雅四字是其所書相傳師為青堆施閨章之族嘗自題其像曰這漢力舉千鈞下筆萬言固知非常人也

西來 不知何許人初至鎮人問何來曰西來問其名亦曰西來見水月菴止一老僧遂與同居好焚香古鼎間有僧道來訪中夜或笑或泣人莫知其因漆工王四惡徒也數忤師意以兩指扼其喉王大困由是斂迹嘗於酒後舞鐵杖瓦石不能入臨

化取所貯文卷向同住僧曰此我一生事留之無益悉自焚去

妙璞 字含輝楊止垣次子出家於福善寺之南隱房杜門課徒不妄交接工於吟詠其烏啼詩人爭傳誦之

具德 字宏禮靈隱主席康熙甲辰里人邀主福善寺師命首座佛著應之因偕行至濮為作募修寺

引

佐惺 字佛著山東博平人由靈隱來主福善丙午

重建大悲閣又建東西二樓築基之日有五鶴來止千佛閣因名丈室曰五鶴堂詩有豪氣書法瘦硬通神後退居水水菴終於徑山壽七十五所著有龍潭集

諦輝 由霸隱主席福善寺未幾去師後有聲靈隱而於濮鎮緣淺齋厨索然人稱為諦倒灶云

鶴峰 由徑山來主席福善宗律湛深溫恭樸謹期年有一鶴翱翔殿閣里中能文者作獨鶴來朝詩贈之康熙戊午重修正殿仲改菴為之記

明修 柴窰港人向在福嚴寺職運水後供役福善康熙丁亥亢旱出資開井供衆里人李楨素陳鑑民等各捐金構亭其上名曰延年井顧南樓記張石村書

巨莖 主席福善募造殿前大鼎修鐘樓顧太史贈序後終老於揚州靜室

計位 字良菴南隱房僧善蘭竹水墨山水與人交然諾不苟

成恆 字天鑒號湘南福善寺西房僧鬚眉修整工

詩文書畫入都

聖祖巡幸天津召對稱旨

寵眷甚厚為海光寺開山之祖康熙六十一年

勅賜福善為香海寺雍正初捧額歸時已三賜

紫衣兩錫名山一時榮之後住持天童坐化有

詩文刻集旋散失

寂解 字豁眉寺西房僧勤修好學至耄不倦喜詩

書習形家言生平抄錄甚多率皆散失年九十三

化去所著有開山一覽本寺修造記聞見錄等書

其詩集亦附濮川詩鈔

沈宸 西觀西房道士嘗學法寧隱山受張真人

府劄付

涵輝 主席香海幾十年臨水建山門于香花橋左

建韋天殿整理之功最多撰訥無文里人嘉之後


歸老於杭之半山

李秉忠 字書誠土地廟東房道士受真人府劄付

鬚眉整潔言動不苟

朗開 主席香海建觀樹堂整鼓樓築禪室亦通儒

書兼精書法後退老于石門之洲錢



濮鎮紀聞卷三

里人胡琢其章述

記傳

三教堂知明禪師行業碑記

宋陳德明

智明禪師宋嘉定十一年侍癡絕冲禪師住徑山紹
定間遷嘉興之天寧寺禪師志立苦行隱於秀水零
宿鄉依檀越陳德明結菴道風遠播淳祐間冲禪師
遷住杭之靈隱未幾退歸金陵明禪師復遠侍靜修
禪悅
初檀越申明郡邑為禪師建一草庵菴

俟命扁曰三教堂蓋禪師能三教之道也且教有三
不同而三教 人之心則同也垂老 呼弟子一
清于前面命曰出家者本為生死大事了明心 豈
有工夫為俗事耶汝輩宜省之不可虛叨出家之名
言訖端坐而逝壽七十八一清奉師塔於菴後香火
不絕吁三教堂者前有智明禪師有光于前一清能
繼之於後宗門如此可謂祖述得人不墜也是宜記
之勒于石以垂不朽庸書此以記

濮鑑墓誌銘

元趙孟頫子昂

皇元以仁治天下列聖相承視民如傷一夫或飢由
已飢之有能出粟以賑者輒予以官其資之崇卑視
粟之多寡著為令故雖有水旱之災而無捐瘠之民
此堯湯之用心也大德丁未歲大祲濮君明之捐米
三千石以食饑者全活無數府上其事遂以應格登
仕版焉君諱鑑字明之世居嘉興崇德之語溪即春
秋所謂禦兒也曾祖考諱敏祖考諱世昌宋承信郎
考諱振宋承節郎兩浙東路兵馬副都監婺州駐劄
君性明達而處已以謙待士以禮鄉鄰有爭常和合

之創佛寺曰仁壽曰福善曰永福曰報恩曰普濟創
道觀曰元明又創永安東嶽兩祠為義塾以淑學徒
為井幹以便行汲為津梁以濟不通為櫓櫓以給死
喪名山大利捐金捨田夏設無碍浴冬設無碍粥印
施藏經周恤孤寡其樂為善蓋天性然也初調富陽
稅務官繼授將仕郎淮安路打捕同提舉皇慶壬子
春馳檄歸家上塚指祖塋之西大樹謂僧曰我死可
化於此眾訝其語不祥皆愕然貽相視是夏復還官
次連日樂飲忽瘍發於項初以其小而忽之樂飲如

故屬方盛暑疾日以劇遂不可為其卒六月廿有八
日也年五十有一喪之歸官吏遮道以祭士民無不
嗟惜渡江而南風日恬美波濤不驚抵家僧俗吊者
系道梵唄之音不絕於耳為人所嚮慕若此孤先中
不敢違先人之意以是年十二月九日火化於所指
之地奉函骨於堂迨今八年先中曰吾非不能葬也
顧函存則親存葬則已矣是以弗忍也然豈終不葬
也即乃卜以延祐七年十二月二十七日祔葬于祖
塋之旁娶沈氏嫡子一人先中也女一人適卜氏庶

子三人俱幼繼娶趙氏生一女亦幼孫男二人女五人允中來請銘於余惟君輕財重義蓋積而能散者是宜銘銘曰邦本惟民民不可飢發廩以贍固邦之基錫以一官禮亦宜之盍躋上壽何止於斯有子承家報其在茲元翰林學士承旨榮祿大夫知制誥兼修國史吳興趙孟頫撰

○古心禪師半墓塔銘

以祐吉古語

元曹

鑑克明

師諱文鑑姓濮氏語溪梧桐鄉人也先世以賞雄於鄉師生而異稟柔而衷剛早喪父即屏斥華靡邈然

超方外想兄母適許里中富室毅然曰欺我無父耶而以身售於人甫十四斷葷戒穢從比丘尼教誦其法而習之又二年日欲祝髮兄母卒不能奪遂棄族往禮廣福福禪師為法嗣復授記於天目中峰本公所得尤邃亡何福住湖之郡以師主其藏室尋歸故山因念慳嗇滋殖吾佛所戒莊嚴無著何害於法於是倒其儲橐即其所生屋廬之旁建大佛剎請於朝勅賜福壽禪寺金碧香花日率其徒精修慧業以古心自號暇則歸省其母一如在家時如是者十年至

治間廣福虛席大衆及諸檀主以狀聞于宣峰請師
住焉寺當南北衝僧行千餘指清規淨約歷七年如
一日至治庚午秋七月偶被疾歸福壽寺轉劇病且
草跣跌堅坐了無戀滯前其徒歷叙平居行實訖怡
然而逝師生于至元己丑二月十有七日歿于至順
庚午七月十有六日越三年秋九月其上足弟子如
淨以其骨分葬福壽方丈之北廣福退居之東南隅
從治命也前一月如淨以狀來請銘余往年將赴集
賢之詔舟次語溪師聞之肩輿來謁語次從容以其

師福禪師塔銘為託余未之諾也今師往矣意者師
之光識將無以此易彼耶淨之請誠不忍拒故銘炯
炯古心質柔志剛不欲穢濁以當純糠幼耽佛乘脫
去簪珥載參載謁悟彼貞指廣福嶽創始宋遷師
其主之秩秩後先既築福壽使母之養朝唄昏定寒
燠靡曠已康何嫌藏為荼毒魂逐流火逝彼乾竺語
溪桐鄉巍為二丘我銘用昭千載斯遊元集賢侍講
學士中奉大夫曹鑑撰翰林學士承旨榮祿大夫知
制誥兼修國史趙孟頫書并篆額至正辛卯年十二

月吉日如淨立石

雪筠齋記

元釋克新仲銘

稿李濮君敬之扁其燕居曰雪筠齋或以為白太傅謂竹本固固以樹德竹性直直以立身竹心空空以體道竹節貞貞以立志此竹之常也濮君不取乎是而曰雪筠者其必有說乎雪廬子曰大凡達識之士取物以名乎居室者將朝夕觀省以為砥行礪名之鑑非徒為娛適之奉而已夫竹平時無以異乎凡草木及夫嚴冬沍寒飛雪彌天積白盈尺萬卉摧壓失

其故常而竹獨蒼然益翠挺然不撓此竹之變也有似乎君子處時之變鈇鑕在前鼎鑊在後而志愈厲行愈堅而不可奪也濮君不取竹之常而取其變也豈徒然哉蓋所以為砥行礪名之鑑焉耳濮君嘗為郡推官與余有從遊之好故因其請而推其意之所以異於白太傅者如此

桐香室記

元楊維禎廉夫

秀濮氏某府君濮津之桐鄉始居成聚已而成市其土廣而墳無高山大谷之深阻所植多嘉樹美箭篠

說有梧桐甚大鳳皇嘗集其上故鄉以桐名余弱冠時嘗遊覽焉曾識濮氏樂間公之折節下士尤切切教子弟不遠千里而聘名師其子仲溫好學不倦題其修業之所曰桐香蓋取詩人李長吉語以名也後余在吳有為典市官者日中與市者相質劑夜則歸讀書石轅且嘗遺書於余道其所志欲請業焉則知為仲溫余訝其人生統緒家且既仕而又嗜學如此非賢者能之乎已而仲溫棄官還家尊師取友以卒其業余在雲間仲溫又介余友鮑仲孚招徠余公觴

余知止堂上仲溫退侍余桐香室中相與校讎經籍商論文墨為事瀕別請室記昔屈子著離騷以香草比有德之君子傷香草而不芳者有之矣而未聞以桐蓋卉之弗露于性者不穠於色則烈于香不烈于香則厚于實而已耳惟桐性靈花之折葉之落占歷者以之而其枝之所傾有以集鳳凰材之所取有以中琴瑟詩人以香屬之殆不可與凡卉之臭味同議矣故曰桐之香鳳之集也噫桐之香鳳之集德香而爵祿集理之所必至者仲溫植其德如植桐然自拱

把之日無牛羊斧斤之戕勢不至于霄蔽日不止也
根益深蔭益大香益遠吾見仲溫膺爵也天子賜進
士第起家以顯揚其親展布其平日師友之學更有
涯涘乎哉故余樂為之記使人知桐香非直為集鳳
之其實濮氏之德之符也繫之詞曰梧桐生只有在
濮之陽桐之香只翳鳳之翔維君子之鄉梧桐培只
在濮之除桐之香只伊德之符維君子之居

松月寮記

去秀之西門外三十里所其聚為濮市濮公子仲溫

之世居焉居有前後邸第義庄塾以教養里之才子
弟仲溫自幼從師學明經既通尚書後學易又從余
學春秋兩充鄉試而不赴適丁時變遂作道士冠裳
尋山澤間欲挈妻子為鹿門之舉事未遂則闢寮一
所植松數章高秀蒼古若深山木客之出在市廛仲
溫與之俯仰嘯咏若友焉天氣清明月在松頂仲溫
彈琴松下琴餘讀道書作遊仙吟不知身世在黃塵
中而在白玉宮闕也遂以松月道人自號雲間盛茂
既為圖之而又寄自作松月詩一篇於余徵文為記

余為論積陰之氣清而久者在天為月麗月之清於物之秀者在木為松桃之得於月也清而妖柳之得於月也清而蕩梧之得於月也清而淒梅與竹之得於月也清而癯惟清而秀秀而已治者松之得於月也以此然得月之得而見諸名人者自唐常建後未聞其人焉建之詩曰松際露微月清光應為君噫此建之得於松月者未易與俗人道也去之五百年而仲溫氏復得建之得而其詩有曰丈人夜開闢涼月在松頂此其得於松月之得者奚減建也哉嚮使仲

溫氏早時墜官或至五年十年即不墜不過趨馳風塵中志不直達而性光先有損其能哦松哦月而有得哉嘻仲溫氏之彼失此得其有能辨者已書之案為記至正十三年癸巳七月七日

環碧堂記

明 貝瓊清江

檇李南五十里為幽湖巨族朱顯道氏世家於此築堂若干楹而水周其下題之曰環碧前御史中丞番禺周公伯溫以大篆體為書三大字復馳書鳳陽屬記于予初予主顯道嘗愛幽湖之奇勝蓋脉絡自南

湖洄而為狀旋而為渦至是左右回抱青停黛蓄尤
形勝之所萃焉使其奔放莫遏則悍而可懼渙散旁
流則弱而易狎又何足以為奇勝也觀其方春雨止
波瀾浩浩與天相涵不見洲渚而王睢翠碧往來其
中景之觸于前者何如也及清秋之夕魚龍在壑衝
風不起顛倒星月而舟人漁子擊榜歌呼景之會于
心者又何如也方全盛時並湖而居者非一飛樓湧
閣雖南湖不足侔其壯麗而堂據一湖之要蓋有無
窮之趣焉時方縻于王事遂舍之而去客京師者二

年分教中都者三年汨沒埃壒之中未能有其一曲
以復從耕釣而徒懷想于二千里外今為顯道之所
專也按朱氏世為檇李人其始祖某宋文林郎侍科
院官其子思明仕元為進義縣縣尉轉嘉興縣錄事
司判官思明之子青陽教諭仁甫先後相繼逮顯道
已四世矣今一境既剏于兵此堂復葺而新之挹空
翠于几席之間來清飈于笑歌之頃固可以盡四時
之樂並見文獻之家與幽湖同一悠久也顯道業攻
醫得九鍼補瀉法于金華玉瑞卷實出竇文貞公之

傳故非一時庸工所及性尤急于治人而人賴以全者甚衆則天之報施又可必者矧諸子若孫讀書好古予知後益隆不替非止于是而已異日解組南歸艤舟幽湖重登環碧之堂又當述而賦之云

仙考

○ 糜母張氏孝節傳

明 貝 瓊 廷 珩

檇李之幽湖張氏女歸同里糜正生二子而寡時年二十有六嘗養舅姑不再適舅姑歿粥衣而葬二子既長告以父志俾從師讀書遂以儒名於世咸稱張之教也至五十七終貝先生曰婦之事夫猶臣之事

君惟貞與信而已貞則不墮其節信則不貳其心然上下數千載之間求之千萬人之中如衛共姜者千百而什一也有元之興聞共姜之風奮於閭閻克盡貞信者非一而余之所知者京口之王氏新安之吳氏尤較然著明者也當是時朝廷清明方將以貞信之行勵化率俗故有司特上其事咸旌其門斯為盛典已若山嶽海聚素無詩書之習而有貞信可稱者則姑胥王珩之母檇李糜實之母焉實母於夫之歿也堅執婦德歷三十年之久凜然如秋霜烈日使死

者作於九京則見之而色不怩心不餒其去自淪於禽獸者奚啻萬萬視共姜亦何遠耶屬四方有戎馬之事不得上請而旌之以為天下勸然其貞信見於士大夫之詠歌者又可得而掩之哉當與京口之王新安之吳並立於天地爭先日月矣吁以一婦人之賢足以表之於世不與草腐木斃矧烈大夫不失事君之義者乎世降俗偷甚者叛於利害之頃未有死生一節如婦人者抑可嘆也夫亦可嘆也夫

濮節婦詩序

明徐一夔大章

濮節婦者崇德之梧桐鄉濮宗海妻也姓劉氏守節自誓國朝既混一崇獎節義以變移風俗節婦應行旌表里中長者咸曰不可使節婦之賢行無聞上其狀於縣縣上之會府會府上之禮部未報里之長者又相與言濮節婦之賢行未著比閭族黨之間適有不幸如氏者無所取法類得能言之士加詠歎焉庶幾有所感發得詩若干首乃相率踵門徵予言以序初節婦十七而歸濮氏又十有一年而其夫亡其夫垂絕而語節婦曰吾行與汝訣矣我有老母在前兒

子方髻鬢汝能養我母使我兒有成立乎節婦嗚咽
不能對其夫既沒節婦所以養其母與撫其孤者一
如遺命久之有諷之嫁者曰人之生世如輕塵棲弱
草不於盛年時思所以自處何乃自苦節婦曰婦人
之義一與之齊終身不嫁設或我棄其母與子而事
他姓他日何以見吾夫於地下願勿復言時方亂暴
卒所至掠人婦女無禁節婦本巨家子懼不能自全
盡脫去簪珥服飾擊髮垢面穿大布衣督僮僕治耕
桑狀類農家婦暴卒有過其里者皆不顧而去節婦

之處亂其善自為防大率類此故能奉其姑以壽終
撫其孤至於長大今年近六十人皆稱之曰節婦云
嗚呼濮節婦能砥節勵行於兵戈擾攘之秋及其老
也復見太平之盛不亦幸哉旦夕璽書南下翼然綽
楔於墟里之間有光榮矣柏舟之詩為衛共姜守義
而作孔子存而勿刪敦教化也詠歌風人之職因不
讓而為之序

濮川八景詩序

明陳邦獻

攜李之西南環曰濮川初本荒落元時有豪右濮氏

其富不貲雄於一郡居民咸聚而依之以貿遷成市
流水包絡其間故氏其川為濮焉嘉郡庠二教姚君
廷玉謂予曰吾鄉前輩鮑先生仲孚嘗摘是境勝概
謂之濮川八景多有題詠但世變人亡燬滅而不存
吾生于是長于是今雖縻祿在外而故鄉景物常在
吾目也因繪八景圖將乞善詩者歌詠之庶不泯其
舊且以適吾志也予曰八景之詳可得聞乎曰夾川
之畔比屋鱗次巨梁虹駕輕烟旭日往來憧憧者則
市橋曉色茂林修竹映帶疎檐時聞呬唔聲出於林

表者則林墅書聲川之北有層觀巍然為道流之居
恠石偉立其側高數仞上鐫翔雲字厥勢崇峻曰翔
雲仙觀其右有佛日宮制度宏麗天清而夕照凝輝
則金碧交煥鐘磬流音曰落日招提若夫南涇漁艇
則曲渠而通乎是川者也扁舟漁父舉網得鱗則趨
市以供酒客之需西村樵唱則秋原霜後木黍登場
樵者負薪以歸前者歌而後者唱也時若長空一碧
波澄烟歛素月涵輝灝氣無垠非幽湖秋月之良夜
乎斷岬流澌夕陽殘雪梅影橫斜清香時至非梅涇

雪霽之佳致乎予聞而喜曰有是哉子之善狀夫是景也昔柳子厚謫居僻陋憂辱之地而以愚溪八景為詠為詩皆愚其名寓其困苦鬱抑之情耳視子之優游閑暇適其所天非子厚之侔也且天下之名勝可樂遊者多而能知其所可樂者幾人哉濮川之景人日見之未嘗有知其樂而樂之者亦無異蚊蚋之過吾前也子能知之而樂之且以出仕承明而不忘釣遊之樂是則可賢也已善於詩者宜歌以繫之

按此序所稱八景與宋濂詩題不同而鮑西溪之詩不傳蓋名稱雖殊風土則一正不妨並傳耳

重修福善寺碑記

明楊 述宗道

嘉興郡城西一舍許有鎮曰濮院其地介秀水桐鄉二邑間福善寺當其中而專二邑之勝元至大己酉同知濮鑑創以居佛之所也相傳寺左右有二菴一曰崇福東溟浩上人居之一曰積善月庭生上人居之二上人者智性融通識趣超卓雅為濮公所敬慕寺成延之上座仍合二菴名其寺為福善無幾先後荼毘時歷年未多而寺固無恙嗣守之人懷奇見不得設施者有之而眾弗及知也國朝洪武乙丑寺併

叢林僧徒散去山門兩廡僧寮丈室佛閣鐘樓盡廢
獨一殿巍然而上漏旁穿亦已甚矣永樂癸巳里之
好事者慨茲寺久虛聞今妙用體師住持法喜名山
將謝去朋徒結茅歸隱乃率衆延致之人固疑師之
不屑就而師終不拒既入院政苦食淡焦思勞神毅
然以興廢舉墜為任而師道行高潔足以起人敬信
由是富者捐財貧者助力爰衆施益以已橐鳩工
庀材夜以繼日是年重修殿宇成越四年丁酉鼎建
天王殿塑天王四及加飾諸天十王尊像又三年庚

子先大父德潤公官遊京師過潤之金山謂都綱敏
機聰公曰寶銘期堂公昔棲禪室也自公典教大邦
日就傾圯失今弗圖恐後無及矣聰感其言問孰可
任事者即以師名對聰因出綵緞二貽書屬師改作
之師遂闢四偏隙地因舊為新建為大悲殿增創傑
閣其前而規制益宏焉宣德丙午他寺有鬻巨鐘償
官租者銅以斤計凡千三百餘直白金百三十兩有
奇師雖欲購之而窘於錢旬月間里人施予者相踵
既酬其值仍以餘貲構樓庋之正統己未千佛閣成

為間者五高深廣袤咸中尺度峻宇重簷隆棟厚礎
可經久而不廢明年刻大毘盧像千佛法身塗以黃
金安奉如式他如法堂方丈庖福庫圖之房與凡事
佛奉僧之器用靡不備其制之所宜有而伸其志之
所欲為矣歲戊辰又將樹綽楔二於通衢南曰江南
福地西曰浙右名山以表茲寺之勝往來觀者咸謂
二額蓋狀其實云先是寺非大刹住持非正員體師
居此前後四十三年下扶宗教上祝國釐而遠邇之
人瞻依歸戴是雖俗尚嚮善而然抑亦師之盛德有

以感化之也聖朝尊崇象教正統中寺僧德琳其興
創始末詣僧錄司自陳遂領檄為住持今得與大刹
齒者德琳與有力焉德琳化去繼主茲席者似碧實
師門高弟又能心師之心曾末期歲兩廡煥然一新
墾壁粉牆悉加藻繪凡師志有未竟者又將次第為
之繼承可謂得人茲山可以增重矣同袍惠公以余
知師為詳而言或可傳信鑿石微文記之惟人之居
室將以傳於子孫然有父既底法而子弟肯堂構者
矣學佛之人非有子孫之世守寔衰之踵襲乃能前

作後述經營繕葺使仆者以植傾者以支朽者以易缺者以完而舊觀畢還宗風不墜如此不亦難哉思其創始修復之難而相與保守於無窮又不能無望於後人也庸摭實書之俾來者有考焉景泰三年歲次壬申夏四月吉旦奉議大夫遼府右長史桐鄉楊述宗道氏撰

重修福善寺碑記

明馮夢楨其區

濮院介秀水桐鄉二邑去郡城西三十里而遙蓋以濮姓居此得名有同知濮鑑者創精廬奉佛而浩生

兩上人實居之先是左右有二菴浩居左曰崇福生居右曰積善寺咸合二菴名之故曰福善入國朝并入叢林遂廢而佛殿僅存永樂間妙用體禪師罷法喜住持歸老於此遂毅然以興復為事師道行清粹尤善誘接遠近皈依有如慈母以故信施湊集做者新隘者闢無者創經營三十年而規制大備赫若寶坊故事寺非大刹住持無正員正統中僧德琳具興建本末詣僧錄司自陳遂領檄為住持寺與大刹齒琳既化去其體師之弟子似碧念及世守遂徵楊公

述文立碑記其事蓋景泰三年夏四月也自景泰迄
今百三十餘年矣而殿堂形像半為荒烟野草南京
工部尚書陸公光祖時以太常少卿家居與其弟舉
人光宅見而痛之廼囑寺僧文淵文潏文溥明恩善
人姜鳳等經營其事而淵尤勤瘁先衆脩嘗艱阻鎮
民感其誠無不人人樂施工始隆慶戊辰先期寺僧
可傳修鐘樓是年五月修大殿天王殿山門牌樓又
建伽藍祖師二殿明年己巳八月建禪堂又明年庚
午正月裝大殿內佛像及羅漢諸天後壁觀音等像

萬歷甲申五月修千佛閣及兩廡明年乙酉正月裝
毘盧佛千佛七月修鼓樓八月復於禪堂左增建明
極樓計費千餘金凡十有八年而工畢淵等乃因尚
書陸公謁余而請曰茲寺也邀惠長史公而一時興
廢顛末幸不泯滅今日之功所賴以不朽者有太史
先生在即無吝筆頭上光明就此勝緣豈不幸甚嗟
乎善哉諸上人可謂有志世守者也方今道法凌夷
塔寺之建于先朝者十廢八九即其一二亦浸就湮
沒而不可支於此有人焉獨能以修舉莊嚴為佛事

豈非以優鉢羅花之見於世而象教之幸歟夫如來
廣長舌相徧虛空界而衆生迷執未免以緣為親疎
不信自心是佛常恒說熾然說了不能聞而忽見形
像殿閣金碧燦爛則合掌低頭歡喜踴躍而從之惟
恐後也即不然而怒罵褻慢且加謗焉曰此土木偶
耳何靈何聖而竭民脂膏以奉之耶此豈謂盡無然
謗必受報苦極而悔深其他生之合掌抵頭踴躍而
從之惟恐後者又可必也嗟乎此衆生自心之佛因
熏而發者也我是以知形像殿閣之說法其緣甚親

而諸上人之有事修舉莊嚴順佛慈而延象教其功
甚偉是不可無書乃次第其事而揭諸石以附長史
公之後云萬歷十四年歲次丙戌正月既望

重修化壇菴碑記

明釋廣源月菴

本菴開拓於趙宋宣和間惠忠禪師為之鼻祖迄今
四百餘稔中間沿革不可殫述元至大初檀越濮司
令見隆緒不振禮請高僧楚石琦禪師主之即構大
殿巍然復存殿後嗣非一人香燈不絕如縷綫成化
庚寅古杭聖果名山無際廣禪師之孫守誠字敬堂

與其手度弟子宗裕字綽菴駐錫於此德足感人鎮
中耆宿遂請繼主之舊有居室規制卑隘僅蔽風雨
誠與裕毅然以興復為已任古殿震風凌雨勢將圯
危首先葺而新之像塑靈山一會華幡香燈種種莊
嚴靡不如式居無何以丈室卑隘撤而廣之復建松
月堂及衆寮庖福等室皆一新之復置膏腴田七十
餘畝為香燈之需圖遠之謀亦深矣宏治戊午綽菴
因出世勝果家山僅三年槌鼓告退廣無際實臨濟
正派染指法味無際傳蓮馥馥傳誠誠傳裕裕傳智

深深字大淵傳惠惇性初惇度道奎天文五世有繼
述之能淨土之承先引後者可稱得人矣且敬堂綽
菴承法以來幾四十禩攻苦食淡絲難以致易搏費
制羸繇小以暨大信嚮者雲輸川委然後大興土木
涉歷既久克底於成非負荷之重曷克致此大淵殫
力卒瘁仔肩後事重念祖與師中興拮据之勞他日
歸寂不昭示梗概恐後人漫不知省而忘其所傳之
本乃建塔一方構樓三楹樓之背鑿竈立塔祖與師
之遺骨瘞於其中此深之孝也夫教法東流寺祠據

山川形勝者在在有之第不能不囿於數而興廢難免間有廢而復興者貴在負荷得人若今淨土中興孰非負荷之重得人之可徵耶大淵知余與綽菴善而不知出家之詳請文為記勒諸貞珉垂諸永久將欲俾後人知其所自而不忘其本也余非能文者重大淵之孝遂紀之不辭嗣大淵之後者果有感於吾言也夫正德二年歲在丁卯春吉旦江左外史月菴廣源撰并書丹賜進士出身兵部致仕尚書前都察院左都御史進階一品榮祿大夫八十翁同郡項忠

篆主祭弟子智深立石

按此記為釋廣源撰項襄毅公為之篆額後人誤為襄毅所作非也碑今嵌菴內山門間尚有宋時初建碑埋田中今不復可考矣

張節婦詩序

明王世貞元美

故茂才馮公之與張太夫人訣也實手之曰而殉我身乎乃殉我心微而孰與代吾之為子若父也蓋馮公訣而太夫人隕越不欲全也既而曰有成言矣為死者死則可為生者生則可吾不忍于馮氏之生者也於是馮公之父母老矣有一子今大夫孜僅三齡

而其一子敏在腹太夫人出而哭于堂曰從公乎微未亡人孰與代而子也入而哭于室曰從公乎微未亡人孰與代而父也甫輟哭蓋日夜拮据治生而盡斥其生之餘以奉公父母即斥奉父母之餘以資大夫及所謂遺腹者咸就外傳業文章彬彬有成矣馮公之父沒其母朱獨存老而甘太夫人之養忘乎孤且獨也大夫之兄弟幼而共義方之訓忘乎孤也蓋馮公訣而太夫人之首不飾寸珥體不識纓帛三十年如一日也今上隆慶之二年大夫成進士矣而會

有詔旌天下之婦而節烈者大夫上書闕下言狀有司核實無異上曰俞旌其門節婦如故事大夫由進士得吾蘓之太倉比二千石太夫人不以子貴而以節婦稱來就養業已六秩大夫謀所以觴太夫人者進之太夫人却不御曰家不幸而使我有此名即我觴如若父何固進之乃請以觴公母曰所不即從公者以姑在姑幸健善已若是姑授吾年也始一醕即以醕大夫曰所不即從公者以若兄弟在幸而有成立輝赫其家聲而大之是若授吾年也雖然若何以

報我則又曰毋以我為也天子過采若言而以旌我
我何以報若也精白一心而事之毋使若愧于為我
子州子民若赤子也為我所以撫若者而撫之毋使
我憾於為若毋於我足矣大夫再拜曰謹受教於是
州之薦紳士沐大夫澤而高太夫人者合詩以頌屬
世貞序其事

秀水縣新建四鎮常平倉碑記 明吳宏濟 海洲
易曰損上益下民說无疆尼父曰因民之利而利之
不亦惠而不費乎夫所謂損與利者非真取此以與

彼家給而人足之也民有利病我體察之時有豐歉
吾調劑之歲收有有餘不足吾因而盈縮之已耳余
嘗見嘉禾歲穰粟多則趨市糶糶者多則糶者少而
價日卑而民不得不糶者苦于無錢也於是乎農病
歲凶粟寡則盡趨市糶糶者苦于無粟也于是乎民
病當此之時能使不傷農不害民農家不致賤棄如
糞土而窮民不致貴取如珠玉豈非先王惠養元元
之道而為民父母之所當惻然而動心者哉異時聞
父老言嘉靖辛酉陰霾肆虐金竈樓蛙近又寓目于

萬歷戊子歲旱魃陸梁千里一望如灌莽此兩年歲貢莫入道殣相望鬻婦子如豕鹿然白骨纍積借有早計儲蓄之術給彼升斗何渠至是高皇帝建預備倉實仿常平遺意第患無良有司奉行自邑大夫李君下車蠟順成而民康樂於今五年猶念古有賤不使傷農貴不使傷民之策適奉檄各郡邑建立常平倉以備凶年主糶糴乃遍視一邑之中設倉凡四循邑以北幾二十七里而遙為王江涇于姑蘇當走集其人十農三賈十九苦潦十一苦旱其田宜禾少麥

視高原所入差倍甚澇傷禾乃受之饑以其間設廩倉中市而立廩面陽廩形方凡為儀門一傍耳房各一夾道東西廩十有四為堂廡三夾堂廡為社弟子學各一其東西鄰比邱尼氏莊氏南及畝澮北抵市河縱橫度可盈三百尋還至于邑西南行三十里而近為新城于苕溪當走集其人十農四賈中分苦旱澇其田宜麥禾多桑視衍沃所入差儉甚旱澇傷麥禾乃受之饑其廩倉中市臨官道而立廩面陽廩形長前為儀門耳房各一中為堂廡三旁為社弟子學

各一其後帶為廩十有三夾兩旁為廩各一其東西鄰及于北為章氏呂氏陳氏南抵官道縱橫度可百八十餘尋循新城南行越陟門十里而遙為濮院于桐鄉當夫集其人十農三賈十九苦旱十一苦澇其田宜麥禾多樹桑兼菽視原沃所入其儉倍差中旱傷麥禾乃受之饑其廩倉中市而立廩面陽廩形方凡為儀門若耳房若堂廡若弟子學若連廩房大抵皆如王江涇之數其東西鄰及于南為吳氏殷氏沈氏北抵畝澮縱橫度可盈五百尋循濮院而還五六

里為陟門于虎林當夫集其人十農一賈十七苦旱十三苦澇其田宜麥禾多樹桑兼菽視原沃所入其儉惟倍甚旱傷麥禾乃受之饑其倉廩中市臨官塘而立視濮院形法門廡社廩皆稱是其東及于西北為趙氏朱氏南抵官塘縱橫度可盈五百餘尋歲時旱澇中饑糶半廩大饑糶全廩民無蠹食官無追呼以寬流亡天札之殃皆奉當事者指具有成籍若乃經營相度寢處不遑則李大夫業受成于守道張公巡道湯公與郡大夫曹公早夜勞苦暴露集謀鄉三

老而不日亟成之者也書曰惟事事乃其有備有備無患我大夫廣上德意引而推于市落阡陌間計每廩穀五千石于四鎮餘二萬石計平糴二萬石可令價無翔二十餘萬石以時灌輸寧有窮期使長得如李大夫賢以修明其法邑無秕政野無懸耜于豐凶何有抑國家漕東南粟百萬秀水實居綰轂起陡門至王江涇實居綰轂之口往者島嶼內訌獨兩鎮里民被干戈殊慘酷餘三十年始安集近頗聞島嶼弭耳已事難知賢人深謀于廟堂念欲保障東南勞來

生息先自兩鎮始後之人毋忘綰轂以毋忘天下施及萌隸垂于萬世則惟是庶幾毋忘常平初意哉

按此記嘉秀郡邑志俱載而郡志刪節今從縣志當日建倉原非一處鎮亦無碑此係民生大計亟錄其詳後人其有饒幸之思乎

岳九德墓表

明焦 竑 弱侯

余始通籍時輒有意當世賢豪君子聞虞部岳伯子元聲者侃侃朝廷間聲稱藉甚余幸得一當也後三歲壬辰與禮闈拔士之役所薦拔士有五人今客部叔子和聲在焉兩君擅東南之美以球琳瑯玕並登

清廟一時賢士大夫無不倚以為國器因得悉封公
云公諱九德字君采^別號心夔少以文雄諸生既老以
子貴封工部虞衡司員外郎上世相州湯陰人宋岳
武穆王之後也武穆子續忠侯霖霖子鄴侯珂珂勸
農嘉興郡卜城隅金陀坊因家焉著書名金陀粹編
以此珂生承事郎覲覲生江夏丞邁邁生監泰州酒
庫涇涇生金部主事琳蟬聯華圖世載明德隆然為
浙之望族矣自琳始八傳為鳴迅鳴迅生商為東湖
公配金氏生封公公少磊落有大節時海寧猾吏以

獄中東湖公公前奮曰吾固在也而難吾翁為即跽
誤願以身代比至邑許令天贈者慷慨白其冤狀立
解散去而公遂奉東湖以歸于時徭賦重沓拮据萬
狀猶時手一編呬唔不輟與馮開之太史周彥雲孝
廉篝燈蕭寺中以大業相期許顧數奇不售乃日討
兩子而訓之教飭謹備注意鐫厲威不廢譙呵倦不
知游息迨兩子連翩鵲起而後公喜可知也公執二
親喪禮不過而哀有加於弟九率友愛彌篤不難以
愛子和聲後之隱之親終賴事興哀雅養敦俗兒無

常父稽之前牒公無愧焉季子金聲與余兒尊生定友於成均亦以文行負俊聲公父子間自相師友處則訓之學出則教之忠娓娓昕夕俾各發聞于時而後已初兩子之令嚴邑也公一再臨眠聞風謠藹然輒色喜迨兩子訊斷時倚柱聽之又未嘗不爽然也蓋公籌閭閻疾苦若不啻觀火然適得兩子以成之故邑人戴為衆父而戴公為父父以此久之元聲登朝持論嶽嶽數與世柄鑿尋以島夷封貢之議忤要人竟拂衣歸旁觀者或疑公不樂公笑曰此非乃所

知兒所持是也噫此可以知公已居恒與人語莊而氣和無藏怒無讎容日厚施而薄入以為常以萬歷壬寅十月二十二日卒距生嘉靖庚子十二月十二日享年六十有三配封安人張氏卜乙巳正月二十七日葬桃村之原嗟乎太邱之仁隱約於一時而紀謚羣奉貴顯者累世公起詩書之廢疾而世莫見用韞經濟之器業而人未蒙福安知非留其贏為來者地耶况公重義而無固於位也故子或遂其強直秉節而無疚於利也故子獲遂其廉明即謂以用公可

也元堂有歸衆姻戚會素車丹旌徘徊增哀謂纂懿
行垂於後人爰撮其大都表于隧道諸未具者有秩
宗陸公之誌在萬歷三十三年歲在乙巳率月朔旦
立

按此墓表馬應圖篆額陳懿典書丹東海徐延平
集王羲之書刻之墓在武康山

重修靜菴府君墓記

明岳和聲爾律

我高祖梅溪府君奎營葬大父府君懋別號靜菴於
桐鄉桑園橋之右方而以父耕雲府君端與仲父樵
隱府君澄及與弟怡菴府君璧祔于昭穆之位穴壬

山丙向亥脉入首水纏元武繞青龍由巽以出坎方
高壠隆起明堂瀦水環之前有橫琴一案亘於離此
勝兆也始於宏治之丁巳迄萬歷庚戌一百一十有
六歲而及吾兄弟三人始並列仕版則本生皇考勅
封虞衡心夔府君九德以博學困諸生間攻苦督諸
兒而嗣考勅封儀制青門府君九率彈力相之始大
厥家歲在乙巳和聲以虞衡喪三年迄事還朝伯兄
偕季子送之楊子江干泣然以虞衡府君永訣時奉
拳以祖宗姓氏隱約未白亟宜陳改為囑遂草疏於

是歲十一月廿二日具奏十二月八日奉旨下所司
覆請報可移檄省郡下縣凡我族姓咸改樂為岳環
百里內外皆喜靜菴府君之阡至今日而披蒙翳而
覩水木人人知為武穆王十二世孫矣先是守者不
戒埋墓蕪脉斬松刈柏歲月浸淫弗討厥辜至萬歷
壬子之九月盜伐東北二隅巨柏五章夷其離岸二
尺有咫不得已鳴之邵司馬閔粵良公驥以懲逆杜
漸內外宗姻咸集厥議覆上郡乃赦往戒來清糧贖
廢而列榜以垂永焉志慎也其合窆於內若怡菊府

君之節婦范氏遷祔于外若曾伯王父長子成之婦
曾氏屏諸叢櫓若諸孫某某若諸孫婦暨元孫婦某
某歸我族之義阡者事屬宗老擇便利日月需次以
族而夷有培高有增蕪有芟隙有蔣圯有葦塞有濬
丙舍有築墓田案地有贖有市之屬在我兄弟三人
實事而圖終云廼以萬歷四十一年之嘉平月十有
七日庀材鳩工和聲偕水部伯兄比部季弟恪共厥
事越明年六月六日迄工則伐石以紀我子孫世世
奉事母有數焉記塋堂原地八畝四分今止丈得六

畝分不得深討內震方地一畝四厘向為三支從叔
一夔府君九叙樹桑者除四支諸孫盡義補封柏價
二兩外再並之四金不從另與之橋左桑地一畝四
厘稍腴貴據形家堪為從伯叔祖平川公相吉兆者
議易之樹價弗問又議助四支地三分在平川公兆
北者以葬四支曾叔祖憶梅府君光迅及其子從祖
雙橋府君名宰為盡義等祖父二阡乃將震方地伐
桑撤廢屋建后土祠其羨則築室居守永不得種作
以撓地氣計祭田原田一十畝為三支四支收贍塋

糧者已久不可考今伯兄元聲捐田十畝和聲捐田
十畝季弟駿聲捐田十畝并嗣考青門府君亦欲捐
而未果今續成之者十畝其字圩坎段俱詳誌碑陰
共墓田四十畝以贍墳三從曾叔祖光遠府君附子
穴在亥方歲久難動代贍厥糧禁後越葬其餘以供
兄弟子孫春時祭埽此墓及再遷祖提舉府君之墓
曾王父松岩府君之墓於孟冬一日合饗先祠間歲
修葺本墓之費三家子孫歲遞掌之無侵無廢有侵
廢者坐以不孝之罪計祠屋舊屋三楹為梅溪府君

所建者以三支曾行修葺今敝壞聽拆去新築二層
凡十二間堂寢略備剪封闢游瀦水修河三十丈計
廣河六丈所費錢與祭共二百六十金有奇而他費
不與焉其世室令佃戶居守宗人不得私焉有傾圯
則用新捐贍墳之產歲葺之可也時萬歷四十二年
歲在甲寅六月六日立石

按墓碑雖存然荒蕪埋沒漸不可讀幸岳氏載入
族譜彰彰可考此三進士發祥之地也然親弱侯
岳九槐墓表則所以培植後人者固在彼不在此
矣

古三教菴碑記

明湯齊

予與孝廉姚若麓每談心性之學如孟夫子盡心一
語足以槩之乃釋言明心道言煉心豈有二旨哉入
門之途似分生死之理原一坡老亦取義于水江河
分流同歸入海然則三教一教也孝廉恍然有得遂
述水西數十里濮鎮之北有菴名三教者供奉儒釋
道三聖人自宋以來香火不絕孝廉謂三聖並奉則
三教一理可知予詢主僧屬誰則曰向有高僧文淵
與王大父方外交頗悉其人為里中所推重相與友
善如馮具區陸五臺袁了凡李臨川馮原泉賀道惺

諸先生一時尊崇進朝賜紫出主禪剎刺史心涵包
公及二三文學曾請入菴焚修其徒真洹等恪守戒
規克衍厥緒不但菴之所近士庶歸依即郡城鄰邑
有志脩持者咸慕其風而向往焉世道人心維係非
淺予聞而喜蓋喜其一室而奉三聖與余三教合一
之旨愜也一日孝廉出菴古碑及府帖囑余為之記
予不敢辭自三教鼎峙在吾儒每持闢之說薄言仙
釋若彼耽空嗜元之士又奉佛祖老氏為教主與吾
儒角孰知佛教未入中國時有唐虞即有禪之一言

開般若門是堯舜即活佛也尼聖一見老子稱之為
龍後世遂記孔子師老聃此三聖人總以心性之學
提醒羣蒙源流未嘗不合如人生無大於生死二字
儒言知生釋言無生道言長生夫知生則有無皆知
矣儒言可死釋言了死道言不死夫可死則死亦不
死矣以二代棲心世外雖不及吾儒淑世明倫然能
透會真旨則凡一切經史蹊徑皆融草化金身悟轉
法華即素王之功臣矣所可惜者人涵是心心俱可
盡可明可煉而紛從言障莫悟宗風此千古無兩釋

迦無兩道德猶之千古無兩仲尼也若即心自盡能煉能明試觀婆婆極樂遨遊蓬島不儼然鳶飛魚躍景象哉有此庵而三聖人覲面可同心有此庵僧真洵等而三教合一之傳藉以不朽有此暢明古庵之孝廉而予叨任地方亦庶幾生色即謂予與孝廉同究心性之說一日千古可也是為記皇明天啟二年歲次壬戌仲秋吉旦賜進士第文林郎知秀水縣事昆陵湯齊撰

重修元明觀碑記

明岳駿聲季有

郡城西南去三十里而遙有鎮曰濮院鎮東北市屬秀水界有觀曰元明觀有翔雲石天將雨輒有雲翔其上因復顏其額曰翔雲勝境云勝國時石為張士誠昇舟之以去而榜額猶存舊貫志靈異也觀始于元統乙亥間羽士鄒道寧潔志虔修募本鎮素封濮鑑所建厥後歲久傾圯而我曾大父松崑贈公捐貲修葺山門殿閣煥然一新嘉靖中道士羅思齊修真得道受五雷法於龍虎山盡得其術為人療疾驅邪符呪靈驗至於禳災祈歲無不奇應若風伯雨師雲

雷神鬼之屬競奔走於指顧色笑之間時屬暝暎旱
郡伯劉公令禱雨甫三日而四境霑足卒成稔歲自
是凡遇旱潦率皆倚賴祈禱故世號十雨法師蓋言
十禱^而十應也事載郡志而士大夫亦各有贈言彙成
卷帙後以其術傳其孫錢有德顯名萬歷間為郡伯
王公所重戊子大旱公令有德結壇乃馳海洋鞭其
龍雨遂大降其靈驗適如思齊有德歿而其孫王文
正復傳其術文正黃冠而儒行儵然塵埃之外蓋有
得於內功者天啟癸亥夏秋之交旱魃為灾文正應

召結壇指顧之頃雲雨滂沛乃獲有秋人以為龍虎
山脈秘傳乃僅得之咫尺是非徒以幻竒荒誕之術
眩人耳目為斯觀重而即其回亢陽為甘澍反荒歉
為豐穰其丹符寶籙之用利及於闔郡生靈也豈淺
鮮哉大抵天地間靈異之氣原不與物為存亡故石
雖為張士誠昇去而靈氣未消鍾于其人遂使祖孫
相繼一傳再傳至于道風仙範代不乏人是豈偶然
之數歟世傳羅公遠左慈之流終不常見而紫府丹
邱不在人間繇今觀之要亦貴耳賤目信古疑今之

說也是觀也余愚兄弟皆從童子時負笈讀書其中而家司馬先中丞並弱冠脫穎以文章事業顯於世余即偃蹇不類亦獲幸叨一秩差肩其後則豈非靈氣有所旁及又若我曾大父於數十年前繕修一段機緣適為我曹厚植其基而累善陰功益以見元帝應感之不爽矣觀故有石碑燬於倭寇之難文正復鑿石而乞記於余余以是為不可辭遂書其顛末如此賜進士第資政大夫原任通政使司通政使加二品服俸岳駿聲撰文崇禎六年歲次癸酉二月朔本

觀祈禳冠帶法官王文正立石

按觀與福善寺同在至大己酉濮鑑所建至元統乙亥則又二十七年允中續建三清閣非一時也

○濮川誌略舊序

明徐石麒

余家武塘西南距郡城三十里又西南距濮院亦如之頻年遊宦攬勝多虛從父省吾故濮氏倩每述其魯國遺事繫懷仰止惜郡乘不具載泊移居樵李嗣子柱臣又執經道水之門聞且益悉第因當時草昧之初避難流離濮川小誌散佚莫考即宋理宗朝以少宰之勛猷琅琅彪炳盡已失傳何況其他至成宏

聞匿姓遠逸者稍稍來復乃出其始祖雲翔公以下譜系所載八宅二十六庄并建置諸古蹟約畧觀記裔孫草堂先生向珍篋笥未壽梨棗其季君道水曰及身不述後將誰傳爰咨耆老搜碑銘徧考故典以誌之風土人文間附一二凡屬影響概付闕如道水負良史才殆以一斑自見乎昔蘇明允范希文輩咸追慕曩徽立法敦後迄今侈為盛事道水仿明允希文遺意彙輯成書垂諸金石使世之子孫曉然于源長本厚而無渙不萃勿使絕服以降遇若途人庶于

尊祖敬宗思過半矣斯固其立言之旨也夫賜進士第柱國大夫太子太保吏部尚書前南京尚寶司卿吏部考功司郎中主大計徐石麒撰

濮鎮義塚碑記

張如戴琅石

嘗讀周本紀西伯為池沼見死人骨命瘞之天下聞之曰西伯澤及枯骨況於人乎觀明太祖嘗諭禮臣曰古之聖王有掩骼埋胔之令推恩及於朽骨近世俗薄或有親死而不葬者孝子慈孫亦復何忍其禁止之若貧無墓地者有司擇地為義塚俾之葬埋然

則邑有義塚固盛德事亦周官遺法也歲乙酉余蒞
桐鄉公餘採詢風俗大都士惇農朴商慤女懂家詩
書而戶禮樂雅稱善俗邑之東北隅為濮院鎮去鎮
里許有義田一十一畝有奇則鎮民陳國紀沈世珍
等掩骼地也余義其事而問其田并召致其人其貌
醇謹而行端朴殆古高隱者流歟明萬歷己酉聞孝
廉朱大猷創為斯舉洎崇禎庚辛飢疫頻仍殍舐充
路國紀等惻然傷之偕孝廉從子朱茂曜踵武增修
與里中諸同志益募置塚田計兩載所埋不啻五千

云於是董之者二僧岍然韻若相繼不憚胝胼亦有
足多者余耳之嘆賞不置以為此義舉也仁風也用
申諸憲桂作公占永免差糧以旌其義豈市惠哉成
衆志焉耳昔子瞻蒞惠州為文以祭枯骨詞義藹惻
迄今讀之心動余蜀人也謂擬子瞻予則何敢特因
張子和鍾子貞之請為叙以誌一時盛事且以廣後
世仁人君子之心於不朽焉桐鄉縣知縣閻中張如
戴撰

永安祠記

濮龍錫九上

祠何昉乎昉於祖先之鎮火也讀文敏趙公銘明之
公碑誌元大德中建於舊宅之朱雀坊與東嶽祠並
著焉祠之名菴為祠者何代乎讀濮川前誌明成化
中祖諱松者即菴而鼎新之設宋元明三朝雲翔公
以下本主凡子孫有大事奉牲以告焉祠之幾廢而
復興者何時乎閱復祠公案崇禎丁丑有假鎮火為
嫌欲圖鳩處者道水公偕我族人力籲當道郡侯鄭
公瑄桐邑侯盧公國柱奉直指喬公可聘檄得仍世
守無廢祀焉其墓址廣狹四訖有籍其輸稅版戶有

帖其間架規制有圖有志宗子董飭理緇徒司啟閉
此祠之所由來燦著也然永安之義何居我祖先之
意非曰使我後世子孫藉此以邀福祉歲時告虔僅
安先靈而已也是欲一姓安而比閭族黨皆安處常
安而兵戈水火無不安我祖先有行之者矣如簡鄉
勇以禦突豕而危者安傾儲橐以活哀鴻而飢者安
辦硃瘠以減土賦而耕者安慮洪荒之不安於瀾也
濬流築隄以捍之慮行賈之不安于市也織綺列肆
以通之慮妖厲之不安於魄也設壇啟坎以藏之至

安童蒙則有義塾安緇流則有院刹安死葬則有槨
積明之以下樂善不倦世有令德貽安於比閭族黨
子孫亦得以緇遠滋大無相傾側者實有見之行事
風示來茲其命名之意至深遠也傳曰有大功於民
則祀之能捍大患則祀之記曰過墓則哀入廟思敬
不獨後昆拜瞻奮興紹衣令緒於勿衰即比閭族黨
附枝藉蔭當比之甘棠勿翦勿伐祠之藉以永安者
寧獨一姓而已哉第自丁丑迄今又四十餘稔雖廟
貌不改得毋有實逼處此者乎得毋有風雨漂搖乎

得毋有鞠為蔓草乎以時修舉是在宗支惟力是視
余恐歷年久遠漸忘其始基創修之繇來并沒其垂
庥命名之深意故臚其大略而著之編使後人思其
義而毋致廢墜焉蓋竊有深望矣

鎮圖說

撲龍錫

古嘉禾志崇德州志暨明郡邑新舊諸志無不娓娓
稱撲院一鎮撲氏盛事有足多焉然或彼詳此畧或
前載後遺莫能執一以悉之即訪之故老詳述曩勝
恐撮拾風影貽議來茲慮非核見恭聞著圖傳信後

有作者其徒憑諸游談刺址以相誦哉惜濮川小志
一書無從破壁鑿梁再獲全覽惟別駕周冲宇濮溪
志草什存二三合訂位置與卷語所垂罔不符卷宋
沒未備明初漸湮撫景追尋時在皇慶延祐間蓋提
舉節推元帥司令諸公正頡頏斯際乎過此而降兵
燹流離即俗所傳八宅二十六庄在周氏志草中已
云無從考覈何敢附會滋疑但南新一街白衣永正
二梵舍雖為後建亦屬崢嶸故皆踰格附入若我族
而外大姓繼著者四曰劉貝燕朱而馮樂楊施後先

濟美堪輿氏以為水來長谷正屬巽方土脈既厚聚
氣復深故秀毓人文代興節義機杼之利日生萬金
而大姓卜居歷享富盛蓋非無由

濮川誌略序

朱 曄 介修

余先與濮氏世戚也宋建炎中扈駕南渡卜居於此
濮居崇之梧桐鄉余先居嘉之長水鄉跨幽湖以東
西相距不五里而遙世遠時湮傳聞故蹟如年老宮
人說開元天寶事雖娓娓可聽而耳食者不無疑以
傳疑今濮子九上持濮川誌略一帙示余讀一過不

覺喟然起曰有是哉我兩家不相謀而適相脗合也
如此夫僕以山左開家余先以中州肇迹其扈駕同
僕以雄贊振鎮余先以撫業貽鄉其起家同僕以宦
輟徧遊文經武緯余先以科名間起祖武孫繩其通
籍同僕以寵及地靈君為錫姓余先以諱干國號帝
特更名其遇主同僕以貸粟連姻致人主之疑諭遷
鉤黨余^先以覆糧開法震當朝之怒籍產戍邊其蒙譴
同一時子姓懼禍旁徙今惟留郡與鎮居一支者余
先惟陽谷公後與僕惟明之公後其萃渙離合又無

不同獨是地以人著而人以誌傳繙閱全帙約略所
指建置則星羅棋布譜系則本厚流長筮仕則雲蔚
霞興惠商則鴻歸鱗集節義則霜嚴日皦隱逸則壑
邃嵐深邱隴則隧鬱城葱遊寓則淵停嶽峙與夫詩
詞之相和仙釋之著靈則敲金戛玉點石拈花者在
在而是以余先之家乘較之語焉而不詳且闕焉而
未備者何啻什伯於濮川之誌哉且不獨此也銅駝
荆棘時事何常金谷風流豪華有盡居今弔古感慨
係之矣僕乃智灼幾先功歸身外舉不數傳之業散

展視之左創元宮右營梵刹而不少顧戀他如祠宇
壇壝橋梁道路皆其勝事未易枚指至今登眺其間
傑閣摩霄層軒匝水晨鐘發省雁度平林夜杵高擎
牘眠曠野雖在闕闕與鎮不磨無異金明之有范大
夫真如之有裴相國本覺之有蘇端明非以大菩薩
心腸而具大英雄手段曷克臻此余先僅存一世宦
祠奉祠列祖幾為勢家所有迄今未能擴一椽半址
光大叢猷是余後人之罪也歟余滋感矣古人有言
莫為之前雖美勿彰莫為之後雖盛勿傳是誌也昔

有草堂道水雋如諸君彙集成編今有九上讐校授
梓行見累朝故舊為採風者諮訪所及播之郡國良
為信史不誣矣

樵李稗編自叙

吳宗泰伯讓

樵李稗編者匪祇採輯佚聞補綴史乘抑匪剽擷往
事焜耀里閭蓋地介三邦聲名踵盛圖書鼎立稽核
難周賢者相與忘之衆人遂淪罔識不有標著曷矢
觀摩郡邑志云濮川古樵李地此樵李稗編所由彙
也余生晚竊慕鄉先鉅老文行翹楚如有宋輔慶源

先生為理學砥柱迄今擬祀孔廟未嘗不嘉永新一
邱之效靈遠也徐明道先生兄弟聯登宦蹟特著南
宋皆能以經明行修式穀其後故其子若孫之聯鑣
嗣響者指又不勝屈入明如鮑先生仲孚嘗舉省元
後以理學者薦特膺聖祖簡召授文華殿大學士先
生以老固辭許免朝請日晏而入先生猶固辭不得
已勅賜放還而殿閣詞林記載廖道南之言曰商山
茹芝千載不數人恂等靡屑皓首安車蒲輪雖竹帛
所書圖畫所傳何以加焉先生今祀鄉賢列一郡之

首而嘉秀崇桐諸邑分祀之江先生朝宗者家本會
稽客游吾里以文學薦授翰林院編修一時詞翰之
家無出其右嘗因應制賦詩稱旨特賜緋袍一襲後
授簪請老仍占籍吾里遂繁子姓故得首列一郡文
苑之科而嘉秀崇桐平海諸邑分表之餘姑未暇枚
舉如楊宗道先生領永樂癸卯賓興首薦浚典四川
福建文衡所取稱得人以太傅卒於官其子青聯登
景泰初會魁經義登錄實開桐邑甲第之始筮仕居
給諫科七八年多所建明時人稱其得君陞河南按

察僉憲又如岳石帆先生昆季發蹟里中相次聯第
後皆位致通顯宦蹟磊砢石帆先生三賜為民讀思
皇帝諭祭文知方圖柄用惜其速捐而石梁先生則
歷宦絕坎壈鄉賢踵祀此其概梗可識矣馮先生原
泉篤于孝友為能旁敷惠政績歷司藩沐寵最優再
三錫誥更嘗總裁邑乘大以鼓動忠孝節廉小亦不
乏風雅流麗之觀陸先生古菴居鄉端謹以鄉薦歷
仕不苟取興卒以古道自處斃于官竟無後乃今特
先諸顯要祀鄉賢即謂三代人心至今存可也猗歟

休哉川之西南一隅為梧桐鄉與桐治相表裡川南
東隅為嘉之長水鄉其東北屬秀之靈宿一隅而三
邑介焉其人物山川事蹟故應分載邑志而後起之
彥輒以志列三邦忽于叅核往往見游歷名山大川
者自言有得及叩以本境之所有罔如也倘亦居鄉
之所羞也已丑夏日郡國有修志之舉曾採近略若
干則以脩當事萬一遂取郡縣諸志及吳越以來應
考之書而叅訂之川地於春秋為檇李自名檇李以
後人地迭相靈傑川之字濮亦越三百年耳永郡始

於子城而間名橋李可知橋李之所該廣矣彙輯既畢合舊載新入為一編間訂傳聞之或異以規後進之信從復稽聞見之非訛以表人文之巖郁雖云一隅堪深觀感余其有隅之心也乎集中所載誰復非隅亦誰復為隅者乎爰是分卷立則每有小論分見而此為言其畧以弁其端至于有言不文銓次失當則俟君子以考成焉順治六年歲在己丑閱夏歷秋冬川上居人吳宗泰伯讓氏題于庭草交翠之草堂

按稗編一書係寫本僅首一帙得之殘卷中其大指為吾鎮而作然以橋李名書其里至實該長水

聖宿梧桐三鄉惟序文所指多屬鎮人而輔氏則居永新徐氏則居鳳鳴里非鎮產也

重修賢授禪院記

仲宏道改卷

我儒聖賢授受則曰誠誠者真實之謂西方聖賢授受則曰幻幻者空無之謂然儒亦曰空空則真未嘗不幻也佛亦曰真如則幻未嘗不真也吾友幻兮禪師修精舍于濮里之東率顏曰賢授命名立意具得西來大旨工成請記于予予按院離郡三十里在鎮東北為城鎮往來纓庚有橋曰好賢俗訛為草野橋院在橋東畔前朝洪武初建亭以息行人萬歷己未

建佛堂三楹易亭為菴邑侯湯公額之曰賢授院之名自此始逮崇正庚辰碧光心傳二上人慕師精進遂延駐錫師為文節法師之嗣其於以真觀幻以幻還真之道不啻照徹三途談空五蘊矣於是棲遲此地聊作歸休一溪烟柳嘗來白鶴之飛千樹松篁坐待黃梅之熟又不啻赤華之館青豆之房也至己丑癸巳間鼎新前中二進堂宇增建佛像廚房置常住田三十五畝不費蟻蚶而香岩偉壑自足雲厨之供而玉粒齊山師於賢授厥功懋矣己酉間師之本師

命師主薦菴院事隨又治本師之喪菴中一切供托其徒戒予戒予多方措辦庚戌冬重建藥師堂乙卯冬又建功德林約費四百餘金募施者不及什一戒予之善承師志於此可見不意今年春迦葉枯花世尊墮淚而戒予已涅槃矣也其徒宗尚於庚申冬主持院事復能守貞抱璞玩月驚雷將見賢賢相繼授受無疆師之功行與金石並垂不朽又何真幻之足云予為記其大槩如此

濮川古樵李之墟吳越邊鄙為嘉秀桐三邑之錯壤
為南北商賈都會之地而無名山大川灣池邱壑之
娛其形勝所峙巍然甲於鎮中為一方擁衛者惟福
善寺寺昉于元有提舉濮鑑者獨力捐建因其初有
崇福積善二菴遂額之為福善云元末燬于兵明永
樂成化時有僧前後募修得闢今址里人遘府長史
楊述紀之詳矣第蜂臺未擴檀林狹如所以善智識
之塵談久寂大比丘之棒唱無聞也迨年來即有領
袖開堂者俱不久以故去于福善無足輕重

今上即位之十一年歲壬子衆乃請鶴峰和尚主院鶴
師為雙徑高足三峯嫡裔宗律湛深溫恭朴謹期年
有一鶴翱翔殿閣里中能文者作獨鶴來朝詩贈之
謂天意之攸鍾也乙卯丙辰間因南服未靖年數不
登師此時香積無烟祇園斷火清苦自甘進修益力
于是感動檀那悅服者衆三樓之未竣者至此咸竣
亦可謂蜂臺改觀檀林遽穆矣歲戊午師念正殿自
先年雷震壞後漸至頽圯門垣柱礎又從火滅之餘
尚無整理乃矢願重修又憂工料浩繁未能成就對

衆自誓曰我如不成此工者有如此殿于是鎮中之
紬行接領輩各許每紬一疋捐貲一釐暨善男子善
女人所施者積銀若干兩鳩工庀材師躬親劬苦不
敢告勞至己未歲大殿軒廊葺舊增新一時落成都
人士過而觀之莫不舉手加額曰猗歟休哉使非鶴
和尚之苦行感通曷能及此昔漢有摩騰而白馬寺
以興晉有慧遠而神運殿以起以視師于福善將毋
同歟工竣問記于予予知師最深不敢以蕪鄙辭為
識年月如此云

濮川同善會記

仲宏道開一

禮經有無體之禮無聲之樂而即繼之以無服之喪
夫既無服矣何喪之有是即詩谷風云凡民有喪匍
匐救之之說也予惟邇年來天行水旱人事兵戈異
鄉斷梗每愁旅櫬無貲孤苦遊魂欲續溝中蘂裡所
謂凡民之喪莫慘于此即或有好義之家竭力施棺
然而捨無常地主無常人貲無常出得此道彼詎能
遠暨予嘗讀先達同善會條例雖不專於施櫬而施
櫬之事甚詳大要以勸募衆力共襄善緣溯厥源流

張公夢澤傳自中州錢公啟新行於毘陵高忠獻公
行於梁溪丁清惠公行於嘉善近如蔣虎臣先生行
於金壇張公選先生行於京口柴襄明葉公榮諸子
行於燕邸良法美意俱能施恩不報之地洵可謂
副救之也矣予口誦心維欲集同志踵行其事奈歲
數不登未遑啟齒幸我里敬萱張翁與有同心先出
銀三十兩拉予數人各出數金以為源本此外每施
一棺則每人另出銀三分以補棺直其源長令流通
予喜甚又約同志十餘人每出分貲若干助成勝事

計施一棺不過人出銀一分尤屬簡而易行可圖永
久倘從此而善緣日廣得藉衆力以推大其設施或
助貧或施藥或掩骸或放生他如惜字設漿次第畢
舉將見同善諸君日受神天之佑即無體之禮無聲
之樂亦在於此又寧僅無服之喪而已乎請即此一
事為萬善之權輿焉是為記

重修福善寺募引

釋宏禮具德

濮川為濮氏舊井里有福善寺乃先世提舉公諱鑑
者捐資獨建延菴僧東溟浩為開山迨勝國永樂間

請妙用體公武原法喜寺來規模益宏殿閣雄麗屹
然東南一巨剎矣歲久頽落日就傾圯今年春濮氏
裔孫文象居士偕里中護法躬詣靈山欲以予任中
興斯剎之事予牽於院務未竣因命佛眉首座應之
而里之長者必欲予一蒞其地至之日景物暄和風
尚雍美老幼恂恂扶携聽法予亦委誠曲為提獎眾
護法皆感激思奮畢志合力誓為中興檀越文象居
士暨仲調居士慷慨前致詞曰古之君子其先世有
薄德微善必為之詠歌由繹繼序思不忘况其遠大

者今吾等雖居旁邑不能如先世獨力營創然未有
本水有源宗功祖德不敢泯沒且先^世敦請第一開山
之祖而我等敦請第一開法之祖前因後果不有在
乎謀聚族中金共為修建欲以予言為引余思拈花
一脉自大梵天以身為牀座請世尊轉法輪教外別
傳遂為法中最尊最貴濟水分枝自北而南浩衍吳
越間元季中替自悟師翁住金粟濟上之宗大振金
粟僻在武原會公開闢二千餘年始有悟師翁為開
法祖今福善亦數百年而有諸護法為敦請開法之

檀越濮氏裔孫之志洵可嘉也他時殿閣重新法雷
遠震龍象蹴踏宗枝繁昌請以予言為左券則濮氏
檀越與諸護法真亦護法中之最尊最貴不顯奕世
者矣康熙甲辰初夏靈隱宏禮題於福善枕溪堂

延年井亭記

顧高嘉南樓

福善寺創於元歷有明而盛於我朝約四百年矣
代有高僧駐錫接四方衆常與數百人俱而近庖乏
井飲水必取給於外河此亦有寺以來之缺典僧明
修年近六旬職運水以供衆於熱暑更艱一日修忽

出八金為營井費以補從前所未備夫一行僧耳始
以其力運水繼以其資鑿井亦可謂有功於寺者矣
是年亢旱余偕老友十餘人禱兩寺中聞其事而嘉
之第不為紀其始末恐後之陰受其利而不知誰為
創因各捐杖頭構亭於其上俾後之憩息於斯者得
以知井之所自来且顏之曰延年井以卜斯井之可
以垂不朽時康熙四十六年歲次丁亥仲冬月中浣
吉旦

先生姓濮氏名宗澹軒其號也上世本姬姓系出魯公伯禽之後家於曲阜漢宣帝微時受詩於東海仲翁後三聘不出畢世高隱宋室東南渡始祖諱鳳扈駕南行至梧桐鄉謂可棲可藏因家焉今浙西桐鄉縣之濮院鎮即當年所賜米地也有諱桐改士葵者高宗朝為太尉嗜文墨與王十朋善梅溪集中多見之贈詩有金枝玉葉之句蓋國戚也世家於濮院地以姓著則聚族于斯者久而大可知矣元有天下累世多隱居不仕而蔭藉高華且勤督農桑富可敵

國洪武初明遠公鑑聞太祖起兵攻張士誠捐粟萬餘石助餉家得保全後因嫁女過奢太祖微行見而異之命其家族七十二支分徙而居焉有園備八景極林泉之勝見於趙松雪楊鐵厓宋景濂諸公集中明之中葉家業稍衰先生之六世祖宗美及高祖東園曾祖古槐三世皆豪俠好義樹德於鄉因得憲獎尚義之門咸以齒德舉鄉飲賓其大父南菴篤信竺墳長齋事佛里黨呼為佛子父諱守道號思菴娶周孺人生二子先生其仲也孺人體弱多病先生方娠

七月胎忽下墜適有良醫造其廬令炙熱鹽熨之仍得無恙彌厥月而誕生焉然孺人終以病故多卧牀褥至疾革時先生纔四歲偶在外祖母家舅氏負而歸視母相向泣是夕母卒先生見母入殯號哭至三晝夜不輟聞者為之流涕蓋至孝本於天性然也父娶繼母邱氏性嚴厲兄玉華長先生八歲性亦剛暴常不得意於後母即虐弟以洩其憤而先生事之最恭始終稱兄弟怡怡此尤人所難者先生之長姑歸沈門少喪夫守節於弟家撫育先生兄弟如己子解

衣推食恩勤備至故先生兄弟不至困於飢寒先生終身誦姑母之德等于罔極轉求高賢請於當事誌其貞節焉先生幼負奇姿從師授經即能曉文義通古今事略其師盛維垣及其叔三槐貞所兩文學皆極嘆賞而後母弗令讀書遂棄舉子業乃不為文而為詩不為文人而為詩人實繼母成之所謂窮而後工者也既冠娶室陸氏中饋得人時與諸詩友尋山問水不孳孳於持籌握算故不能多積聚先生雖從事貨殖恆恐以庸庸碌碌貽先人羞務以立品制行

為本里中多君子先生輒見賢思齊若陳大華之繩
墨陸青霞之曠達顧九野之高潔史圖南之清逸沈
禹微之疎略沈海鷗之豪放先生殆兼有之初至吳
卓然為名流所推重若王德操林若撫胡白叔諸前
輩皆蔣叟滄浪汲引而相識也嗣後與張意菴范吉
人湯愚谷胡雪公沈元子交往有山塘近草適福清
葉相國予告南還時順邑黃相國香山何相國各遣
其公子來候于吳門先生與粵友陳潔寰相往來因
與兩公子邂逅相遇甚洽先生惟飲酒賦詩嘯歌自

適不惟為兩公子所重閩粵人士莫不嘆羨勾吳市廛
中有非常人也是時其兄家運凌替未中壽與嫂相
繼卒存二子多累凡仰事俯育先生獨任之况值飢
饉孱臻四民皆蒿棘束手先生奔走吳門貿遷有無
僅勉力供薪水乃又家遭回祿因穿窬誤入不能出
其伴黨縱火于外焚樓居先生挈其妻子下樓火勢
愈烈乃父乃後母在宅中火圍七匝先生奮身而入
左肩擔父右肩擔母狂奔火宅中烟不迷火不熱如
騰空踴躍而出者時惟救親心迫宜為上天特佑也

先生自幼多奇病。中年又遭大難。皆人所不能堪。忍
者。患目疾。則雙瞽。兩年遇異人。用針一撥。而復明。如
舊。頭生鶴頭疽。則膿血晝夜不息。腥穢不可見聞。賴
姑撫卹。至二百餘日。遇異人治之。脫皮脫髮。不月餘
而髮生如舊。又肚疽。則見裡腿。癰則見骨。腎毒則膿
潰如流。皆賴神醫療之而愈。年四十餘。患疝如斗。十
餘年不能行。至五十二。忽遇仙針。長一尺三寸。一針
而平復如舊。其人不索謝而去。種種奇病。皆得奇遇
也。更奇者。先生四十九歲。臘月十七夜。嚴寒中。墮鶯

脰湖。素不識水性。乃於千頃洪波。口水不濡。若有神
物扶持而起。更深後。舟人救援。苟非天相。古人安能
出萬死一生。至今眉壽無有害哉。先生當極窘之秋。
父母相繼而去。得東莞鍾慎助其喪。順邑陳宗韶助
其葬。先生勤訟二公之德。殆沒齒不忘云。先生臨財
不苟。得遠近皆服其廉義。數年少得康寧。澣雪居又
遭祝融之變。禍焚其所藏書數千卷。併自著滄桑集
淚寓草國變詩拍劍歌。皆付劫灰。僅存袖中。澣雪居
集一卷。餘物頃刻都盡。先生略不置念。至今吳中人

藉藉稱先生之器量為迥絕也猶有三事可傳者順治初弛海禁粵客至吳中奸猾朋謀泛海而吏胥妬其重貲往往借題生釁或無從返其機竅則至於傾家殞命竟成不測之難先生素於與粵客黎姓者善一日禍及黎氏貪吏縱虎胥大索之先生適在黎姓寓中被誤執先生默不置辨解至江寧有司庭鞠乃徐為申辨在棘室十餘日而釋則黎姓誣事昭釋且得腰纏而歸粵矣明末有吳庠陸子炎者以邑令牛公若麟特薦授楚中縣令將之任會鼎革家破而

身亦憊卒家人星散有妾王氏年老矣先生憐其無所依而納之攜兩孤一嫡出幼子一婢出幼女俱來寄食先生家先生撫其子女代為婚嫁及子夭又撫其孫至成立婢仍為陸氏後使子炎九原有知當何如德先生哉高州陳子明鑑順治中為華亭令道經吳門讀先生詩至片硯墨光三尺几一牀雲氣半間樓之句擊節嘆賞遂相訂交後子明被逮雲間以書為質稱貸十四金時先生家既貧矣以道義而彈力以周之及其夫人曹氏來索所質書先生隨索隨付

而所貸竟無所償先生殊不介意吳中貧士而能輕財重義如是蓋于先生僅見之也先生知交皆拔俗名流清風高節皎皎出羣之彥咸籍詩篇為結納資與殷嘉生交^夫山共稱三處士而柯以傳周安道陳山農沈貴園王西園諸公或詩或文迭相贈答咸相許為益友至於四方名流莫不與先生為文章道德之契吳郡則有李公灌溪徐公武子申公勗菴姚公文初嘉禾則有曹公秋岳王公言遠吳興則有黃公九烟沈公芷菴卞公轅西蜀中則有李公如石朱公

友同余公鈍菴唐公鑄萬粵中則有李公白子梁公芝五梁公同菴盧公遠遊江右則有尹公伊皇魏公叔子陳公德祖河南則有王公子陶暨其姪藉茅閩中則有吳公香為黃公處安雲間則有諸公乾一董公蒼水而松陵顧公茂倫逢人說項尤推先生為近代詩人之領袖又吳郡太守吳公瑤如吳興太守吳公蘭次皆折節下交于先生而公雖賢實先生之高尚令人心服也其方外之交則武陵澹歸釋和尚贈序及長歌具在編行堂集韶州凌雲大士自稱放髭

道人者贈先生有云風雨看人多冷眼乾坤與子一窮交其氣誼尤深切也又西泠戴曼公笠浮海之日本刺染名法易自號天外一閑人者向與先生友善喜先生詩迨日本國王於江府建祥麟院居之遂以先生詩集刻行於海外此尤千古不易遺之奇數也先生久寓吳門無定居初至山塘旅居半間樓則有半間樓集詩遷蘧樓則有蘧樓集遷塔兜巷則有月巢集遷北門壕僻徑僑寓莊廡則有莊廡集時王子石年贈詩十二章尤膾炙人口已未歲暮築斗室願

曰晚宜亭蓋亭者不停之亭猶傳舍也以其三面皆窓東南可通涼風窓之後土垣坡築聊避風雨冬夏咸宜堪為逸老之地環竹木以為蔭臨園池以為居致足樂也先生元配陸氏生四子仲叔季俱短折僅存長子光璧娶陳氏卒繼娶沈氏賢止一女贅陸叔文為壻善操奇贏之術即先生內姪孫也先生以光璧艱於得子為娶妾戴氏生二子長名楷次名楠生長孫時先生年七十庭中生五彩芝又四年生次孫靈慧迥異蓋先生仁厚之報必克昌厥後云先生兩尊

人及元配皆歸塋濮院之唐夫人橋祖塋之側有堪輿陸君道宏者為先生擇吉壤因有粵友梁蓮玉不遠數千里以壽具見贈故豫為營壽藏去先塋僅十餘步意在百世不忘先人也先生七十有七罹大病形如槁木神氣幾絕得友人周君賡調劑而愈君賡故雲間名醫鄰居北濠北濠之友有元時八友遺風如玉東尹宋昇祉朱望子方月斯周南式施駿臣蔣曙來輩皆隱逸耆英志節高雅之士更有遠來問字及忘年訂交者唱和無虛日不能殫書我虞露生史

先生移居密邇與諸公時相過從最契詩酒論文不輟辛酉新春先生年八十矣史公以為人如先生不可不紀錄其行履以垂之後世因囑余臚言其鉅細直書其源委而為之立傳如此

贊曰澹軒先生能以詩名於世已載桐邑志中當以詩傳不藉余文以傳也且余遊方外不能文即間為文亦僅為方外之文紀述師友德業為方外取法而已初未嘗為世間之文也又安能以不文之詞傳先生哉然先生仁人孝子余所樂為稱道者且史公端

人也其頌先生不置而囑余為傳豈非好德之心與
余有同然者耶余尤不知詩不敢論先生之詩但吾
聞之詩以言志以先生之人言先生之志則先生之
詩殆魯夫子所謂有德者必有言歟

陳禹錫先生傳

朱光祖 掌綸

吾師陳禹錫先生以文學著名當時性耿介立身行
已尺寸不踰禮節少習舉業毫而弗輟數奇屢躋小
試然清正自持不為詭遇雖坎軻終身恬如也居恒
崇尚經術友教濮川學者爭先事之先生因其質而

陶冶焉雖遇頑鈍者必曲為成就每開講堂學者環
坐而聽館舍幾不能容以故門下士皆克忤忤雅飭
一望而知為先生弟子如鄭耕餘昆季阮松巖陳夔
一古銘謹堂及予兄人千筆文章品望後先輝映均
無忝師門領袖其餘從學之士不下數百且有相繼
授經至三世者嗚呼若先生者可以為師矣尤嗜南
華經讀至會心處琅琅聲徹戶外寢食俱廢為文章
縱橫馳騁落落自喜不加點竄其不入時眼者亦由
此先生難弟睿聞先生為邑諸生學問行誼與先生

同下帷雲溪語水間交游盡四方之雋啓迪後進亦以經義為宗碩才豐遇嗇亦同于先生何耶先生子嘉齡秉姿絕人髫年即淹貫經史雖家學淵源亦宿慧也予先伯父聖成公見而奇之妻以女乃甫弱冠而天先生遂無後遺予從姊青年矢志飲茹冰蘗者三十餘年顧傷貧賤未克表揚然而青閨苦節足徵道學家風俾得一畜道德而能文章之人之言以之取信於天下後世死者亦不朽矣先生德配某孺人弟睿聞先生配某孺人子嘉齡婦即余從姊節孝朱

孺人歲戊寅某月先生姪東侯堯亭卜兆于祖塋之側以次葬焉先祖親受經於先生知先生家世念先生德行道藝洵堪維風教而型後學久恐湮沒據聞見所及略述梗概以俟後之表章潛德云

濮川詩鈔序

平湖陸奎勲聚維

從來地以人重軻川之以王浣花之以杜類皆文采風流炳灼千葉濮川何獨不然濮川向名梧桐鄉為宋吏部侍郎濮斗南賜第楊鐵崖宋潛溪後先有記名昭志乘自宋元來代多述作明季沈海鷗先生與

孝子濮澹軒前輩以詩倡率里中人翕然從風入

國朝號稱極盛海內月旦之評謂其詩得正宗焉顧詩之散見于選刻者甚少既無手輯專集或集雖成而未及開雕幾幾乎零落無存噫後人不幸僅以詩傳又不幸而無以永厥傳此其亟為表章者責不在乎後人歟梅涇沈君山臞海鷗之從子也幼工詩克世家學而欲發潛德幽光因偕謹堂陳君檢得前輩遺稿及同社之能詩者數十家繡梓題曰濮川詩鈔蔚然成鉅觀矣我郡濱湖負海人文輩出將翹之槁

李詩乘雖什伯朱翰英華要不若南疑詩繫搜羅廣博南疑歿後予復為之鈔補缺漏付之剞劂已丑距今閱三紀詩老遊道山又指不勝屈行將事續編之選禾中若鹿干新編南池詩鈔同會倡和我邑若東湖洛如兩社詩集均可引為將伯之助今喜誦濮川詩鈔不亦大慰予懷也耶山臞于鐫成日寄詩索余序有云及今不收拾是則誰之咎又云吳地無風詩願附詩繫後予是以不能默而息也衰年多病筆禿少文不敢虛沈陳兩君之請用題數語以歸之時乾

隆庚申當湖易窩老人陸奎勲書于寶齋齋

濮川詩鈔序

陳梓古銘

幽湖有雙賢橋以宋潛溪楊錢崖得名當元之季濮仲溫喬梓饒于賢為聚桂文會一時名士以文卷赴者五百餘人請錢崖主牛耳隲優劣四方避地諸賢皆來僑居日以文酒酬和桐廬姚桐壽目為樂郊洵不虛也然顧阿瑛玉山堂名勝裒然至今存而幽湖倡和之什無聞焉余每悵然惜之當明之季濮澹軒復以詩鳴幽湖時沈海鷗戴曼公亦多慨慷之音嗣

後風雅漸開迄于今土著流寓幾于家有傳集使不彙而登之棗將毋散佚湮沒復踵前恨耶此吾謹堂之衷輯鼓勵為功不小也其詩合之則成全集分之各為一家搜羅續鐫方興未艾後之覽者得有所據觀於今昔盛衰之故以為振起一隅人文之助重有賴焉庚午壯月客星山人陳梓識

嘉禾百詠序

金壇于敏中耐圃

國家稽古右文崇尚經術敦本務也而風雅諸體亦嘗以甄別群材廣厲風俗蓋吟詠為學問之緒餘由

所感發以窺其性情心術之微本末表裏固往往而合也予膺

命視學兩浙正課外歷試古學于桐庠得濮生名啟元者其文根柢深厚若駢麗及古今詩無不備亦無不醇覽其平日著作有嘉禾百詠者舉由拳之風土人物而俯仰流連以寓其褒譏法戒之意蓋作者之才識于斯略見矣夫嘉郡為人文淵藪若清江當湖竹垞江村諸公理學詞章燦燦海內士生其間沐浴既久宜必有接踵而興者濮生殆其人歟抑聞之載


筆肇喜起之風從游紀第祿之慶將為明體達用之學上副聖明因以黼黻宏猷導揚至治則所謂和其聲以鳴國家之盛者又曷可量乎哉是為序乾隆十五年季春月督學使者金壇于敏中書於檇李官署


濮川十二景圖


沈鴻達鏡齋

余嘗泛梅涇過宋學士讀書臺遺址慨然久之退而攷之史乘想見命代良工翕然景附誠奇遇也後既廢棄余高叔祖海鷗公卜築於斯問訊烟霞相知風月飄然作避俗翁與余曾祖山臞公俯仰嘯傲詩酒

自娛深得古人風味今又百餘年此調已廣陵散矣
濮君蓉初劇嗜古出半閨人所繪濮川八景外並四
景囑余記前人題詠余素不善書搦管輒生荆棘而
四景題詠散失不可求聊贊四章以資嗚噓并不敢
自謂續貂也至先世清芬往復不倦余與濮君有同
志焉









文淵閣著錄

增定史韻四卷附讀史小論一卷浙江巡撫採進本
國朝仲宏道撰宏道字開一嘉興人是書成於康熙
辛未趙南星史韻前載年號浮文妨要注又寥寥不
詳所以不行於世乃刪其繁冗補其闕略以成是編
復上續以義軒至秦下續以明代之事其他晉之十
六國五代之十一國以及遼金西夏亦各為韻語以
補之每紀之末宏道各為總論明紀評語則採谷應
泰紀事本末之文

謹按宏道尚有二十一史韻臣紀續編四卷自
義軒至元多載臣道明代未補桐邑令劉瑄屏
山繫以評梓行之今採進本惟正編蓋當日兩
書先後各出且刷印甚少幸原板尚在仲氏家
藏初學讀史當各
置一編於案頭也

四庫館存目

改菴偶集十卷 國朝仲宏道撰宏道字開一桐鄉
人康熙中由舉人官知縣是集詩八卷文二卷然其
文非文乃註釋之語一曰倣詩廣義乃注高邑李灝
四言詩五篇二曰菴言注古人嘉言五十條三曰擬
易廣義註元邵去同擬退思默恕四卦四曰寧儉約

分九門皆雜錄古人樸素之事而稍為論斷發揮

浙江巡撫臣李

謹按宏道尚有二十一史韻臣紀續編四卷自
義軒至元多載臣道明代未補桐邑令劉瑄屏
山繫以評梓行之今採進本惟正編蓋當日兩
書先後各出且刷印甚少幸原板尚在仲氏家
藏初學讀史當各
置一編於案頭也

四庫館存目

改菴偶集十卷 國朝仲宏道撰宏道字開一桐鄉
人康熙中由舉人官知縣是集詩八卷文二卷然其
文非文乃註釋之語一曰倣詩廣義乃注高邑李潔
四言詩五篇二曰菴言注古人嘉言五十條三曰擬

謹按詩鈔二十九家外尚有仲宏道甌香集周
職順寧樓集釋寂解隨扣集沈孔鍵柴門集

漢鎮紀聞卷四

里人胡琢其章述

風詩

語兒新月

徐凝

幾處天邊看新月經過草市憶西施
涓涓水宿初三夜曾伴愁娥到語兒

構李城

張堯同

螳螂方捕楚黃雀遽乘英交怨終亡國
君王到死愚

古戰場

自昔干戈地城空草自荒漁樵懷舊事何敢議興亡

次韻濮十太尉賞梅

王十朋 龜齡

春向羣芳頭上來可人風味亦奇哉未於茅舍疎籬見先為金枝玉葉開竹外橫斜纔數點笛中搖落已千堆因公撩我惜花意深憶去年湖上杯

次韻濮十太尉詠知宗牡丹七絕錄二首

地近堯天饒雨露花王窮寵多風度書生不辦買花錢空解搖毫為花賦香苞初坼曉霞凝甲第名園冠紹興玉葉金枝老詩伯更將好語為褒稱

幽湖遺跡

吳萊 立夫

淡淡寒雲鶴影邊荒阡故宅忽千年大夫已賜平吳劍西子還隨去越船白石撐空留罔象青松落井化蜿蜒獨嫌此地無章甫只解區區學計然

按此詩郡邑志俱作成廷珪題范蠡宅今仍誌略之舊

吊濮氏化壇有感

鮮于樞 伯機

燐火沾衣拂復來濮家掩骼聚成垓於今海內嬰鋒刃誰念遊魂泣草萊

濮元帥北征還贈

元帥名銑

鄱陽釋克新 仲銘

海國元戎鬢未斑歸來拄笏看青山田園暮景烟塵
外臺榭春風錦繡間桐影連溪鷗夢穩桂香吹月鶴
笙還碧尊綠繪黃花酒時向尊前一解顏

百畝園種蔬

濮彥仁仲溫

小築茅廬一徑開雲林深處少塵埃家園百畝躬耕
罷五柳門前次第栽

梅涇即事

涇居風味倍蕭森常有流鶯送好音一夜雨餘梅子
熟小庭香滿伴清吟

題濮仲溫松月寮

陳約博文

溯源傳玉葉世外想高蹤道似山中豹人猶柱下龍
後凋殊不改孤照若為容只此披襟坐塵囂隔萬重

贈濮元戎尚師

梁寅孟敬

回首英雄即是仙孤標直跨子房先毓精鉅野麟生
處感歎華亭鶴杳年驚坐頗存遊俠氣忘機不是愛
空禪遠陽被毒經三載亟起東山試遯鞭

訪鮑仲孚先生西溪隱居

周致亮

溪上齋居好幽偏事不侵桑麻存晚計圖史樂初心

岸噴幽窻曉移牀綠樹陰下鄰何待老從此數相尋

濮川八景

浦江宋 漁潛溪

太古烟霞錯繡楹拍天蒼翠纈虛明擘開千佛無丈
印不似空題雁塔名 福善翠冷

凌虛不用跨青牛拄杖為龍任去留極目山川知己

在乾坤冷落片雲浮 翔雲高眺

曉雲一帶舞衣輕脫體風流最惜卿莫道故人心不
見半簾春色露傾城妝樓旭照

踏穿清淺水雲奔曉日當空雪滿村可笑羅浮山上

客一枝明月醉黃昏 梅淫花午

撥翻鷗鳥夢驚飛細捲波痕滴翠衣落日半竿花未

睡采蓮人逐釣船歸 荷塘晚風

霜花零落暮秋寒一醉西風樹葉丹却怪楓人留不

住滿溪月色老夫看化壇楓冷

蒼旻不挂一帆絲兩岸漁歌月上遲看破蟬娟全面

目菱花無語笑馮夷 幽湖月滿

夕陽倒挿暮雲沈醉剪臙脂結翠林絕壁丹書人不

識柴門深峭聽歸禽 西院經霞

按八詩有兩本七首韻全末一首并韻亦異附錄
于後春深老桂藹前檻寶閣琉璃照日明一代
豪華誰復在梁間惟有舊題名幾度憑闌問斗
牛丹霞天半白雲留參差村樹隨溪轉閃出青山
墟影浮重完百越一身輕飄何城滄江伴范卿
起日高頻拂鏡重添眉黛覆香陰不盡何須疎
流奔千樹梅花作一村畫靜香陰動汀荻香滿衣
影月黃昏林塘日暮彩鴛飛涼歸一夜西風
浴罷蘭膏一戴酒彈箏高唱采蓮歸
佔早寒輕霜染就樹頭丹獨悲烽火年碧誰到
蕭疎高忍看畫舸吹竹復彈絲一鏡疎林欲起
遲若是此湖真色相當年安得隱鷓鴣
松麓野晴雲光散影統檐楹梵聲
斷處絕無語但有歸啼一幕鶯

濮川月夜清遊歌

江漢朝宗

有客來叩門邀我清夜遊夜長苦無寐夜遊慰淹留

於是仲冬十五夜小星嚶嚶奎與婁乾坤上下絕塵
滓團圓月色如中秋恰如星盤出東海照我毛髮寒
颼颼此時清興發與客相綢繆即從西街入便至西
河頭行行渡溪曲石梁跨清流魚鱗萬屋似城市市
廛行盡皆田疇我行興未已客指歸路休歸去語妻
子此時足清幽客如有期我不爽相攜再作明朝謀

題破窻風雨圖

若有人兮青雲衣珮玉玦兮光陸離爰處兮爰居左
琴劍兮右圖書輕富貴兮浮雲保厥美兮天真山房

兮寥落天冥冥兮雲漠漠雨蕭蕭兮風夜作心耿耿
兮不寐紛遑遑兮求索薄彼夫兮貪婪惟聲色兮是
耽文繡兮膏粱誰何為兮懷慚秋蘭兮可紉吾所思
兮古人寒檠兮雪案甘與君兮相親

辭家行

漢 鑲成之

我生不辰逢戰爭少年離散逐飄萍盼望何時得寧
宇家鄉炊粥話伶仃一朝干戈幸乍息此身又自作
飛英江流漂渺無窮極回首柴桑淚雨傾暮靄蒼茫
何處路姑投客舍買殘羹入門不復問湯火但有四

壁哀啼聲云我夫郎半塗失不死單惜懷中嬰叩伊
何事也零落低言姓濮總一情主人聞聲大詫愕恐
及株連催早程啞啞烏啼天欲曉吞聲理擔前途行
道旁大帽忽高叫怕是官胥心膽驚無罪離家苦復
苦誰云四海樂昇平

過梧桐涇時官籍濮彥仁宅妾龐氏唐氏自經

感而賦之

崇德貝 瓊廷琚

天寒水清石齒齒杏葉初黃豆花紫舞榭歌臺不見
人頭白鳥飛月明裡當時豪俠輕王侯一縈一枯八

千秋綠珠已解死金谷草露作淚無停流

寄糜孝子

幽湖老人七十餘一身如蟲隱圖書朝廷不起常夷
甫鄉黨已知徐仲車海燕定巢來屋裏林鳥得食上
階除雨晴有興即相過一葉小舟通竹渠

寄幽湖客舍

我無太古明星宅白首西東寄此身已免崎嶇投劍
外敢辭寂寞老江濱杞杞結子初肥雨芍藥留花不
見春萬古乾坤同逆旅兩山風月屬詩人

送朱顯道赴濠上

將軍五月過盱眙雪浪樓船快馬馳天地重開新造
國山川多紀壯遊詩千屯霧合耕耘處萬里星奔貢
賦時却向秋風候旌旆南還莫負雁前期

桐鄉夜織

崇德朱逢吉以貞

桑柘綠陰肥千村翳夕霏機聲交軋軋燈火競輝輝
賈客留金去兒郎出市歸喜輸官賦足誰復歎無衣

泊舟幽湖

寧海方孝孺正學

十載飄零一夢中桃花依舊豔東風漢家舊院今何

在到處機杼說女紅

村字在方典壬平声不
去此法在溪多

入濮院路

秀水項忠蓋臣

行盡禦兒河。纔過語兒亭。將軍鉦鼓靜。母子笑談寧。
破國霜千樹。還家月一庭。明朝載酒出。鷗鷺滿沙汀。

臘脂匯

海鹽蘇平雪溪

西子曾經此地過。調脂弄粉鬪雙蛾。乍辭越國山應
遠。望入吳門路不多。春滿玉容初罷鏡。香生羅襪欲
凌波。古來尤物能亡國。鹿走蘇門奈爾何。

桐溪

崇德李蕃文威

萬年禹鑿東連海。百折清流曲抱村。風浪不驚魚鳥
靜。桐花開到邑侯門。

吳越戰場

崇德潘蕃廷方

吳越興亡宛目前。游屯沒上草芊芊。夕陽滿地生寒
色。野燒浮溪斷暮烟。麋鹿歌臺今往矣。鷓鴣舞殿亦
淒然。祇餘賜劍當年恨。惆悵東風哭杜鵑。

濮節婦

高昌高岳房高

蚤年事夫君。碧梧對舞雙青鸞。夫亡失所天。朱絃既
斷不復彈。孤燈夜雨愁漫漫。眼中流血何時乾。將心

擬古井信不起波瀾將心幕貞松願歷冰霜寒子猶
未成立甘旨奉姑良獨難只今已老凋朱顏秋風兩
鬢何斑斑此心終不改此節誠難攀璽書忽從天上
來旌表特起青雲間青雲間世稀有柏舟詩既成共
姜之名垂不朽

漢地
古所

○濮門劉節婦

潘 彞

結髮事良人恩情與海深誓堅百年志以保九泉心
白玉鳴遺佩黃金暗古簪梧桐原上月奕世載芳陰

○題馮母張貞節

太倉 王家屏對南

霜月淒涼寶瑟寒宵燈滴淚和熊九髮因愁冗千絲
白心與天盟一寸丹甲第崢嶸光閭闔綸褒燦爛映
門闌而今節孝成雙美百代人從北斗看

○題張貞節三首錄二

山陰 徐 渭長文

三選近俎苦霜時尺一殊恩湛露垂自古男兒嬰白
少誰家嫠婦帝王知高齋客館寧辭髮落葉寒機幾
斷絲見說仙郎棲海曲更無魚鮓到塘西

青史他年定幾行太夫人傳在中央不須竊藥居明
月自解將心結暗霜片匣遠飛鸞字重單雌親刷鳳

毛長羅敷雖老搗筐在付與吳姬出採桑

壽漢遊擊四十名師灼

太倉王元美世貞

千秋帶礪中原舊三翼戈船海成長緩帶諸生談碣石飛書一箭下扶桑心因捧日常懸赤鬚為籌邊欲向蒼四十擁旄真謝掾從今更擬郭汾陽

致政歸過永安祠謁祖

嘉興濮天輝堯華

六龍南幸駐吳山簪筆行宮鵷鷺班晉秩已霑新雨露爰居乍失舊鄉關梧桐地迥瞻烏止荆樹花分倦鳥還梓里于今成畏壘千年蒙澤念維艱

解組歸來謁故祠大官寵賚薦椒卮肇基欲振丹山采讓產還贖棟宇詩遺有青箱傳奕禩曾將白筆寫宏詞半通偶綰蒙垂裕陪祀遙思扈駕時

送濮鴻臚入都應召

名天輝嘉興戚元佐希仲

錦轡春風奉詔初班曹新入大鴻臚玉螭漏靜傳天語銅鶴香消簡御書劍佩承恩容潤澤壺觴惜別意躊躇太平天子龍顏近衛玠當年也不如

贈濮鴻臚駕湖歸里

吳興曹曾

鴻臚仙吏仕熙朝日侍天顏覲百僚衣染龍涎飄玉

佩耳聞鳳管叶簫韶秋來易動尊鱸興老去難將泉
石消從此忘機鷗鳥伴江湖隨地混漁樵

同戚符卿登福善寺佛閣

姚 究叔信

寶閣標雄鎮丹梯躋虛空晴原一以眺春日乍舒融
烟雲滅蒼藹竹樹迴青叢市廛相合脊樓榭復玲瓏
環流一水湛曠野千林通隨喜諧朋好參元究宗風
少刺捐故宅兩師居禪宮僧東溟月庭居之積善恒為念崇
福在厥躬世界幻塵外人天清淨中冥心自茲適觀
化入無窮

翔雲觀

紫霄瞻北極白嶽奉元君仙境何年闢人間此地分
壇空常起霧樓迥欲翔雲恍若聞笙鶴乘遊已夕曛

寄仲弟慶遠守爾律

岳元聲石帆

梅花花信春應早楊柳柳州種定曾天邊白雨愁
界溼瘴後黃茅苦鬱蒸秋風小鳥供行饌暗壑修蛇挂
古藤駭鸞續錄聞初就可似吳船范致能

遵署解嘲十二首錄二

岳和聲石鍾

俗熏韻事苦薰收不盡風聞別有求鈴閣閣雅非元

凱癖畫圖寧似少文遊可能舌戰當鏖戰却道邊籌
學酒籌時雋滿前應避路生涯亦自有梧洲

李也思歸予澹歸踉蹌曾記突蓮闌應知早嚇鷄雛
腐却笑徒謀燕雀肥三十餘年薪故積八千里外瘴
堪違朝簪抽得荷塘在駕水秋深好製衣

按石鍾撫延綏時為楊御史所劾因作詩凡十二
首二詩有秋風萬籟之思故錄之

幽湖泛月

蘆陰疎復密柳色斷還連明月已如此長河並渺然
淡宜西子載涼喜壯風便教點鷗飛處歌聲起市廛

登福善寺佛閣

嘉興濮翰圻衛廷

躡級憑凌意黯然儼登兜率望諸天雲光倒接低塵
界海色平鋪到法筵夜月機絲千劫地秋風未黍萬
家田早知龐老能空有共坐蒲團說往年

登翔雲三清閣二首

層雲高百尺虛閣正相齊戶敞龍飛入簷垂鳥下啼
仙靈來紫府人語落丹梯稽首師尊處天風護舊題
漫作天涯客空懷地主名瑤臺微雨溼蓬島彩霞明
藥草傳神聖桃花遠送迎登臨思故業千古倍含情

禦兒乘月夜歸

濮孟清子澄

霸功不共碧天長
明月亭亭萬里光
何處擢歌悲越女
滿溪新露溼衣裳

題岳中丞鶴石居

釋智舷筆如

名園真似畫圖間
却喜人如鏡裡攀
洲上有禽惟是鶴
池中無石不浮山
芙蓉一種幾千樹
楊柳數株共一灣
剛值皇朝頻有詔
那容賢者暫偷閑

辟塞

許恂如

吳越烽烟漲海昏
城樓征客幾銷魂
清平王路無分

土雞犬桑麻自一村

雨窓讀書

仲宏文漢明

一雨彌旬日清陰
閑蒲堂三春花市廢
連夜竹風狂
閉戶欣開帙憑闌
喜對桑偶然翻閱罷
池水漲滄浪

贈桐溪日者張宿之

顧問去疑

知君自是赤松流
偶作人間汗漫遊
識邁九師元獨剖
文分三畫秘全抽
清風入幕頻揮麈
白日侵簾半隱鉤
每與問奇開妙義
百文常挂老鳩頭

秋夜憶連城校書

史漢良圖南

秋風涼月思闌珊
隔別紅塵一水看
畫靜夢芳疑醉
蝶更深環珮夢
驂鸞眉消螺黛
秋逾翠色比芙蓉
秀可翫最是使人
愁絕處羅浮香裏
怯春寒

林中詩二首錄一

陳其德太華

地僻容疎豁
交貧絕訪尋
品茶添異味
選石得知心
放去愁腸冷
閑來抱膝吟
因君饒野韻
林壑自鳴琴

顧去疑齋頭盆中綠萼

陸養正青霞

遶梅憑畫理
減韻即須刪
約略蒼蚪幹
紛披么鳳斑
香分蘭社永
靜得主人閑
護惜宜珍秘
清霜作抱關

同陳耳參過楊若侯新築

斗室結成疑似舫
冷人閒極淡如秋
殘荷殆槁猶存
致野果垂青小帶
幽坐隱數聲林事
寂黑甜半晌火
雲收相逢莫浪驚
初服鏡裏朱顏雪
滿頭

同吳環中過周園訪連城校書兼尋史圖南

花時何意到山莊
拾得明珠欲佩裳
書帶風翻狂草
旭孤桐月伴懶嵇
康芙蓉帳冷花遺
主昔菡風清蝶
和香興盡不須成
訪戴洞雲深鎖帳
漁郎

春暮同徐雲章李雲門劉蘭舟堤上花坐歸登

奇樹樓題句四首錄二

偶觸郊原興聊同物外人樽浮無意綠花發自然春
新漲寬魚劇村妝撩目頻閱緣稍自遣花亦暫為新
勝情隨地有囊澁減餘歡賴此幽居適延予隴首觀
野烟荒樹合黃綺綠疇攢最是流連處清溪落照殘

贈桐溪日者張宿之

君家象緯日教忙河洛胸中易是房機洩後先天在
我策分內外理歸藏槎邊石引星河曉橋下書傳泗
水長他日穀城山下路赤松分得紫芝香

輓濮道水

吳 覲碧仙

老年忽忽暗傷神月下花前失故人天上九階登陟
舊塵途萬事等閒新適符杏下悲麟歲歿年七十三猶認
濠間化蝶身公名侶莊道骨定知蟬共蛻邇聞人見渡江
津公歿後有人見舟子載往濮院

秋前一夕過資福菴

鍾 山賓王

隔水聞人語紆尋已數重入門僧似鶴遶砌柏猶龍
林爽秋先在庭幽暑莫容閑雲隨意變淡淡兩三峰
鑒撲川誌略

桐邑 顏鼎受初陽

梧桐鄉尚在風物竟何如一日千秋業三朝七卷書
自能存大雅無用感離居使我流連罷愴然多難餘

訪沈海鷗

松江徐 臻而菴

昔日在何處相逢俱老夫聞風先感激見面即歡呼
酒債近來欠詩壇久已孤自知無禮甚不敢更支吾

陰雨連日西水舟中立冬

吳廷樞寰中

雨慣鷗雙戲碧湍披簑停著小舟看秋剛推木收餘
烈冬急將風報早寒烟柳暗消人鬢綠霜楓酣染客
心丹松花對酒蓬窓下款乃聲中天地寬同一字詞
丈對酒

述祖詩

濮 宗澹軒

赫赫我祖世胄曲阜二帝蒙塵乾綱失紐姓由魯國
考古莫及
岌岌靖康天移地動扈駕南遷桐鄉隱鳳祖南渡時我
祖鳳宿梧
桐鄉自謂可棲可藏高宗朝太尉士秦與王梅溪先生善集中每載之曰鳳曰凰文采
翱翔鳳止廣德孔懷象商廣德子姓
今亦繁衍我祖貳室恩榮
采食帝寵館甥豐碑世籍家有鐵券誥命猶在姪懋
功處碑溺于幽湖之西地
名濮九地無陵谷栽桑布穀開闢荒蕪不貲敵國
娘橋
百里至今蠶桑迨至明遠諱鑑裝造佛殿道尊元明尼
五穀豐盛如故
攝淨院福壽禪院有尼淨
度特異碑記尚存奄奄有元未明在天龍蛇

易辨庶幾保全

當張士誠割據時曾遭逢百六幾遭

殄族七十二支徙無再宿

因嫁女於角里湯姓者過

異焉遂緬彼流泉幽湖漢園詩載昔賢子復何言時

有

趙松雪楊鐵崖與宋景

嗟此翔雲維石氣氤氳石名翔

陰晴胡天弗祐與王俱焚

此石張士誠擢取王悲夫

小子性癖耽詩藉此祖德子孫永思

予詩稿已刻未

前紀千秋

漢宣帝徵時受書于先世東後歷百祀世

守烝嘗蘭芬舊氏悠哉悠哉家乘邑誌

從南渡以來

遠近鄉居市隱只隔百里之外皆子姓也至開國功

勳樂浪公族俱在南渡之後世居淮北歷歷可考

夏過龍潭贈佛眉和尚

龍潭福善寺水名

到此無炎暑清涼晝夜同坐深羣動息睡覺萬緣空

庭滴花間露門迎竹裏風熟知空洞冷冰雪貯胸中

秋日過梅涇訪沈可員書齋宿雨二首

去歲連牀話寒燈照夜深雨敲殘葉響蟲泣亂秋吟

喜在相逢處愁生離別心高齋良晤後寂寞到于今

蹉跎駒過隙老大轉悲傷良友松間月衰年草上霜

對君如昨日回首即他鄉龜勉諸英妙精勤當自強

東寄同里朱佑宸孝廉

幽湖橋畔文昌閣長水源流曲到門書籍紫陽光淨
几燈榮青史照黃昏隔溪夜月梧桐里別墅春風樵
李村却憶遠臨荒廬後至今芳展印苔痕

贈沈海鷗短歌

海鷗作詩鷹摩空窮視萬里搏秋風衝開白雲撼星
斗旋回大矯如游龍六十年来飲中友高吟共醉黃
花酒中堅五字擬長城大賦短歌誰敵手君向閭田
老逸民足無履襪頭無巾有時潦倒却狂叫自言尺
護無由伸市上相逢便論詩旁人大笑詩人癡君才

縱橫渺飛鵠老眼層霄看遠飛

九日歸梅涇同沈三山對雨漫酌

十年客舍九重陽今日重陽在故鄉落帽不羞蓬鬢
短棹茱萸醉菊杯長數家烟樹荒村落一水梅涇舊
草堂宿雨未收佳節過君家叢菊幾時黃

懷嶧令仲開一解組歸梅涇

嶧陽桐老鳳初鳴邑宰飛聲繼武城種秫未收歸靖
節著書何暇費康成性如廉石千金重志在清風兩
裡輕最喜拂衣高潔處企懷時動故鄉情

濮川八景錄幽湖夜月

烟水蒹葭近有無那知一片是幽湖只今南北情難斷自古盈虛理不誣萬頃澄波同皎月百年往事獨憑夫曾聞松雪留真蹟何處追尋舊畫圖

題甌香圃

沈機爾任

蘭雪先生新聞甌香圃于東野命余書其額因賦詩以紀之

自鋤東園命甌香囑我濡毫紀草堂座繞茂林時看竹門臨曲水暫流觴謝公豈負蒼生望邵老休誇翠礎長指日鶴書騰谷口野夫那得久徜徉

同史圖南家禹徵過延壽菴得清字

野處僧無俗村豐犬不驚拍扉雲片碎移席樹紋橫軒敞堪招鶴窓晴好聽鶯水厨催午汲孤鐵一聲清

同陳函白禹疇幼清子韜昆季登東寺佛閣

地僻辭兵發林高試眺登危欄當落日孤殿倚枯藤佛寶千岩現人烟萬竈騰南中憑弔盡摹碣再尋僧

懷宋景濂先生讀書臺

當年宋夫子此地昔曾來予也閤觀易空聞舊有臺音容流月露聲歎出風雷後起誰為繼千秋仰大才

梅涇林屋 宋景濂先生游息處

碧草黃牛阪青蘆白鷺村雲霞野天合風雨柏松喧
涇水平入檻硤山高對門昔賢聊寄迹今我作田園

題楊霖寰止齋

市隱若岩阿經聲繞薜蘿石頑頭也點鳥巧舌何多
客至茶初熟詩成硯未磨羣公能知止進取更如何

五鶴堂落成

從來佛刹美南洲如此崢嶸爭見否鋪地鶴翎扶大
厦潑空唇氣護岑樓九天化雨開龍象萬戶人烟接

斗牛定有神仙施斧鑿區區何羨鬼工球

贈張參戎彪

誰言徐泗空蕭條至今碧水流圯橋秘書在腹刀在
腰橫行萬里無人撓將軍自是名家種騎馬出門觀
者悚手誅羣盜如刈草綠林雀苐徒洶洶降楊傖炙
擒朱倪琬弓直射硤山西軍威遠近呼韓范魍魎啾
啾不敢啼

八景和宋景濂先生韻 錄西院纏霞

山房秋冷磬聲沈掃盡紅塵結道林林下只留霞幾

片夕陽天際映孤禽

蠶

呂 洽園渚

農家四月裏養蠶避風雨摘葉小於錢刀切分絲縷
一月繭方收湯沸游鼎釜滿腹天地精經綸火中吐
辛苦為絹帛慎勿委泥土

開一表姊丈嶧山解令歸

清風兩袖別徂徠聞道攀轅飲馬來囊挾焦桐非嶧
產舟攜馴鶴是仙胎漕渠首尾啣千艘岱色青葱偏
九垓雅化入人無待問菁莪樂育幾英才

懷南樓之任都勻

清望多年早着鞭衡陽南去入烏延鳥飛不到千盤
路馬力無憑萬仞天聲教已通君德遠干戈雖靖瘴
烟連緋衣何若斑衣樂念切高堂白髮前

我鄉

我鄉耕作晚小暑盛栽禾料理蠶桑畢經營豆麥過
青秧幸已長膏雨不嫌多蟬噪蛙鳴外遙聞牛背歌

讀濮川誌略漫賦得一十五韻 朱治曄介修

勝地人文著幽湖一水通三朝推世胄八景快家風

帝錫嘉名久，岷傳樂業同。弦歌尊曲阜，鷄犬類新豐。
建置星羅布，懷柔谷仰沖。微行雖命遣，大度豈居功。
劫火戎行擾，浮漚梵證空。廬廙宵輻輳，殿閣統瞳矚。
捨宅輕乎屐，分支轉若蓬。師平疑亦釋，禁解黨為融。
啓佑誠多後，丕承實肖翁。披圖原本在，摘句纂修工。
纂組天章外，磨礪國寶中。偶然傷盛晚，寧使問西東。
慚愧梁園子，如神天在躬。

讀濮川誌略次顏初陽韻

嘉興朱盛時南陽

院錫嘉名舊，流傳水木如。維摩千丈地，揚子一牀書。

憑弔將軍墓，徘徊少宰居。遙追來孝脩，世澤尚留餘。

濮川八景次宋廣平韻

紺殿嵯峨聳舊楹，給孤園有慧燈明。青青古檜依然
在一剎，蕙垂兩院名。福善翠冷

遙瞻高隴盡眠牛，片石翔雲勝繫留。石去名存君莫
問，人間滄海幾沈浮。翔雲高眺

同泛湖流一棹輕，范卿應喚作陶卿。朝來淚灑妝臺
碧，不道吳城是蜀城。妝樓旭照

天寒水凍絕流奔，踏徧羅浮處處村。鶴立隄邊香送

冷管教白日似黃昏梅涇花午

南薰吹送晚香飛葉底鴛央浴錦衣笑舉碧筒低寂

照棹歌一曲採蓮歸荷塘晚風

幾陣淒風徹骨寒誰將血淚染成丹待教葉落秋殘

後非色非空着眼看化壇楓冷

湖光蕩漾柳垂絲水底沈綸弄影遲把酒於吟嫌漏

短不尋幽夢學希夷幽湖夜月

西山日落暮天晴一片丹霞照畫楹仿佛上林花似

錦春風載酒聽啼鶯西院纏霞

依韻酬桐川仲子開一

江寧徐惺子星

深柳雲歸坐不知皎然冰雪換羣疑春風獨解梅花
笑明月休教燕子嗤如此清泉堪永日何妨白石倒
千危興來適意供吟咏試問溪山癡未癡

誌書成送開一歸桐川

仲子聖賢徒家本嶧山壯先世遊樵李鍾靈實奇特
讀書貫三籙天路振雙翼帝命治鳧嶧鄒魯附庸
國服官矢潔清不負先賢側愛民時塵懷見賢心必
抑豈獨渤海流實乃古今式逢予持節時握手真相

得予性素樸疎愛君敦悃悞每見必流連清談據胸臆無何雁影分明月長相憶昨年君過楚予喜動顏色軍書正浩繁筆札賴君力有暇必賦詩篝燈夜不息蘭蕙固至性松柏同勁直非不長相依鄉心忽已逼有田誰為耕有蠶誰為織君曰予且歸暫以遂休息予又赴西陵解纜在次翌未別腸先摧既別情何極願言期冬齊春清光還可即至人貴知止動靜自不惑但得偕歸南山南與君靜對消語默吁嗟仲子古初人蟻視世上如浮塵正當圭組可榮身乃與赤

松箕穎同等倫如予鹿鹿空勞神真在塵壤視高旻君不見君家夫子千年松石尚嶙峋文章意氣何其真又何不遨遊乎商山之北楚水之濱期與君握手兮烟水為比鄰

寄懷仲開一蘭雪堂

桐邑陸費錫大勝

冰心散作四時春吾道于今有一人雨灑鳬山慈是母月明桐里肅如賓非關栽柳存高致直溯傳心抵大醇蘭雪堂中塵自遠湖光雲影倍怡神

○許烈女

許媛桐鄉崇寧灣農家女為強暴所逼忿恨自縊死時年十三縣令劉公鉉義

之為文往祭請于當事旌獎
焉因作絕句二首紀其事

松陵黃容叙九

許家弱女秉貞操不受狂且雙眼挑羞與瓦全甘玉
碎莫言一死等鴻毛

松筠冰蘖凜持身節屋村庄有此人厲節維風賢令
事表貞還與勒貞珉

懋福壽禪林

鍾彝紫錫

西村晝靜溪光綠信步閑吟溪水曲古寺荒涼不見
僧寒蟹獨自啼修竹修竹寒蟹日欲斜林梢濯濯散
高霞渙舟烟火喧歸棹羨煞雲山即是家此詩亦見
改菴集

和宋景濂濮川八景錄妝樓旭照仲宏道改菴
館娃聞說嫁吳時寶鏡當樓對玉姿粉黛消亡千載
後荒臺朝景動人思

翔雲觀醮筵舞鶴紀異

秦時曾誇致碧雞何如白羽舞壇西王喬七夕緱山
約忽自飛來棲欲低

補鮑西溪濮川八景并序

元末鮑西溪宋景濂俱棲遲濮里製濮川八景
詩題雖互異所指之處同也明初姚廷玉又為
繪圖歌詠所有會稽陳先生序尚存集中而詩
篇散佚景濂八詠而外他不可復覩矣仲子濮

川人也因作
五言以補之

橋外全無市橋頭露未晞晨霞明隔浦初日映斜扉
遠市參差滴樓禽高下飛清光真可挹餘霽欲霑衣
市橋曉色

何處呬唔聲林間方誦習鳥啼驚未飛花笑落猶濕
靜裡悟自深樂趣業還集仿佛武城弦村村爭負笈
林墅書聲

仙都開壯麗高閣逼青霞聞有翔雲石時能吐赤文
苔深餘霽積雨過暗泉噴羽客談經罷還看鶴鹿羣

翔雲仙觀

斜陽滿林薄一徑入招提已是僧歸定徐聞鐘滿溪
月華伴禪寂雲水結幽棲此際花宮下真堪問指迷
落日招提

南風吹渡頭涇水日悠悠網集驚游鯉人喧起宿鷗
渚烟近月上漁火落波流幾處垂楊裏清風聽櫂謳

南涇漁艇

惟有西郊外山村自樂羣樵歌若金石爽籟遏霄霞
客去雲還暝人歸日欲曛聞吟曾過此里耳一回聞

西村樵唱

秋水澄澄夜曳筇看碧霄幽湖千頃潔皎月一天遙
波靜魚還躍更深桂欲飄今朝五湖上何處不良宵

幽湖秋月

雪霽晴千嶺梅開香一涯溪光寒到牖樹色曉侵齋
放鶴孤山興高吟祖詠懷名賢風韻在敢與俗人偕

梅淫雪霽

訪賢投菴幻兮上人不值

一葉尋幽興春風到草橋遠門流水淨入戶白雲高

禪樹香成燼梅叢雪未消湯休在何處空令盼歸橈

甌香圖示友

小築杜逢迎非徒遠市城豈從兩後綻筍向燕來生
產薄官無擾家貧客解醒間居曾有賦不作羨魚情

同佑宸雲隣遊楊氏林亭歸憩寶華精舍

逶迤來別墅小徑入花宮梵境催歸牧漁歌落去鴻
寒潭空野色晚照冷蒼松誰是香巖客相逢話遠公

九日同崧來登會龍菴小閣

干戈多難五湖秋喜共羊曇憇小樓青眼逢山看欲

徧綠醕對景坐還留松篁繞裾當萸佩葵蘿興懷勝
柏浮堪笑古人亦多事整冠吹帽枉添愁

壽濮思庭九十

長洲韓 炎 慕廬

君不見百六之山上接天千巖萬壑棲雲烟又不見
陶江奔流東赴海山峽雲洲共湖漣山耶海耶高且
深氤氲瀨氣鍾長陵詩書傳家數百載紛紛紫綬榮
華簪個中有客耽幽寂高卧東山採薇薇荷鍾朝耕
碧岫雲垂綸夜釣滄江月海雲山月了無猜秋菊春
桃謝後開世間甲子都不管眼底俄逢九十來蒼顏

白髮雙炯瞳高出商山北海翁稱觴戲綵羅圭璧陶
江雲谷迴春風噫嘻哉人生何必萬戶侯亦何必識
韓荆州但願歲歲年年如此日壽山福海同千秋

丁未江○驚湖權歌一首

秀水 朱彞尊竹垞

春絹秋羅軟勝綿折枝花小樣爭傳舟移濮九娘橋
宿夜半鳴梭攪客眠

頌桐邑徐子一明府

周 琯 季潤

徐勉丰標冠六朝如公才氣又雙超征輸特緩溝中
瘠拔士時收囊下焦無限春風開繡陌數年化雨浸

桐郊感恩敢謂從隗始駿骨風生慕義遙

西溪隱居

徐發

玉堂辭祿隱溪橋豈學柴桑憚折腰祇惜年高難事
主願為聖世一山樵

晏公廟

十隊樓船信浪開一爐香願此中栽曇摩大寶猶能
得六尺潛龍竟莫猜

鄭和出海求寶為名欲覓建文也而建文尚在浪穹

桐溪雨泛

周璋伯信

清淺梧桐涇高朋汗漫遊會當風雨夜落葉滿扁舟

止齋贈霖寰居士用壁間韻

釋佐惺佛著

知止即岩阿無心買薜蘿樹凋霜色老菊窳晚香多
白日閑中度青山靜裏磨唯君知此意不必更如何

贈濮澹軒

故鄉猶作客山主却來賓門掩半塘月梅開一徑春
詩成多酒後名^著見家貧有眼空塵俗因同道者親

佛閣憑眺全濮澹軒賦

雨過心頭爽登高眼底寬斷雲投壑杳晴樹照人寒
吳越追殘夢乾坤付釣竿世情何足問長嘯傲雙凡

重過水木菴

適意開新徑偶然移舊扉
霜寒人自老秋暮多事違
葉落青桐瘦盤飧白豈肥
空巢憐去燕曾共百花飛

答沈海鷗見贈

小隱寒廬遠市頭幽情不與世同傳
因開白社招山衲故却青山狎海鷗
醉後素書消意氣窮來青賦足
風流梅花涇上清如玉更有清流遜一籌

五鷗堂五首錄一并序

丙午秋將建大悲閣築基之三日有五鷗自雲
中來飛舞旋空良久月明之下觀者如市僉云

閣成之兆迨至庚戌閣始落成
因名之曰五鷗堂紀斯瑞也

幻寄何殊結旅亭
林林殿閣棟天青
雲移碧落窺僧定
日映丹梯照客升
山聳峽峰回壯斗
水來天目遠東溟
非徒氣象誇雄壯
萬戶鐘聲夢自醒

歸舟

濮映康 豐玉

歷亂難聲動四村
晴雲低鎖月光昏
十年岐路無知己
依舊塵埃進陡門

孝廉叔祖仲宣讀書梅涇次韻 濮龍雲 飛藻

吾宗靜養處一室
蔽泥垣過雨蒼松潤
和風青鳥言

醉眠憑竹榻吟嘯有梅軒
莫厭頻來往詩書重本源

過西泠菴贈善如師

訪師扶杖到西泠
白板門閑畫不扃
傍檻花光侵佛座
臨溪竹翠落漁舲
洗心自覺塵埃遠
說法頻教禽鳥聽
岐路迴車嗟已晚
看吾雙鬢早星星

梅涇漫興

陳曾社鴻園

梅花涇畔是吾家
機絲桑麻亦足誇
戶口較於他處盛
鄉風自覺此間奢
燕來王長春籬筍
雨後溪肥小
斲蝦蟆甕開時
招好友談書說劍
夜喧譁

過永福禪院

今朝風日好獨步過漁涇
竹影潑空碧松絲落徑清
農忙爭穫稻僧靜只看經
留客無供給秋花燦一庭

濮川舊迹

吾里在春秋時屬濮李吳越往來孔道蓋即戰爭地也今舊壘遺踪漫漶

不可識聊以其傳于故老者詩以誌之

茅亭來往息樵漁
此是當年構李墟
士卒殘骸雖化土
堦盤朽鐵尚驚鋤
一時螺黛傳西子
千載鴟夷笑伍胥
極目平原桑柘綠
題詩剩有野僧廬
構李亭梅涇南四里
趙壘吳疆古戰場
悲歌不盡盡弔滄桑
荒榛烟合藏兵

塢斷渚波分濯足鄉破國早知烹走狗補牢何至泣
亡羊功成一舸浮家去野水年年冷夕陽范蠡湖在
幽湖南
清流百丈市橋西旭照粧樓俯曲堤紅入口脂春露
滑綠添著黛曉山低鏡臺咫尺傾吳國畫檻須臾傍
越溪千載芳踪共憑弔桃花水漲亂雲迷胭脂
橋尚存
金谷瓊園日笑歡一朝家變最辛酸畫樓對泣雙紅
粉明鏡分飛兩碧鸞園剩土花春雨沒玉埋荒塚暮
烟寒至今流水聲嗚咽如為貞魂訴夜闌雙節塚

宋景濂先生讀書臺

涇上春水碧重林色蒼蒼聞昔宋學士讀書梅花庄
長松蔭頽簷瘦竹圍短牆當時孰來往云是劉與方
經綸佐廊廟著述堆琳琅一代推儒千秣重瑤章徘徊石
橋畔曲折涇水長梅花自開落歲歲懷孤芳

張文韓漢川志成賦贈

吾鄉舊說鳳曾棲剩有桐孫事可稽吳越亭留今構
李宋元地本古西溪百年難訪名賢迹八景猶傳舊
日題不是吾翁勤纂述一編誰指後人迷

過楊解元父子墓誌慨

張其是文韓

解元墓近小橋邊石馬披蓑立野烟莫怪春秋虐祭

掃他家攜酒滴君前墳今無主
閨棺累葉

不得

○未婚守節詩

為朱蕭氏
楊翟氏作

憤然一死豈云奇矢志從容不易為繡閣未親夫子
面泉臺得保玉人姿孝姑以外真無事飲藥之餘絕
所思先後兩扶名教在濮川共識女宗師

濮川古蹟錄梧桐林

濮履中丹紫

梧桐林外景蕭蕭鳳去桐枝半寂寥千古只餘橋畔
月尚憐荆棘借鷓鴣

桐香室懷古

沈堯咨山臞

梅涇一水清且漣梅涇古蹟人流傳濮氏仲溫喜學
道棄官直欲從所好延訪山陰楊鐵厓築室事之晨
夕偕宋劉江鮑時未遇曠世天才於此聚鐵厓古筆
著鐵史四海聲名蔚然起老檀風騷壇坫開一時星
聚何盛哉吁嗟乎只今憑弔聲塵滅惟有梅涇之水
流不絕

讀書臺懷古

何處讀書臺潛溪不可作相傳未遇時避亂此村落

朝瞻嶺頭雲暮看松際鶴汲古何深深百卷抽祕閣
兼有千樹梅晴雪咨吞嚼故人來江鮑酬唱亦不惡
至今花午詩邑乘載鑿鑿先生命世才屈盡偶寄托
誰知帝者師風雲此發脚我家十世居百年安以樂
塋名空有聞老梅已索寞把杯憑吊問遙林烟漠漠

香海山房瑞禾歌

穀號有百皆良稷嘉禾自古推第一率育有命粒烝
民疇云能稼不能穡高僧好事課經餘漬種偶從淨
土植淨土連生十八莖一莖九穗雙岐出秋高露重

穎垂垂稈甲蒼黃密以粟復見二穉三尺強生機弗
絕比如櫛不勞耘耔功不藉桔槔力惟有和風靈雨
滋庇以慈雲無慧日造物愛此豈有私特賜農祥豐
稔吉吁嗟乎年來歲祲艱粒食有田家比無田急輸
將難緩甑塵生長途奔走無寧息安得嘉禾遍萬方
滿篝滿車慶充溢

贈蠡洲內兄二首 錄一

南甸稱良牧干城任一身雙旌敷雨露單騎靖風塵
功與參山峙名垂湘水濱王公筆記在強力挽千鈞

寄呈陸聚齋內翰

憶昔挹眉宇時在歲已丑詩繫方告成網羅無遺寄
博徵表前賢下及梅涇史風騷仗扶持不愧一巨手
我鄉當時作者尚希有漢氏世其家元季盛賓友宋
楊曾寄跡篇什傳誦久明推顧疑去史南陸臣此外無
其偶將遠集難求何從知好醜茲編始國朝遍訪
諸耆耄落落故紙中往往失世守及今不收拾是則
誰之咎爰與同志輩採之慎分割聊以存梗概豈能
開戶牖詩派分宋唐近日交相詬殊途各揚鑣不問

似某某卷帙積未盈家數略如右三都憑元晏其文
傳不朽先生著述家學者宗山斗倘弗遺對菲一序
弁簡首老嗟會面難敢藉徐生門口吳地無風詩願
附詩繫後

雙賢橋訪桐香遺址

張宏牧恕夫

泛泛幽湖水泠泠走石橋蒼松卧澗底碧枯千層霄
緬懷雙賢人已過五百春桐香讀書處湮沒蔓荒榛
潛溪先生工文辭閤中肆外疇與比一朝有旨來江
南博學羣推帝者師茂州安置夔州死不及鐵屋著

鐵史鐵崖隱居七者寮此地應來濮氏招飄飄雙飛
下羽翰至今雲物常光昭道旁却有海鷗廬海鷗聲
塵亦茂如徘徊弔望感今昔吾衰已久憑誰歎沿溪
修竹幽且邃倚竹臨流坐忘悴超然不覺一揩頤清
陰面面飛寒翠

施韋莊四十初度

鍾 梁來霞

芸窗自壽有名篇字字清新塵俗捐往日操觚推鳳
逸曾選與言行世近來營域卜牛眠名馳壇坫人誰及學聞
儒先世共傳近刻彙纂性理自古立言堪不朽不因丹藥駐

華年

花笠四首錄一

沈履端坦如

矮棚結就奪天工不是漁翁是圃翁虧得秋菱春笋
足藤牀卧到日頭紅

遊小桃源

鄭世元黛參

不信迷津後桃源尚可尋到來無酒食彷彿有桑陰
難犬忘鄰比衣冠隔古今踟躕歸意懶花片一溪深

施翼聖東荒田舍圖次原韻二首錄一

梅花溪上披圖得長木橋南置屋來十月西成農務

急比鄰香過甕，醪開慣隨鄰里雞豚社。自號風塵老病尉，中散于今誠懶惰。東荒不遠隔溪隈。

題南谷梅涇八詠詩後

後人不愧東陽叟，今日真傳八詠樓。一片梅涇古花月，被君占盡舊風流。

雪夜同人攜酒有過福善山房酌芝九有作次

來韻

朔風嗷嗷鴻羽肅，小璣玻璃凍紅玉。吟詩說劍十日留，君不來兮儼空谷。羨君落筆龍蛇來，見君懷抱浮

雲開銅荷瑩，兩條燭泥飲莫負。青雲杯雲房魚梵

夜參錯，雪片蕭騷打窓虐。西冷如花客懷惱，楊柳櫻

桃苦相譖

芝九有姬在武林

飲君酒為君歌，人生最好朱顏

酡。成都犢鼻不為惡，齊市吹竽將奈何。寶鴨沈沈結

香霧，四座歡情辟寒沍。只愁明日賦刀環，款段馱君

送君去

奉賀孫駕山入都留別原韻四首錄一

烟外吳山一抹青，短衣腰劍此中行。遙知馬首思鄉處，只看江頭素月生。

陟門

周 曠 緩 卷

陟門南下轉東行夾岸黃花潑眼明無數往來羈鎖
客幾人停轡解留情

○叙徐烈婦事 己錄

楊 煒 赤 雲

徐家寡婦真奇烈慷慨一朝死夫節夫為偉長之冢
君少從余游資性方稟儒一意事經營奔走東西少
停輟老天真情忽降災赤幟招搖返火滅徐生薨鬱
氣填胸寒熱呻吟久成噎參苓調護尚可支數奇更
遭母命絕偉長乘凶為娶婦可怪羅綺易綴經結綹

彌月生病危瀝淚對婦訴曲折婦言不幸罹禍端願
畢所從如一切從此相顧各歎歎一朝離別手永訣
縞素蓬頭條歲餘時節歸寧心似錢父思別嫁生異
謀拒之不能力已竭滴鹽一杯私自吞不明所以獨
結舌一死光明可謝夫生同牢食死同穴悲風慘戚
白日昏徐婦徐婦女中傑

題張丈素臣齋壁畫松

大松素臣楊 燮 爾 梅
小松次薇

大松參雲霄小松倚礪石小如文雅儒大如英雄客
一則令人喜良友稱莫逆一則令人驚千夫俱辟易

一宜星月下吟詩或對奕一宜風雷前擊劍浮太白
濃淡各異施疎密任所癖妙筆傳性情非徒存墨蹟
奪取造化權恐有山靈責坐久啜茗香松花落几席

讀書啟明樓示諸生五首錄一

嘗思文字樂忻幸欲起舞憲明竹几淨筆山停墨譜
注水研赤硃細喉蹲瓦甌羲軒有遺意搜剔異訓詰
羹牆見聖哲不僅在八股清泉一夜雨源流出深塢
借茲灌溉功濬此虛靈府藥石療寒脾製方不按譜
君子有三樂第一從頭數幸值太平年普天歌率土

莫怨一顰寒偷兒弗入戶莫謂資性下願學參之魯
讀書難復難有力各自努

○徐貞女詩

陳光裕芬佩

我鄉有蕭翟守貞歸夫家服食安淡泊終身無疵瑕
玉質久化土清風猶未遐徐女今繼之比舉人爭誇
讀書識大義奉姑禮有加檢簋焚舊制矢心殉泥沙
世多叛名教反覆事可嗟何意巾幗中高節凌雲霞

淨土菴訪桂二首錄一

濮光孝瀛先

碧玉枝頭金蕊盈小山招隱聽新盟看花却憶人千

里空對一庭明月明

遊指南卷

遠林雨過一翻新曲徑風來不起塵莫道儒冠妨俗
眼且尋僧舍豁愁顏顰米囊花發金堆粟心鏡臺空
白映人聞道三眠桑葉急鄉村處處少閭民

小羅浮懷古四首錄一

曹士勲菊田

女兒橋下泊漁舟遙指梅徑溪古寺林間道開花千樹
雪一時人號小羅浮

古銘過訪幽湖旅次

潘亮燭微

遯野陳夫子遙臨客舍間不談當世事只問故園山
夕照蟬吟樹秋風雁度關感時更思越坐看鬢毛斑

輓張漢木

陳梓脩泰

申公醴酒今何如斯言在耳挽我裾距今彈指十七
朔聞君入土碑已琢浮生同處無何鄉嗚呼張君何
匆忙背向未寒三日窆或者重生仗誰驗張君早徹
生死關變滅知識歸冥頑生兒不慧女聰穎玉潤無
人咽憂哽牙戴錦軸書充厨我來唧唧聞蟲魚哭君
語君君勿忿榮悴羣生由分定不如殘編傾篋呼祖

龍賣犬早嫁西家農

雙松圖為沈卜甌尊慈漢孺人壽

我欲畫老松旁著小松樹小松列兩行烟凝翠連羽
持來壽東陽東陽有賢母苦節四十春冰霜甘白首
白首抱丹心秋風孤雁吟寒礎搗明月空外送清音
清音徹紫霄應憐毛羽凋抱雛實辛苦雛鳳成九苞
九苞初覽輝一飛一回顧念母不得去私情急反哺
反哺夕陽下雲深晚山赭願回魯陽戈上堂奉杯棬
杯底酌流霞筵前舞雪花繞膝孫與曾索索紛喧譁

已錄

○題劉貞女手迹

老松更百年小松冬參天年年當臘日歌此節孝篇

貞女戊辰浚後六年鏡奩中得手書云婦女從
一一死無二逆父不孝從父不貞願天早賜病
亡若吞金服瀉投井懸梁更傷父母
之心矣乾隆十二年端午日午時記

未嫁守志貞女劉遺迹如新六載周上言逆父為不
孝下言從父亦不肖皇天曲賜兩全法一病黃泉水
歸峽三十八字字道貞女能文吾黨羞人間八股
須著生可能增減一字不嗚呼劉公此女抵百男白
頭無子云何慚我今曾立傳今題詩千世百世傳誦

之貞女有靈知不知

寄分佩時刻幽湖詩草

幽湖無詩今有詩錦塘先生開闢之耕餘與我本流
寓鼎足安能誇割據只今牛耳方登壇搜輯遺稿憑
增刪黃梨赤棗垂不朽地下諸公爭額手故鬼無言
新鬼愁草根燐火蟲啾啾生前萬事雙眼白身後微
名死猶惜長歌短曲詞中豪佇看後勁光前矛

養蠶詞

田家養蠶極苦辛蠶大費力小費心臘月十二蠶生

朝炒鹽獻竈家家勞清明夫婦莫走動隔夜採花浴
蠶種蠶種不一分炎涼熱看冷看須忖量屈指來朝
穀雨近出城買紙糊蠶筐轉綠變藍蠶子出鵝毛担
落房中藏先以嫩葉如乳哺頭眠三日魚鱗鋪二眠
兩日連極枝眠眠揀替勞何辭每眠三日換出老葉謂之替蠶今年
二姑把蠶穩不如大姑昏昏小姑狠出火一錢二百
倍大眠一斤五斤外如此收成定十分割肉先獻蠶
將軍掘笋弗叫笋叫筍蠶要損喫薑弗喚薑喚薑蠶
要僵況今天時頗溫和微風拂拂雨不多雷驚沙脹

更何慮人力到時天豈誤大眠以後廣送葉老翁提
籃小兒挈不愁葉貴只求飽四十二餐一齊考熟腹通曰

考山棚灼火真小心起望山頭白鵲鵲三日齊封門
五日始採繭一斤採十斤合家開笑臉前村後村絲
車鳴咿咿啞啞聲相聞或嘆白肚娘上山一半殭或
恨出火早蠶了葉又了四鄉各比並只有我家好我
家雖好弟喜歡地丁昨夜來催完豪家復要蠶罷米
今朝撐船泊村裡官糧不抵私債苦一石冬畚還石
五賣絲分完兩手光一月替汝空奔忙落得繭黃績

絲線織得綿紬一丈半去年無襦今有袴畢竟蠶桑
是長算不恨官私兩迫促但願年年如此十分足放
膽且喫豪家粟

乙錄

○ 幽湖沈烈婦歌

張宏範 崑表

沈家新婦項家女嫁得沈郎命真苦沈郎生來命不
長新婦一慟摧肝腸人生聚散何太促一刻能將百
年續誓與良人同蓋棺新婦一生心事完良人有母
幸強健良人有弟望黽勉妾身不死將何為何用人
間戀殘喘手持盃滴上樓去地下相從見夫面君不

見東漢曹家之婦夏侯氏千載芳名歷青史如今項
氏一死真洒然省得提刀截兩耳

行查

●雙節為姑母曹表嫂沈作時載入郡志

雪髮疑千尺冰心共百年仰無慙白屋下可報黃泉
貧賤甘荼藥晨昏藉粥饘好憑採風使苦節為雙傳

正月下浣里中補元夕燈極盛觀者如堵二十

八日漏下數刻驟雨爭道蹴蹋殞十四人斷

肢毀體不可勝數作踏燈歎傷之

歡笑出門去連翩踏燈市春風錦棚下明月珠簾裡

迷綵炫奇巧仿佛魚龍戲童叟互扶挈士女紛紛履
趑趑游手徒剛壯喜觸觸驟雨趨狂飈濤聲厭檐祀
遂使平坦衢忽作阪峽比掉頭轉折間立錐已無底
壺公豈可學有身乃大累一夫偶失足百夫共波靡
積人如積薪肉山平地起馬草不相及鴻毛擲一死
本非古疆場與尸何爾爾可憐歡樂場哀歌同蒿里
紙錢與麥飯招魂淚如水不見紅燭光青燐聚殘鬼

幽湖竹枝詞十五首錄五

近來風氣學蘇州熱鬧真如大馬頭南北兩京十三

省滿裝行李買花綢

馬燈旋轉活如龍粧點元宵大不同記得前年大街

上笙歌裝入綵球中壬辰元宵作燈以大綵球藏伶童四五輩奏樂其內

焚年糗粽近端陽燕子啣蟲哺子忙打點下田車水

種連朝梅雨好開秧鄉人呼種田為開秧把梅雨為種田水

三日中元暫歇工兒郎都在觀西東盧家三白梅家

肉瓶袋烟筒買箇空

賤買新絲貴賣綢暗中托庇仗神庥今年土地家家

大一片歡聲拽木頭歲晚酬神盛者稱大土地祝獻唱神歌在旁和之曰拽木頭

懷五布衣并及石東村

福建雷 鉞翠亭

五布衣屬青山人李鐵君名錯陳石閭名景元朱抱光名燬陳嘉謨名策皆北人陳俯恭名梓

浙之嘉興人東村名永寧今少司馬觀補亭之父也

我獲布衣交邂逅五君子久知薦青山幽芳殊凡鵠

願言採其英潛見不異旨因之訪石閭矮屋擁書史

落落談古今貧哉病以死更有抱光君被褐遠金紫

一室抱微尚古琴自悅耳三子臭如蘭何幸不我鄙

且得兩陳君考槃各永矢一在北之廬一在南之埃

北學宗洛閩屢空無外累南學共源流貧亦正同軌

老矣均無兄弟子供滄漣我造北陳廬牀灶雜杖几
南陳會驚湖荅拜人扶起合之以石閭三陳堪並峙
三君未盡簪我乃得躡履抱光云近朱薦青曰御李
薦青與南陳神交頻托鯉試問與北陳握手當何似
爰有石東村薦青忘彼已石閭與抱光東村輒倒屣
東村以子貴不獲布衣比我懷五布衣并作東村誄
亡者杳莫追存者勞予跂潔身各有歸相期惟一是
以此訂知心石交亦足喜天下豈無人渺然思彼美

寄懷陳古銘

順天李 錯薦青

仲弓綽有古人風草澤衣冠範越中十月盤鵬爭搏
擊千金岑鼎自磨礪經生肄講餘紗帳漁火衝寒有
雪蓬手折梅花寄烟水冷香消息一江通

梅涇曲十首 錄三

曹錫鉅藝初

明月夜出五通廟流光飛上九間樓樓頭好女新妝
東醉舞狂歌不解休

五通神康熙中易其像為東嶽廟九間樓近廟右今已燬

聚寶港邊苔蘚合碎金橋頭榆葉飛春衣未製冬衣

曲北客不來西客歸

誰家多買密花綢大利重洋信可牟便待收租斛底

裡恣教瞭穀碓坊頭

涇上田最腴三方阻大水俗呼為斛底裏

梅涇雜咏十首 錄三

曹珩崑圃

野橋梅萼白迷離花底清樽任我攜劇愛蔚藍天色

好園園棟偏最繁枝

幽湖之東有橋名白鶴多紅梅花時往遊焉今已摧折盡矣

十笏閨房萬樹梅古香長繞讀書臺橋邊碧水清如眼親見前賢風度來

垂垂玉樹照清瀾賺得雄蜂欲抱難唐突故應嫌俗

客憑君取影恣教看

梅涇有照水梅其種絕異花開朵朵下向無辨仰者

續鷺湖權歌百首 錄三

嘉興朱麟應梧巢

斷橋曲水古桐涇一棹夷猶破綠萍不及阜林塘上

路抽帆直過女陽亭

佳果移根野寺栽古城百雉沒蒿萊紅桃似鬪西施

豔猶向臙脂滙畔開

夜聽鳴梭出遠村家家紡織古風存入城草布知多

少半是桐鄉半陡門

舟過濮院

秀水汪筠珊立

楊柳人家儘自烟鴉鳴聲裏路迴沿橋頭沽酒尋常慣鳥喚提壺似去年

嘉禾百詠錄二

濮啟元顯仁

好風習習鳥關關卜築晴溪水一灣香滿梧桐涇上

路傷心豪俠剩清閑桐香室

百折寒泉漾竹籬沿溪萼綠有遺枝雙賢橋畔閑吟

處留得風騷八景詩梅花涇

已錄

○決烈歌并序

莘聖沈宋則菴

扶而國已乃

胡氏紀天

色五也

序修入修

名

烈婦田氏嘉興南門外民家女也適濮鎮三柳墳吳文高子雲海為養媳雲海家貧事繼烈婦操作以從事舅姑至孝姑歿事翁如父歷十年舉子女各一子甫六歲女襁褓雲海忽患瘵疾烈婦晝夜侍湯藥願以身代壬午秋九月雲海年三十三復染時疾而死烈婦撫子女矢志自

守翁謂烈婦曰余年逾耄伯亦梵獨依人賃織豈能兼顧欲奪其志烈婦知不能守以子託其妹越九日卧極其女遂自經年二十有三歲癸未余客濮川細訪其事作歌弔之且望集珠玉以彰烈婦冀垂不朽云

秀水三百里水秀來天目山霧分靈氣烈婦鍾而育

婦年及笄適吳生吳生雖貧骨格清入門操作勤相

夫洗手作羹奉舅姑姑先翁歿翁年耄事翁如父彌

盡孝詎知一旦喪良人焚焚藐孤家益貧伯氏支撐

力食艱四壁蕭蕭空懸磬翁謂青年宜早決烈婦聞

之眼滴血有女呱呱襁褓中恐遺黃口累老翁矢志

自經節不改與女同死死無悔有兒存祀心亦安有
翁有伯相撫看九原不復憐饑寒由來節烈死如歸
氏死隨夫志不違心如冰骨如鐵寒光皎皎堅且潔
生同室死同穴芳塚淒清照白日嗚呼古來富節易
彰貧易沒為作歌兮歌決烈所天傾兮天無情妾義
重兮輕死生秋霜冷冽寒原肅獨挽綱常振頽俗
此詩有石錄沈野鷗采吳烈婦事實徵詩走筆應之

秀水張性惟東

由來忠與烈所重惟決絕一念苟回顧此身豈忍滅

濮川吳家婦芳年志莫奪挈女隨逝夫毅然成大節
蓬茅未表揚世遠恐湮沒不死在人心沈郎洒熱血
君不見國初名士三數公至今後悔貽無窮立朝致
身鮮克終嗟哉烈婦誠英雄

驚湖權歌

嘉興譚吉璉舟石

斗門水勢到今平兩岸條桑鳩婦聲料峭春風帆飽
滿微茫烟樹露今明

聽雨軒驚蜩湖權歌

海鹽陸以誠和仲

女郎年少舞腰纖滙畔燕支和露黏最是鳳仙花色

豔染來玉指透紅尖

分得南湖水一彎澄林樾市綠迴環它鄉名士爭來
集如此樂郊應早還

濮紉光滑勝湖絲花似嘉綾巧並傳小女湖邊來濯
錦鴛央對對水中眠

濮鎮紀聞卷末

里人胡琢其章述

雜識

石門陡門

唐以前自杭州至嘉興皆懸流其側水草沮洳以達於海故水則設閘啓閉陸則設棧通行古胥山碑謂石棧自錢塘北抵禦兒之胥口乃其證也至今有石門陡門之名而其迹則埋沒於阡陌久矣

趙瀛嘉郡志

禦兒

禦兒見春秋外傳及史記越絕至更始時始出養女
名亭之說與酈元水經注引黃武六年產兒能語事
及朱長文圖經所辨西施產兒之俗說同一妄也
勾踐令范蠡取西施獻夫差於路潛通三年始達吳
因生子名亭語兒此俚俗之說也陸廣微以入吳地
記又云西施亡吳後復歸范蠡同泛五湖而去此一
舛逐鵲夷之妄也廣微乃託於越絕之書不幾重誣
先賢乎吳永芳郡志

樂郊

○當元之季徐一夔自天台徙嘉興于是嘉興人鮑恂
居郡城之西溪貝瓊居千金圩郁遵居商陳村朱克
恭居鄞林王鏞及弟鈞居梅溪濮仲溫父子居濮市
豐於資集一時名士為聚桂文會以文卷赴者五百
餘人請楊維禎評其優劣四方避地者桐廬姚桐壽
居海鹽義溪崑山顧德輝居合溪溫州陳秀民居竹
鄰巷閩卓成大居甌川江陰孫作居南湖東平牛諒
河南高遜志江都邱氏錢唐陳世昌會稽江漢皆來
僑居一夔自天台卜居白苧里四明周棐以宣公書

院山長留黎林盧城秦約教授崇德日相酬和桐壽
稱樂郊云朱竹垞曝書亭集徐一夔傳

楊鐵崖

楊廉夫來禾中撰吳越兩山亭志併選詞人題詠已
就稿矣夜半聞剝啄聲起視之則皆江南之能詩者
約數百人各執金繒乞楊留選其詩楊笑曰生平於
三尺法亦有時於情少借若詩文則心若借眼眼不
從心未嘗敢斯欺當世之士遂運筆批選見收者止
鮑恂張翼顧文暕金炯四首楊顧諸人曰四詩猶為

彼善於此諸什更須託胎耳然被選者無一在座諸
人相視驚駭固乞寬假以留姓氏楊揮出門外閉關
滅燭罵曰風雅掃地矣姚桐壽樂郊私語

汪佛奴

汪佛奴歌兒也姿色秀麗嘉興富戶濮樂間以中統
鈔一千錠娶為妾一日桂花盛開濮置酒佛奴奉觴
濮有感於中潛然墮淚佛奴請問其故濮曰吾老矣
非久於人世者汝宜善事後人佛奴亦泣下誓無貳
志人莫之信既而濮果死佛奴獨居尼寺深藏簡出

操行潔白以終其身陶九成輟耕錄

八景

濮川八景繪圖賦詩者不一大約摹倣沿套恐非本來惟屠用明出仇十洲臨幅標目較雅似可正訛曰福善翠冷翔雲高眺幽湖月滿西院纏霞化壇楓冷梅涇花午粧樓旭照荷塘晚風俗所傳者別自有三一曰東寺晨鐘西林夕照清閣凌虛教堂清磬錦塘春曙道院荷風幽湖夜月梅涇雪霽一曰會龍烟晚棲鳳朝霞野橋分翠梧桐秋老北塘帆影水木禪居

百園花果渡船漁市一曰市橋曉色林墅書聲翔雲仙觀落日招提南涇漁艇西村樵唱幽湖秋月梅涇雪霽亦各圖景詠詩流布人口濮侶莊濮川殘誌

蛇蟠石

府治東徐少卿祠有苔石奇古土人目曰舞蛟傳是花石綱所遺然至元嘉禾志明柳炎鄒衡趙瀛三志皆不載未析所從來按元慈谿黃玠弁山小隱吟錄有為濮樂閔司令作蛇蟠石歌樂閔家濮院意明初產入官後好事者移置此地耳妄擬李白更九子山

例書之永錄曝書亭詩集

石以舞蛟名未若蛇蟠古試誦弁山吟圖經猶可補

大桑

濮友梅家梅涇之北屋後有大桑一株高數十尺不
便摘採歲時棄葉過半淳熙三年四月中忽有青蠶
叢生葉底俄而生生無數葉底盡成繭如卵蠶婦繅
之得佳絲以織一境蠶桑之利自是日盛識者謂兆
實開之濮龍錫濮川誌略

平江貸糧

偽周張士誠據平江稱天祐元年徵用濮鍾漢銓輩
及西塾楊維禎江漢俱不就時有苗帥楊完者統苗
獠洞徭峇刺罕等叔丞相塔失鐵木耳嘗駐濮院境
濮氏大受蹂躪丙午士誠遣部將朱暹等屯兵三十
六萬於湖之舊館徐達常遇春等分兵築壘營于東
阡以絕其援糧盡遣壻貸糧十萬於濮氏太祖聞而
恚之戊申登極潛行至院諭各分遷我祖氏始行散
處惟明之公早故不與遷列濮氏譜略

舊譜稱太祖駕幸玉音命遷太學湯允元亦郡居世

家時與濮氏通婚其宗譜中亦載駕幸一段

永樂甲申上許有司請詔許並遷故土而應詔者僅得四人其留而不遷者皆雲翔公長子梧之後也

嫁女事

永郡湯濮二姓宋元時以著閭互相姻媾洪武二年湯氏嫁女濮院奩媵紛陳觀者如堵適太祖潛行見而駭之因混迹傳衆以至濮院備訪富盛降旨分遷

湯允元湯氏家譜

革除株遣

永樂七年己丑陳瑛請窮治革除間方孝孺楊任等外戚坐濮氏以楊氏姻親充雲南戍前此寥寥僅歸者至此又復匿姓散處至萬歷十二年吾鄉屠御史叔方以忠臣已褒外戚未宥懇乞聖恩起豁以培聖代綱常事具題隨經兵部尚書張學顏覆奏放回而濮氏始赦免還籍族人乃得漸次復聚濮氏譜略

楊氏謫戍

楊述為楷之子景茂之孫均顯之曾孫均顯字平山嘉興縣學生其先世居嘉興德化鄉諱萬三者富而

尚禮遠近慕之生蠶生雅生任任為高廟所舉人才累官袁州知府緣太常黃湜匿其家執至京師磔於市均顯當惠宗即位時隱於幽湖之梧桐里歷有年所獨邀寬典以名福者列在親屬免死謫邊後又改戍澈浦嗣因屠御史叔方疏請於萬歷十三年放回籍

楊氏族譜

吳樸世婚

當湖茂才吳之傑字凌寒武塘梅花道人吳仲圭後稱勝國時樸氏與其祖父交好聯姻歷數世無替詳家

乘中乃見古人論譔祖先不忘外戚其厚德有如此者

濮川誌略

楊青登第

正統丁卯海寧張靖之之母夢老人書孫字于墻其年靖之領鄉薦兩試春官皆下第辛未禱於京城隍夢登大山老人謂曰此崑崙山也驚寤取禹貢織皮崑崙研省紬繹入場果出此題多為所窘桐鄉楊青者席舍相近來懇靖之因為開陳義意詳述注疏青遂登第名第七梓文一篇靖之竟下第後科甲戊靖

始登第名亦第七梓文一篇其年狀元乃孫賢也母氏之夢至是始驗蓋已八年矣惟織皮之夢雖驗而虛若為楊青設者然靖之名第事實一與青同鬼神之示人顯而隱如此 西湖志餘

祠墓之異

嘉靖丁未居民避倭竄徙有竊毀濮氏土地廟村者墻崩俱斃其下又盜發濮氏塋實無所獲聞者謬以為獲也互攫而戮其一門人稱祖先之靈赫云後崇禎丁丑有謀據永安祠即鎮火菴者每見祠中冠帶

緋衣屹然山立猶未知省至興訟詞憑藉某孝廉為奧援轉相勾引以脅郡侯鄭鴻達公公不為動祠得復故訟已未及半載孝廉三子俱斃尋亦自斃年僅四十可畏哉 誌略

雙瞽之報

隆慶中鎮有濮氏之甥孫愛者卧於樓夜半啓窓向北溺頃更視明星光大如斗遂成雙瞽百藥無效抱真公以此事書於堂壁并錄感應篇涕唾及溺與夜起露坐等語粘以示嚴戒云 誌略

岳公論封事

神廟朝封事已敗上復召九卿科道會議時丙申五月初八日也諸公集東閣下觀者數千人余亦往看班次既定于是職方郎中賈公維翰等北面一揖宣旨訖此時上下嚴肅聞無人聲久之戶書蒲州楊公俊民曰此事重大其說甚長非片言可盡吾輩已各具一揭但當畫一題字足矣諸公皆諾惟吾郡右都沈公思孝厲聲曰此一題字誰敢寫石尚書以一封事貽禍國家皇上以國家命脈聽之吾輩吾輩既受

國恩寵不思竭忠盡言圖報國家乃欲以一題字了此公案則安用吾輩站班閣下今宜毋附當事毋執我見吐盡本誠以襄至計時禮書江右范公謙實贊封事乃出班詰沈曰此一封事足代師徒百萬策無踰此者即有說言遠在萬里公能縮地知其必壞乎沈公叱之曰封事既成何以冊使潛遁既懸萬里公當能飛耳長目知其不壞耶損威辱國釀禍已極尚欲附和奸臣欺君誤國平范為失色而退于是刑書秦安蕭公大亨極言封事之非因言戰守之要沈公

曰戰守雖要猶是第二義須更擇當事大臣然後可
議戰守御史周公孔教曰沈公之言是今日頂門一
針也國家之有東事如人身之有痼疾曰戰曰守猶
治標治本之湯劑也假令庸醫治之雖知方藥昧于
緩急必至死亡今之庸醫則閣臣趙公尚書石公是
也欲起痼疾須去庸醫欲了東事須罷趙石沈公復
數石公欺君者三辭色甚厲觀者莫不吐舌于時各
官班後各有中官數人竊聽其言書之小紙飛報內
廷先是工部岳元聲語予曰廷議畢萬乞過我道之

余既身所見聞遂躍馬至寶源局一面岳公具道云
云岳聞言大憤趙石之欺舉手而頌沈周兩公之鯁
直遂呼紙筆一寫一罵余坐其前見今故大郎君纔
七八歲掣公臂而言曰娘言阿爺中科第做得官吃
了一番虧如今好好做去如何又討煩惱手欲搶紙
筆去公大喝曰咄楊椒山妻子定不如此所以令丈
夫做得千秋人叱之入內余亦辭回岳公明日上疏
又一日旨下為民見只編

桐鄉地四平無山陵川澤之間土滋田沃宜黃白稻
民間所植秫一而粳十其大較也然每獲輒有赤米
糝于其間雖歲之來年復如故越境即否農叟曰此
須公遺愛也萬歷戊申夏五月大水田疇淹且盡民
以謫告公撫慰之勸以力救不得已則棄田之已種
者而存秧決日雨不止度其勢不遺種乃預遣典史
賁庫金若干夙夜進告糴種於江西而已則行水勸
諭且請于都御史乞免今年田租以安民心十餘日
穀歸分四境糴之教民為再植計月餘水落田出而

秧已長民猶疑之將種赤豆以接食公曰無為棄穀
也益勸民樹穀其秋穀大熟賦復減十之七民以是
得全其生者甚衆他郡邑弗及也是穀晚植早熟不
刈則墮落以故後雖他植其種恒在田間歲復歲不
絕須公名之彥南直隸人萬歷間進士累官光祿卿
卒于家黃容卓行錄

怪鏡之獄

楊維春字九雲桐邑庠生為禾郡司寇大啓朱門下
士有方士馬道人者挾術以遊公卿之門出其所鑄

鏡各令自照首弁冠冕要皆顯秩實以相戲竟為讐
家所誣秀邑長執之上其事于院憲奏聞于朝上命
刑官下浙謁司寇朱公公以不過書生而已六字答
之絕不以寃代白刑訊之下洞燭其誣事遂白

楊氏族譜

連蕙蘭

妓連蕙蘭因事繫獄以書干岳石帆云含羞羞婦亭
前獨語語兒溪畔岳為致當路釋之一時傳為佳句
簪雲樓稗說

漢風閣

郡城天寧寺東北房舊有大閣明初有司所建祀漢
提舉明之公神主於中扁為漢風閣擬與嚴將軍助
高風並峙故名規制煥麗後為富僧慧燈所據棄投
木主於穢地萬歷丁酉公八代孫濮師韶讀書寺中
見而憤之抱之鳴府時張侯諱似良蜀人大為按劍
親往勘焉則傑閣已折為曲房几筵並徹牀榻交橫
矣慧燈猶強辨謂從無漢風閣名義師韶出郡志証
之侯遂立董役夫毀去曲屏以還其故見櫺上有濟
顛師題詞云火臨太白於寺有光五百年後屬在予

房侯大駭曰丁為火酉為金其太白也且我張氏而
名似良又於子房二字甚合計濟顛至丁酉約五百
年殆此閣重光之會乎蓋寺沙彌因請并復寺左故
址向為豪宦所割據者侯力以恢復為任未幾而侯
被豪家嗾去厚賄代者以寢其事後劉侯應珂重修
舊志猶存漢風閣三字詞後郡邑志俱受賄囑并漢
風閣空名亦為削去載筆之家一聽與援若此安在
其為微禮之文獻哉誌略

附記李侯秀邑志云天寧寺洪武年間寺僧指南建

微見樓於寺之東北隅一名漢風閣浦江趙左同有
記今為寺僧所佔

濮侍涇事

先君世居梅涇上一夕忽夢至大街到古槐叔舊宅
竟成染坊門有一聯云左云染圓深而作色相右云
留素後以比涇清君諱圓齡號侍涇諱號隱寓殊為
奇異濮襄甫安邱子迂言

甲子清明予與父同齋共寢父夢穿白衣者令其賦
詩敬謝不敏白衣云天下事但算將來不思現在以

致觀面錯過光景夢汝盍即景抒懷父因矢口成文
曰千紅萬紫闌春朝杖策提壺過小橋爭奈落花流
水急殘英片片渡西遙

研椒石

研椒石圓徑五尺天池石為之中有一孔以橫木作
柄撲氏盛時千丁共囊故傳有此石向遺雷家潭風
雨晦暝作祟傷人崇禎己巳秋水涸石見撲承湖以
繩縛而還石至今在其家殘誌

佑聖會

謝天瑞臨林玉露福有司云

余辛丑間見嘉興濮院三月三日有佑聖會吳江有
五方賢聖會碎剪錦綺飾以金玉窮極人間之巧靡
費各數千金艤舟萬計男女咸集費且無算濮院則
見覆一舟皆良家婦人呈諸醜態又有育兒子于田
間者吳江則寶帶橋一擁而塌者數十人河崖房屋
一擠而敗者數十楹有折肱者有斷足者有傷而不
起者有全斃者夫神而無知會無謂也神而有知必
不忍疲民之財而貽民之害也且此不過一時耳目
之娛耳省之而完官可以解督捕之擾省之而自贍

足以足數日之食又况笑而往哭而歸生而往死而歸如嚮之適當其厄者哉按迎會為風俗之靈者有六
一曰競奢二曰誨淫三曰招寇四曰起爭五曰廢時
六曰失事當事者聽之而莫禁何也

謝天瑞鶴林玉露補

盜犯濮川

順治三年大盜楊耀宇等焚劫濮鎮晝夜橫行青鎮亦搶攘米價騰貴仲宏道桐邑志

攜李

李之大者為攜李俗名栢家李在濮鎮之南桐邑志

張宗道遇仙

隆慶間有張宗道者以打線為業寓翔雲觀西廡事元帝甚謹一夕聞殿上云明旦八仙祝帝誕當洒掃伺之張驚寤詰朝候之有八丐至時方上已所攜有新荷葉輒悟所言叩首求度八丐笑而領之使閉目須臾聞風濤聲張亟開目見大海汪洋遽求返仙笑曰汝本無仙骨與鐵釘一枚屬每日需錢觸地可得但不可過求耳後歸途漸近覓冶工製之甫入冶如燎毛然于是乞食而歸已四五月矣今三清閣下有

八仙像為此故也舊聞

藏異

趙華南居南新街家有巨萬鎰銀每錠重五十兩鑿姓氏其上貯木桶內藏地中計十三桶獨鑄翔雲觀大鼎後發藏銀悉不見閩中人得之攜至濮瑞源家買綢濮居趙氏故宅亦曾得趙藏見而問之曰得於地下木桶中後趙竟餓死翔雲觀山門下舊聞

災荒紀事

予生也晚不及見二祖開闢之盛併不及見成宏熙

皞之時猶記神宗初年予始成童在在豐亨人民殷阜斗米不過三四分欲以粟易物便酸鼻棄去菜麥輒委以飼牛豕而魚鮮鼎肉之類即服役者亦人人厭足不意人心放縱天道惡盈一轉眼而歲在萬歷戊子淫雨淋漓遠近一壑越己丑而赤地千里河中無勺水鞠為茂草者幾兩月當是時積米一擔博價一兩有六無不惶駭然米價騰貴僅以月計便覺野無遺草樹無完膚流離載道橫尸遍路矣過此而三十陸年天啟初年雖屢貴屢賤猶未至荒苦之甚約

二十餘年至崇禎十三年商羊起舞積雨彌月較之萬歷戊子更深二尺許四望遍成巨浸舟楫艤於床榻魚蝦躍于井灶有樓者為安樂窩無樓者或舁於屋或登於臺惟慮朝之不及夕也米價初不過一兩餘漸至二兩餘至水退而吳興之農夫重覓苗于嘉禾一時爭為奇貨即七月終旬猶然載舟接尾亦千古奇事也次年旱魃為灾河流盡竭米價自二兩驟至三兩鄉人竟斗米四錢矣幸是年麥秀然終不能飽腹或嚼糠覈或齧麥麸甚至過草盡摘佐以糟糠

而食即素封之家咸以麪就粥二食者便稱鼓腹而一食者居多夫棄其妻父棄其子至於動用器物山積於市任宜用者半估攜之而去嗟乎民窮極矣且稼事少完而飛蝗蔽天溪流又涸疫痢交作十室而五六大聚十分之中去其二三豈造物者生息太繁故播此一番虐焰亦民心不克靈承故帝心厭棄至此耶崇禎十四年中元日識陳其德垂訓樓語

灾荒又紀

十四年冬租無半吐糧則全輸數十畝之家往往逃

亡棄之如脫蹠富者僅覓豆麥貧者或覓糟糠或覓腐渣貸得糠皮幾斗便喜動顏色至十五年春青草初生遍野俱掬草之人前此猶擇草而食至此則無草不食矣鄉人成担挑來不須吏便為罄盡即鬻蔬果未有若此之速售也故男婦行乞往往接踵即故家兒女亦不能自惜且所得豆麥僅以粒計自朝至暮遍乞不盈一掬不數日此輩盡入餓鬼道又別換一番行乞者矣至小而三四歲五六歲者往往棄之於市東街四五一羣西街又四五一羣雖號呼哭泣

之聲徹於通衢旁觀者徒頓足莫可誰何更有在懷抱者活而投之中流惟有疾走不顧一法耳嗟乎父母愛子之心一旦變而為蛇蝎甚而更有食其子者矣無論荒郊之際草市之中彼剝小廝一二頭此剝將死大人一二頭聞者無不駭汗奔視即城府之中亦或聞之明知官法炳如死于杖楚之下彼亦違自恤哉此亦千古所不經見之事不幸而身遭之也

垂訓樓語

土寇橫行記

自乙酉秋冬騷然蠢動鄉間便不能帖席至丙戌春
倡和彌衆黨類愈煩四月十三日天方初明忽報有
船百餘從陡門而來延濮鎮市河泊定使家家搶擄
滿載而歸兩岸雖環聚如林喘息不敢動自此寇一
試遂目無金牛遍地縱橫而起矣船以百計人以千
計將晚便舉銃為號喝叫一聲鼓船如雷自南自北
縱其所之聞者心胆俱喪如此者約有十日餘無論
大戶小戶晝則居于屋夜則宿於野天色未晚便攜
老挈幼四顧傍徨不能待旦而若輩至黃昏時逐一

搜劫米麥衣飾視為長物即有銀錢藏之巢窟無不
一空夜夜放火處處延燒濮鎮數萬家半成灰燼更
可歎者即有瓦全幾家明目張胆差黨索賄得飽其
叨始能僅存甚至白晝招搖以好惡為予奪口中自
稱某爺指揮如意說此家可保則衆寇歛手或稱此
家不可保則衆寇怒目即豪奴數恨其主者無不從
此快心稍不以恩相撫莫不甘為戎首矣故時謀于
野時謀於鎮時謀於城搃之皆危地左投不可右投
不可甚至擄室女孀婦莫敢誰何幸而張斗瞻控府

道領大兵為剪滅計雖此輩百不能去八九然人皆
奪氣就中亦有回心者亦可謂救時良藥也惟王店
一路被鎮上防之甚嚴擒之得法殺死者數百人而
東南半壁反覺無恙慨濮鎮素稱齊心不料此番畏
首畏尾任其縱橫不能合力防禦可為三嘆今而後
南山之南北山之北高人達士早見於此吾輩塵俗
中人真可鄙也丙戌歲季夏

松濤居士記

蜂窩喻

濮谿一僧善養蜂其封壘壘因問每稔收穫幾何對

曰旱澇勤惰不同未可一視予恠其語僧曰雨多則
阻水旱久則無花勤則採之速惰則作之遲蜂窩之
收穫固有此數則也仲生曰有是哉士不勤則墮其
學農不勤則蕪其田雖旱暵在天水澇在地若雨暘
時若而惰者猶然寡獲則是洪水起於手足而雲漢
即在膏肓也小蟲且然而況事之在於四民者乎
桐鄉縣志

虎災

梅花村畔百里盡平原也無猿啼豹嘯之聲豈畦間

偶見獾兔則羣起而逐之歲丁亥秋冬之際猛虎入
我西郊其逐犬也不啻餓狸之搏偃鼠其襲人也不
啻婪獺之嚼細鱗獵網難櫻民居竄伏嗟我不辰隣
茲險穴安得猛士以靖四方乎 沈海鷗鷗笑軒詩序

濮道水

諸生濮道水順治己亥八月十三日卒廿九日魂遊
城外僱船往濮院在舟自言在南門內南宮後浜今
往族姪濮襄甫家到岸道水先入舟子待久不出往
詢乃知詢其服式巾履俱入櫬時所服者 蜩菴瑣語

濮襄甫仙詩

予父天性純孝歸天時顧予曰予生平無不了事惟
祠與譜願爾曹踵事增華予因感佩康熙乙巳八月
十五虔叩呂祖蒙以詩見慰其詩曰喬枝秀毓素芳
新奕世箕裘襄意真月倩古碑孤枕熱雲封老墓鶴
珠塵舊畬昔日宜男德版築今時藁莢春萬疊青山
香淚遠螽斯流寵百年人誨諭之際復書三十六字
并附於左子為濮氏白着寸衷拔衆獨力干城以竣
勝事非子不克克就子年雖邁邁而且壯奮志可也

迂言

紀夢

癸卯重陽群為福善院欲迎僧住持重為輪煥予亦與辛力焉忽夢至院東有別墅屋宇巍然司門者云此爾世業也俄而從者擁圓冠絳袍儼然座正室予儕端莊恭卑跪而請曰我祖先世功德煌煌曾幾何時忽焉衰替祖曰聖賢教人不過克己無他求焉爾曹湏念念要好事事要好善惡報應捷于影響已而覺司晨已三唱矣明春靈山具老和尚送法嗣至院

予叩其事師曰天時人事理氣相符鼻祖耳孫陰陽兆感此正應重陽重修之意

迂言

祝融記異

余嘗讀左傳韓詩及古賀友失火書非真以回祿為幸蓋多藏斂怨不如散財釋謗耳予嘗人也無宿儲無怨府止有先人之敝廬在聊以蔽風雨竊比于焦氏之蝸牛廬邵子之安樂窩者也不意康熙庚申十一月丁卯夜半鄰人失火予房在北彼房在南相去尺許其間既無牆垣可以阻截燎原又非白日可以

救拯焚溺此時樂已之喫酒罔聞佛圖澄之黑雨難
冀雖惠武有勝火之本災洲有不燃之獸亦難免於
焦爛也何幸天風乍轉始也東南忽變而為西北始
也火在簷之下而椽頭如燭忽變為檐在火之外而
燭滅椽頭噫嘻異哉豈有赤松之仙術可以蹈火不
焚又詎有糜竺之陰功得以臨期先卜真天意之倖
邀者也不可以不記 仲宏道桐邑志

表律書隱義元省一則云江浙
馮公漕政
吾吳漕運元時為海運初為轉運如北路短盤驛

予之意後改為兌運貼脚耗與軍送至淮安等水次
後改為長運民不復遠送漕卒自至所在州縣支運
但加增漕卒過江脚耗耳○本朝有民兌官兌民兌
民間與漕卒對兌即長運也後改為官兌民自輸納
正供及脚耗於官而官自與衛漕對兌民力一甦矣
日久奸胥作弊勒索漕規米石有以完七八斗者雍
正中蘇松糧道馮景夏力除其弊定以正供之外每
石加制錢五十四文半為漕卒之脚耗半為胥役之
食費水次遠者再加挑錢五文後遵行之前弊未絕

之時民間固已多費而胥吏作奸不已侵斯正供遂
爾流充之罪不絕自後胥吏無權謹守成規乃無溢
志反得晏然矣做曰寬以濟猛猛以濟寬也叢書

截手修橋

僧羽明者號慧緣杭州人出家率亭山寺五陵高橋
其出入處也歲久橋圯慧緣發心募建已於塘棲等
處募三百餘金而橋工甚鉅又至我里募之晨昏擊
板無有為之領袖者遂禱于佛矢願捐身募化今年
二十六日路至化壇南有老嫗持刀切菜僧即借刀

自截其左手數武之外流血身仆忽有一老人年可
八十餘手藥二丸納其口中頃臾血止復甦告之曰
而今可以愈矣俄頃老人不見自此果能飲食創痕
漸痂予聞而異之適慧緣亦來求見欲予為文紀其
事於疏首因書數語以勸時乙酉十一月也仲改卷

靈應記

康熙乙酉十月杭僧慧緣曾于濮里自截其手以募
修橋丙戌三月十九予往天竺舟過塘栖緣邀余登
岫晤于張子渭飛家未嘗有所異也逾十日歸有告

予曰聞緣手截復生信乎予曰子不語怪母輕信至四月初里人競云截手復生信矣予猶未敢信越一日有錢御天者告予曰慧緣生手信矣予弟所親見而撫摩者也予終未敢以為然又越日忽有沈子傳一簡來則緣筆也予始驚買舟至菴視之果不誣也仲改菴靈應記

拳勇

數十年來他鎮如連環並會流入吾里有私相結識者拳勇相尚欲雄於時會當事覺察禁不得熾此輩

亦漸自戢然其流風餘習猶有效於子侄者力能禦盜手斃數賊于鎮甚至激於義勇闖入大隊手及兵馬凡二而卒斃於隊吳宗泰稿李稗編

勢家斂戢

昔鎮中偶斷勢族郡邑諸勢家陰致鎮黥因緣為奸每每無端捏釁打詐鎮民如假命受獻不可勝舉川上飛虎械船鳴金橫截街衢豪僕縱橫群擁仰鼻息一時鷄犬俱為不寧會當事聞而禁之每因訟懲而里中長者謂其漸不可長集士民公呈憲院命有司

勒石嚴禁許其公評迄今碑石尚存即勢家威以戢
稿李稗編